

WANTOK

NIUSPEPA BILONG YUMI OL PAPUA NIUGINI STRETI - 27 VIA NAU

36 pes Namba 1,196 Wik i stat long Fonde 29, 1997 Mei 29, 1997 50 toea

Ol kendidet na memba baim sotgan long yusim

... Bikos ol i laik win long ileksen

SAMPELA kendidet na 5-pela gavman minista i gat ol bikpela sotgan bilong kirapim birua long ol manmeri na arapela kendidet long taim bilong nesanel ileksen neks mun. Dispela em wanpela bikpela ripot i kam long ol ami na plis fos.

Dispela ol strongpela sotgan i stap long nambis bilong Morobe provins na 5-pela Hailans provins, AAP nius ripot long Trinde aste i tokaut olsem.

Ol dispela sotgan i bilong kantri Rasia we ol i wokim long hap na i gat nem AK47s, M16s, M203s na .303s na .22s, ripot i tok.

I gat ripot tu olsem ol asples na raskel lain i gat ol dainamat na bom.

Bihainim wanpela hait ripot, wanpela Esia timba kampani i haitim ol dispela sotgan i go insait long Morobe provins tupela muni o pinis.

Ripot i soim olsem bik-taun Lae siti i bai kamap birua ples long taim bilong ileksen.

Enga provins long Hailans i save rekot long ol birua na trabel long taim bilong ileksen long bipo. Nau em i go nogut

moa bikos planti birua samting bilong pait i go insait long provins pinis. Olgeta hap bilong provins i gat ol birua samting nau bikos ol man i belhat pinis na tu i gat planti samting bilong birua i go insait long provins pinis. Ol dispela samting bilong pait i bilong yusim long taim bilong ileksen na bihain long ileksen.

Wanpela memba; ripot i tok i gat planti saplai tru bilong ol dispela sotgan na ol samting bilong pait na ol sapota bilong em i wok long pusim na pretim ol manmeri bilong vot i stap.

Ripot i tok planti memba bilong palamen na kendidet i wok long kisim ol biknem raskel lain long karimaut wok kempen bilong ol.

Bos bilong plis long Lae, Provinsal Plis Komanda Suprintenden Awan Sete i tokaut olsem ol plisman bilong em i lukim dispela toksave pinis. Tasol ol bai go aut long karimaut oda bilong ol long lukautim na was long dispela ileksen insait long Morobe provins.

Mista Sete i tok ol plisman i redi pinis long ilek-

sen na ol bai was long olgeta hap we wok bilong ileksen bai karamapim. Ol plisman bai redi long mekimsave long ol bikhet na birua pasin we inap kamap long dispela taim.


Mista Sete i tok ileksen em fridom bilong olgeta manmeri husat i laik sanap resis. Dispela em i fri kantri na husat kendidet i laik raun mekim kempen bilong em i mas raun fri tasol na noken pretim o mekim birua long ol wantaim ol sapota bilong ol, bos bilong Lae plis i tok.

PPC Sete i opis bilong em i bin kisim pinis ol ripot olsem sampela kendidet na sapota bilong ol i wok long pretim arapela manmeri na kendidet. Na tu ol sapota i wok long pulim na rausim posta bilong arapela kendidet. Olsem na ol plisman bilong em i no inap larim ol dispela kain pasin long kamap.

Bos bilong Ileksen 97 Reuben Kaiulo i tokaut aste olsem ol plisman i mas holim na sasim ol lida na kendidet husat i yusim ol sotgan long winim ileksen.


Mista Kaiulo i tok ol dispela lain lida na kendidet i mekim dispela pasin long winim ileksen na go long palamen long go pas long kantri. Tasol ol i brukim lo pinis.

"Papua Niugini i laik go we nau," Mista Kaiulo i tok.



• (Raithan) Ononaomi Togololo wanpela wokmeri bilong Trukai Rais Industri i soim ol studen bilong Bugandi hai skul long Lae long sampela rot bilong planim rais. Foto: Fay Duega.

LUKIM STORI LONG PES 8



MUTRUS

MAJOR SPONSA BILONG RAGBI LEAGUE INSAIT LONG PAPUA NIUGINI

UNIVERSITY OF WASHINGTON TRAINING IS ESSENTIAL TO HEALTH

OL ILEKSEN STORI

PLIS RIPO

MADANG: Polis long Madang i bin holim pas tupela man na painim foapela Wol Woa 2 bom long bek bilong tupela na sasim tupela.

Provinsel plis komanda, Theodore Muriki i bin tok olsem, plis long Madang i bin painim wankain bom long tupela narapela narapela hap long las wik.

Dispela foapela, plis i bin painim long wanpela PMV bilong ples long bas stap bilong ol Bogia long Madang taun yet.

Mista Muriki tok olsem, ol plis i bin kisim tok-save long sampela man olsem dispela PMV ka i bin karim sampela bom. Olsem na ol i bin pulim dispela PMV ka i go long plis stesen na sekim. Ol painim wanpela liklik brekpela bek wantaim dispela foapela liklik bom i stap insait long en.

Plis holim pas John Base, 40, na Emmanuel Bade, 35, tupela wantaim bilong Bogia insait long Madang provins sasim tupela long karim bom raun.

Long Fonde las wik, polis i bin painim 37 wankain bom long Ulingan eria long Nort Coast bilong Madang.

Mista Muriki i bin tok olsem, Kriminel Investiketiv divisen bilong Madang i bin harim sampela tok win long sampela man na hariap long go daun long Not Kost na painim dispela ol bom bilong bipo. Em tok olsem, sampela man i bin dingim ap dispela olpela bom na redim long karim i go taim plis i bin kamap na kisim olgeta.

Plis i no bin holimpas wanpela man yet long dispela namba tu trabel tasol ol plis i mekim wok painim aut yet.

MT HAGEN: Maut Hagen pos ofis i bin pas hav dei long Mande taim sampela stilman i bin kam na hensapim ol wokmanmeri na ranawe wantaim bikipela moni tru.

Wanpela yangpela man husat i bin stap long dispela taim bilong stil i tokim plis olsem, siksipela man i bin kam wantaim kaip na wanpela pistol, i go insait long pos ofis hensapim olgeta manmeri husat i bin stap long dispela taim na ranawe wantaim olgeta moni. Ol plis i no save hamas moni tru ol dispela stilman i bin kisim.

NCD: Tupela man i dai na 10-pela arapela i bin kisim bagarap long tupela rot eksiden long NCD long wik i go pinis.

Nesinel Kapitel Distrik na Sentrel provins plis komanda, Sam Inguba tok olsem wanpela bilong ol man husat i bin dai na olgeta man husat i bin kisim bagarap em long 8 mail ausait tasol long rot bilong Hiritano haive, taim tripela ka i bin bum.

Draiva bilong wanpela bilong ol dispela ka i bin dai long dispela taim. Ol i bin painim dispela man olsem; Sonde Erika, 27, bilong Kage ples long Simbu provins.

Plis i mekim wok painim aut yet long as bilong dispela trabel.

Long Sarere, wik i go pinis, wanpela ka i bin bumim wanpela man i dai long Hubert Murry haive. Mista Inguba tok olsem dispela man i bin mekim wok bilong pikim rabis arere long rot taim ka ya i bin bumim em.



Emelda Leki hot kendidet long Sandaun rijenol

WANPELA strongpela meri kendidet husat i laik sanap resis long Sandaun provinsal sit em Emelda Leki bilong ples Lido long Sandaun provins. Emelda em olpela hai skul tisa na kodineta bilong Distens Edukesen Stadi. Na em i sanap egensim 19 man kendidet long provinsal sit.

Emelda i sanap olsem Independen kendidet long painim gutpela helt na edukesen level bilong ol pipel bilong Sandaun provins, bikipela tru em ol meri.

Misis Leki i no nupela long ol hevi ol meri long Sandaun provins i save bungim we em yet i save wok raun long ol mama grup long provinsal katolik wimens grup long 10-pela krismas olgeta. Na olgeta dispela meri i givim em sapot bilong ol long sanap long ileksen.

"Sandaun provins i olsem wanpela las provins we i nogat gutpela developmen tru. Ol skul na helt senta i pas pinis bikos nogat mani. Mi luksave long ol hevi ol mama long provins i bungim na i nogat gutpela helt na edukesen sevis insait long ol ples. Mi pilim dispela bel kirap long sanap makim ol bikos i no gutpela long sanap long ausait na singaut long beksait taim dua i pas.

"Mi bin wok wantaim ol meri na mi luksave long hevi na wok bilong helpim ol meri grup long statim ol wok bilong helpim ol yet. Bikos mi i no inap helpim ol sapos mi stap ausait, olsem na dispela i pusim mi long sanap long opis".

Em i tok taim em i bin go raun long kempen, em i lukim ol olpela skul, helt senta i pas, ol manmeri husat i no inap rit rait na nogat helpim long ol i kam long gavman.

Em i tok taim ol lapun mama long ples i kam long bungim em, em i pilim olsem em i gat dispela tingting long go het na kempen na pait long makim ol.

Misis Leki i bilip ol hevi i kamap long kantri bikos ol lida i no lukautim gut mani bilong kantri. Em bilip ol man long bipo i bin go pas long dispela wok na i no lukluk gut long ol hevi tru bilong ol pipel.

Em i bilip sapos ol meri i stap insait long dispela eria bilong mekim disisen na go pas long skelim ol mani bai kamapim ol gutpela senis.

"Mi meri na mi gat dispela strong bilong lukautim famili na mi ken lukautim ol pipel long provins wankain olsem mi lukautim famili bilong mi", Misis Leki i tok.

"Mi ting ol meri i mas luksave long dispela na givim mi vot", em i tok.

Em i raun kempen pinis long ol hap olsem Nuku eria na Vanimo ilektoret. Em i redi long go raun kempen long Oksapmin na Telefomin.

Man bilong em i save wok klostu wantaim em na givim em olgeta sapot long strongim em.

Sandaun Iektrol Opis i no kisim stret K507,000 mani bilong karimaut ileksen. Em i kisim tasol K390,299. Tasol ol dispela mani i no go yet long provins.

Ol ples manmeri bai votim yet Somare

TINGTING bilong planti manmeri long Wewak i olsem ol i les pinis long ol biknem lida olsem Somare na Narokobi long makim Is Sepik.

Wanpela praivet bisnisman long Wewak i tokaut long Sir Michael Somare olsem, "wanem samting em i mekim long dispela provins em i no wanem samting ol pipel i tingim, tasol biknem bilong em tasol i gat pawa. Tingim tasol wanem samting ol ples manmeri i gat long tingting bilong ol taim ol i lukim pes bilong Somare long K50 lip mani. Sapos mipela ol skul manmeri bilong Is Sepik i no votim em,

ol 'natnat na pukpuk' bai votim em. Sir Michael Somare bai winim ileksen yet tasol em bai win long liklik namba tasol," bikman ya i tok.

Sir Michael Somare nau i sanap resis egensim tu sampela feveret Is Sepik provins pikinini olsem, hai skul tisa Greg maison (independen), Tobias Kuelik (Pangu) na Joe Spencer Gawi (independen).

Narapela loya bilong Wewak, Michael Mosoro i autim tingting bilong em long Bernard Narokobi.

"Mi gat rum long lewa bilong mi long Bernard Narokobi. Em i man bilong

pait long ol bikipela hevi bilong kantri, tasol em i no save long wanem samting tru ol pipel bilong em long Wewak i laikim".

Mista Mösoro bilong Hawiin ples i save kempen long Narokobi long bipo. Tasol nau em go pas long kempen bilong wanpela yangpela bisnisman na yut lida Luke Gukaine.

Mista Gukaine em wanpela hot kendidet nau long Wewak Open sit egensim Bernard Narokobi. Ol arapela kendidet bilong Wewak Open em Bruce Samban olpela primia na Dokta Moses Manuai wanpela bisnisman.

Ramoi i no laikim Somare, Chan na Wingti kamap PM



• Ol pipel long Mendi, Sauten halians provins i sapot na bihainim kendidet bilong ol.

HARLYNE JOKU i raitim

OLPELA mamba bilong Aitape-Lumi Gabriel Ramoi i askim olgeta independen kendidet husat bai win long ileksen long bung wantaim na kamapim gavman. Na ol i noken votim gen ol lida husat i bin praim minista pinis long ol olpela gavman.

Mista Ramoi i sut long Sir Michael Somare lida bilong Nesenel Alaens Pati (NA), Sir Julius Chan lida bilong Pipels Progres Pati (PPP) na Paias Wingti lida bilong Pipels Demokratik Muvmen (PDM).

Mista Ramoi i tok PNG i lusim ol bilip bilong em long ol arapela kantri long kam kirapim ikonomi na ol wok bisnis bilong kantri long mun Mas taim hevi bilong Sandline ausait paitman i kam long PNG. Mista Ramoi i tok paus bilong PNG bai drai olgeta na ol wok ikonomi, sosel na politikel sait bilong kantri bai pundaun olgeta. Em i tok kantri PNG i bin bungim ol dispela hevi aninit long gavman bilong Somare, Chan na Wingti.

Mista Ramoi i askim olgeta

save olsem long neks yia, bai kantri i nogat moa mani. Olgeta gutpela Papua Niugini husat i gat gutpela tingting na save i mas sanap long bungim tingting long palamen na mekim eksen bilong sevim dispela kantri long i no ken pundaun."

Em i tok gutpela senis i mas kamap we ol het bilong plis fos na ami tu i mas stap insait long kabinet long wokim disisen. Dispela bai mekim ol ami i sanap strong long wok bilong ol.

Mista Ramoi husat em wanpela loya i tok em i bin lukluk insait long mama lo bilong kantri. Na em i tok sais bilong kebinet i ken 20 na go moa long 27.

Em i tok i no gutpela long gavman i kamapim ol vais minista posisen. Tasol ol i mas traim long kisim ol het bilong plis fos na ami tu long stap insait long kabinet long mekim ol disisen.

"Palamen i mas mekim ol dispela samting pastaim long em i ken toktok long ol hevi nau i stap long kantri."

Mista Ramoi i toktok tu long mekim ol senis long ol bilong maining na petrolium. Em i tok PNG em wanpela kantri tasol long wol we ol i wok long sainim yet ekwiti na maining agrimen. Em i tok gavman i mas putim ol wok maining i stap olsem wok kontrak. Dispela bai mekim ol wok maining i stap gut yet aninit long lukaut na han bilong gavman yet.

Ol wok developmen olsem rot, bris na mentenens wok, i gutpela long givim ol dispela wok i go long ol PNG Difens Fos long mekim. Na i no ken poinim han long ol lain bilong Woks Dipatmen. Ol i ami i ken kisim ol yut na yangpela manki long rot long helpim ol wantaim ol dispela wok bilong mekim mentenens na stretim ol rot na bris samting, Mista Ramoi i tok.

Mista Ramoi i tok em i laik sanap bikos ol hevi na senis insait long kantri nau i mekim em i laik sanap long givim ol tingting bilong em insait long haus palamen.

WANTOK

All departments. Phone: 325 2500 - Fax: 325 2579
P.O. Box 1982, Boroko, NCD, Papua New Guinea

Published Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola for Word Publishing Co. Pty Ltd.

Acting General Manager and Group Editor in Chief: Anna Solomon	Papers distributed by air throughout PNG.
Advertising Manager: James DeLisle	Available by airmail subscription within Papua New Guinea and overseas.
Editor of Wantok: Leo Waliwa	
Advertising Deadlines: Display Bookings and Camera ready copy: Tuesday midday.	
Classified Advertising: Wednesday 2pm.	

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.

WANTOK

NIUSPEPA BILONG OL PAPUA NIUGINI STRET

Ol lida tru i no save yusim gan

I LUK olsem taim bilong ileksen em taim bilong pait. Planti ol kendidet long dispela ileksen na ol ileksen i go pinis i yusim ol sapota bilong ol bilong go pait wantaim ol narapela kendidet. Planti ol kendidet i pre-tim tu ol pipel long pawa bilong gan bai ol pipel i mas votim ol.

Bilong wanem na ol kendidet i mekim kain pasin? Sapos ol gutpela kendidet i laik sanap makim ol pipel bilong PNG long palimen ol i mas save long mama lo bilong PNG. Mama lo bilong PNG i tok klia olsem kantri bilong yumi em i kristen kantri. Na em i demokratik kantri. Dispela mama lo i givim tok orait i go long ol pipel bilong PNG long tokaut o autim tingting bilong ol long wanem samting i stret o i no stret.

Taim wanpela kendidet i yusim gan long bosim ol pipel long votim em, dispela pasin i soim ples klia tru olsem dispela kendidet i no gat rispekt tru long mama lo bilong PNG long stat yet. Kain man olsem bai i no gat rispekt long mama lo bilong PNG sapos em i win na i go insait long palamen. Pasin em i soim taim em i no kamap memba yet i soim ples klia olsem em i no inap kamap wanpela gutpela lida.

Olsem na mipela i laik tokaut klia long yupela ol lain i vot. Noken votim ol man i yusim gan bilong bosim yupela long votim ol. Tambu tru long votim ol kendidet i brukim mama lo bilong kantri bilong yumi bikos ol i laik win long ileksen.

PNG i karim inap hevi. Ol lida husat yumi mas votim ol long dispela ileksen i mas pret long God, rispektim ol yet na ol arapela. Votim lida i gat gutpela pasin na maski votim man i bosim o pretim yu long gan, mani, meri, sipsip, bia na ol arapela samting.

WANTOK

NIUSPEPA BILONG OL PNG STRET

P O Box 1982 BOROKO
Telepon namba: 325 2500
Feks namba: 325 2579

**PE BILONG WANPELA
YIA 52 NIUSPEPA**

PLES	AIR
Mosbi	K 40.00
Arapela PNG eria	K 75.00
Australia na Nu Silan	K115.00
Esia pasifik na Japan	K150.00
Amerika na Yurop	K215.00

Ol papagraun strong yet long rausim setelmen

OL AMELE pipel na ol narapela lain papagraun long Madang i stap strong yet long gavman i mas rausim ol setelmen insait long Madang taun eria. Sapos gavman i no harim tok na bihainim wanpela petisen ol i givim ol bai pasim wara saplai i go long Madang taun.

Dispela bikpela askim bilong ol Amele na ol asples Madang i bin kamap bihain long wanpela trabel long mun Epril we sampela lain man bilong Sepik i bin kilim wanpela draiva bilong Amele. Plis i holim pinis ol dispela lain i mekim trabel na nau ol i stap kalabus long Beon CIS.

Ol papagraun i bin givim petisen bilong ol long Gavana bilong Madang provins, George Wan long Me 6 na i bin askim long gavman i rausim ol setelmen long taun we i no stap long ol stret. Insait long petisen ol i laik ol setelmen i mas mov aut long Jun 6.

Tasol gavana i surukim taim inap 3-pela mun na i holim yet dispela petisen i stap. Dispela em bikos long mun Jun em taim bilong nesenele ileksin.

Deputi siaman bilong Madang Taun Interim Komisin, John Gosiba husat i bin stap insait long miting bilong ol lain asples Madang i kamap long Danben lolok gavman kaunsol semba long Tunde i tok ol lain asples bilong Amele na ol narapela ples long provins i strong yet long ol setelmen i mas lusim Madang.

Wanpela mausman na kaunsela bilong Ambenob, Ogem Balide i tok tu olsem ol

... nogat wara saplai bai pas



JAMES KILA i raitim

Kaunsola bilong Ambenob Ogem Balide i sanap strong wantaim ol pipel bilong em long Amele long rausim ol setelmen.

pipel bilong em long Amele i strong tru olsem ol Amele i mas mov aut long Madang.

Sapos ol gavman i no harim tok long muvim aut ol setelmen, ol bai pasim wara long Gum na tu long Sisiak. Nau yet ol i wetim tasol ansa bilong petisen bilong ol. Sapos gavman i no mekim wanpela samting ol bai pasim wara saplai i go long Madang taun.

Mista Gosiba i tok olsem planti ol pipel i tok strong olsem ol i bin givim graun long gavman long mekim wok devel-opmen. Tasol gavman i no mekim wok long en na ol Sepik i kam na sindaun nating nating long ol dispela graun.

Ol pipel i tok olsem dispela em i no hevi bilong nau tasol. Long 1984 i bin gat wankain singaut ol asples Madang i mekim long rausim ol setelmen, tasol dispela i no 'karim kaikai.

Olsem na nau ol lain asples i strong tru olsem ol Sepik

setelmen i mas lusim Madang.

Ol asples Madang i tok ol setelmen bilong Sepik i bringim planti hevi tru long ol Madang pipel. Stat long bipo yet ol i save bagarapim ol lain long Simbai, Raikos, Karkar, Bogia olsem na nau olgeta lain Madang i no laik ol setelmen bilong ol i stap long provins.

Mista Gosiba i tok i no olgeta lain Sepik i save mekim trabel, em ol liklik lain tasol i save bagarapim Madang taun na daunim nem bilong ol narapela Sepik.

Nau yet ol setelmen long Madang we gavman aninit long Lens dipatmen i mekim plen long en em;

• Sisiak namba 1,2 na 3, Pendamon na Kerema kompaun.

• Ol narapela setelmen we gavman i no tokorait na mekim plen em Pablik Tenk, Meiro/Markham kompaun, Gav-Stoa, Bilila Mausrot, Wagol Sodast, Bilila Poin, Lavalava, Bukbuk Rot i go long Sisiak 3 (Wagol posen 50), Finsh na Raikos kompaun, Sandaun, DCA, Mit Keneri (posen 908), Yangoru kompaun, Bundi kem, Edmin Kompaun na Bogia kem.

Nau yet olgeta maket long Madang i pas, na ol papagraun i tok strong moa olgeta maket we Madang Taun Interim Komisen i no tok orait long en i mas pas.

Mista Gosiba i tok em i wok bilong opis bilong gavana nau long stretim dispela wari bilong ol lain pipel bilong Madang. Gavana i tok olsem insait

long 3-pela mun ol setelmen i mas mov, na dispela i stap yet.

Mista Gosiba i tok em i wet tasol long Lens Dipatmen long skelim ol lain long setelmen husat i bihainim lo bilong graun na narapela husat i no bihainim lo na opis bilong em wantaim provinsal gavman wokman, polis na ami bai i mekim wok long rausim ol setelmen.

Mista Gosiba i tok em i tru olsem dispela askim bilong papagraun i bikpela tru na i ken bringim hevi tu long ol narapela wokman meri bilong narapela provins husat i stap long Madang na tu ol sevises. Tasol ol lain asples i strong tru olsem gavman i mas bihainim petisen bilong ol na muvim aut ol setelmen.

Mista Gosiba i tok ol pipel bilong mipela husat i stap long taun, mipela i laik ol pipel. Taim ol autsait man i lukautim Madang ol i no save stap wantaim ol pipel, bihainim kastom na tredisen bilong ol lokal pipel.

Mista Gosiba i tok olsem taim dispela trabel i kamap, ol pipel i no lukim Madang Open MP, Stanley Pil o Peter Barter i kam na harim dispela hevi namel long ol pipel bilong Amele na Sepik.

Em i tok sapos ol man ya i sanap makim Madang ol i mas sanap wantaim ol pipel na skelim toktok bilong ol pipel. I no stap longwe long dispela hevi.

Mista Gosiba i tok ol pipel nau i mas lukluk gut long taim bilong ileksin long makim man husat i ken lukautim Madang na pait strong long makim ol papagraun stret bilong Madang.

Sandaun hai skul studens go bek long haus

... bikos nogat mani bilong baim kaikai

HARLYNE JOKU i raitim

OL HAI skul studen long Sandaun provins i go bek long haus bikos skul i nogat mani long baim kaikai long narapela tupela wik.

Prinsipol bilong Aitape Hai Skul na Edukesen Menesa bilong Aitape-Lumi konstituensi, Robert Miroi i tok ol studen long gret 7, 8 na 9 i go bek pinis long haus bikos i nogat inap mani bilong baim kaikai na lukautim ol.

"Ol helpim gavman i promis insait long skul fi subsidi i no bin kam yet. Olsem na mipela i larim tasol ol gret 10 studens i stap na arapela gret i go bek long haus,"

Mista Miroi i tok.

Em i tok skul fi long Aitape Hai Skul em K550. Ol papamama i baim K225 na gavman i baim K225. Tasol hevi bilong mani long 1994 i mekim na ol papamama yet i baim olgeta K550. Na bihain ol i kisim bek hap mani bilong ol.

Em i tok dispela yia, ol papamama i baim K225 tasol na ol i les long baim K225 bilong gavman subsidi bikos ol i bungim hevi tru long painim moa mani.

"Ol papamama i stap long ol bikbus bilong provins na ol i nogat dispela kain mani long pasbuk bilong ol. Planti taim ol i save kisim strong long ol wantok husat i wok long taun i helpim ol wantaim mani long baim skul fi. Gavman i bin promisim ol long givim helpim tasol nau yet, gav-

man i givim hevi long ol long baim hap fi bilong gavman," Mista Miroi i tok.

Nau i gat tripela wik tasol i stap long nesenele ileksen, moa manmeri i belhat tru. Ol opisa long Sandaun dipatmen husat i no laik tokaut long ol yet i tok Sandaun dipatmen i nogat mani mca long karimaut ol wok bilong en. Ol i katim pinis ol telefon na feks masin, ol i gat liklik helpim tasol long ol pipel bilong ples tasol ol i wok long kisim potnait pe yet.

Dispela hevi i wankain tu long Wewak na Manus. Ol opisa i tok olsem dipatmen bilong ol i nogat mani bilong karimaut ol wok bilong ol. Nesenele gavman i no salim mani i go long ol yet. Wok bilong ol i blok nau long helpim ol pipel long ol hevi bilong ol insait long ol bikbus na longwe ples tru. Na ol tingting tasol long givim mani long karimaut nesenele ileksen.

TORO TOO

BAGA MEKIM WANMEN SPAK NA SINGAUT IGO LONG OL LAI SINGSING LONGI STEI J...
WAN MOA!! (Chik!!) MAIKOL LENSOROK!!

NAU OL I SINGIM WANPELA FEIVARET SINGSING BILONG EM NA BAGA GO MEKIM WANMEN DANIS ARERE LONG STEI J...

EM NAU, BAGA SPAK IGO KLOSTU TRI-KILOK LONG MONING NA EM KONK-AUT NA SILIP ANANIT LONG TEBOL...

FOA-KILOK MONING NAU OLGETA LAIK GO AUT NA OL KRUNGUTIM TORO IGO IKAM OLSEM WANPELA PIPIA LONG FLUA...


TORO GO AIRWAYS MOTEL LONG DRING NA DANIS IGO TU-LAIT I BRUK...

Bogenvil ripot wantaim VERONICA HATUTASI

Hannett askim pipel long votim gutpela lida



CATHOLIC COMMISSION FOR JUSTICE, PEACE & DEVELOPMENT P.O. BOX 6576 BOROKO, N.C.D PAPUA NEW GUINEA.



Redi long 1997 nesanel ileksen

6. Yumi redi nau long ileksen na yumi mas skelim gut tingting. Kantri i nidim ol stropela na stretpela lida, ol man na meri husat inap stretim wari bilong PNG tude.

7. Yumi no mas votim ol lida husat i gat nem long paulim mani, i no wok gut na i brukim lo.

8. Pasin bilong paulim mani na kisim gris mani bai kamap sapos yumi votim ol gridi lida husat i baim vot na i tingting tasol long helpim ol wantok na husat i no bihainim stret kristen pasin long laip bilong em.

9. Yumi mas tingting long gutpela sindaun bilong kantri long taim yumi i vot.

10. Bai kantri i gat sans long lukim gutpela sindaun, sapos yumi votim ol gutpela lida i go long Nesenel Palamen.

11. Yumi ol vota is mas putim kantri i go pas long taim yumi votim ol mida.

12. Yumi mas skelim gut pasin bilong ol kendidet. Yumi mas skelim laip bilong ol kendidet pa i ken skelim tasol ol mauswara bilong em.

WANPELA memba husat i sanap resis long sia bilong Not Bogenvil i tok ailan i stap long hevi na ol pipel i mas makim wanpela gutpela na strongpela lida long go pas long ol.

Leo Hannett i wanpela long ol 12-pela man husat i sanap resis long Not Bogenvil, sia we Michael Ogio i holim insait long faivpela yia stat yet long 1992.

Mista Hannett i tok wanpela ansa long stretim hevi long Bogenvil em long sait bilong politikel ansa.

Em i lukim Stet Gavman long Bogenvil olsem wanpela rot.

Long kamapim kaikai long dispela rot, Mista Hannett i tok long glasim gut na wok wantaim long Konstitusenel Rivyu Komisn bilong kamapim Stet Gavman long Bogenvil.

Dispela gavman, Mista Hannett i tok bai i givim moa pawa long ailan, ol lida na ol pipel bilong em long bosim na mekim ol bikipela disisen long sait bilong ikonomi o wok mani long ailan na i no dispela singaut long mauswara politikel indipendens.

Dispela i mas stap olsem strongpela as long wok insait long yunaited PNG, Mista Hannett i tok.

Mista Hannett i to bikipela samting long Bogenvil em long kamapim yuniti na wok bung namel long ol lida na pipel.

Ol nesnel na provinsel lida i mas wok bung namel long ol, BTG. ol kaunsil bilong ol sief, Bogenvil Interim gavman, ol yut, meri na ol sios wantaim tu ol piple bilong



Wokabaut long sip em i wanpela rot long raun long ol ailan long Bogenvil. Sip MV Sankamap i go long Buka Ailan.

PNG long bringim gutpela sindaun bek long Bogenvil.

Na tu long bringim sosel na ikonomik developmen long provins na kantri.

Sampela long ol samting we Mista Hannett i givim bikipela tingting long em em long helpim ol pipel long ples long ol eria

olsem helt, skul, kisim gutpela wara na appretim ol rot bilong wokabaut i go i kam long ailan.

Dispela em ol rot long bikailan na bilong i go i kam long ol liklik ailan, ol pipel i mas gat sip na motobot long raun long en.

Long dispela eria, Mista Hannett i laikim gutpela sevis i go long ol pipel long ples.

Mista Hannett i tok ol i mas appretim rot long Wakunai i go olgeta long Buka na ol pipel long dispela eria i ken kisim gutpela sevis. Narapela rot we em i lukluk long en em long Nissan King rot long Nissan Ailan.

Wanpela tingting em i gat em long appretim Buka ples balus i go long intenesenel stended na helpim turisim bisnis.

Mista Hannett i tok tu olsem ol nesanel lida

long kantri i mas tingting gut na tok orait long sampela samting samting we Bogenvil i laikim bilong stapim pait, hevi na dai long ailan.

Em bin tok inap long PNG i pinis long kilim ol pipel bilong em na wankain tu long ol pipel bilong Bogenvil, PNG i no inap long stap olsem wanpela kantri.

Em i askim strong ol pipel long Bogenvil bilong luksave olsem yumi ol brata susa bilong wanpela famili, maski yumi gat ol wan wan pasin kalsa n tumbuna bilong yumi.

Bogenvil Fridom Muvmen saptim ol NGO

OL NON Gavman Ogenaisesen long Mosbi i kisim saptim long wok ol i mekim long stapim Sandline praivet ami grup i go long Bogenvil. Na tu long autim long ples klia ol wok bagarap (korapsen) we gavman bilong Sir Julius Chan na Haivetta i bin mekim long haiarim dispela praivet ami i kam insait long kantri.

Kodineta bilong Bogenvil Fridom Muvmen long Sidni Australia, Vikki John

i mekim dispela toktok insait long wanpela pas.

Mis John i tok ol lida bilong ol NGO grup olsem Powes Pakop bilong ICRAF (Individual Community Rights Advocate), Jonathan O'ata bilong PNG Watch Council, John Napo na John Kavovo i bin wok hat long bungim ol pipel long Mosbi na karimaut mas we i nogat man i dai long en long stapim Sandline i go long Bogenvil na kilim dai planti manmeri na pikinini long ailan.

Em i no wanbel tru long pasin we ol plis i bin holim pasim na sasim ol NGO lida long las wik long pasin bilong bungim ol man wantaim nogat tok orait.

Mis John i tok Sir Julius, Mista Haivetta na ljape em ol lain husat i i mas sanap long ai bilong kot na ino ol NGO lida husat i mekim gutpela wok long stapim kantri long kilim ol pipel bilong em long Bogenvil na tu long paulim pablik mani.

Mis John i tok nau Sir Julius na lain bilong em i laik givim mekim save long ol NGO lida na ol arapela pipel husat i bin go pas long protes mas long mun Mas na ol i stat wantaim ol NGO lida. Neks em ol bai i holim pasim na sasim ol Difens Fosa lida husat i bin stap insait long dispela mas, Mis John i tok.

Em i rabisim pasin we plis i holim pasim na sasim ol lida long en.

Em i tok grup i wanbel wantaim Distrik Kot majistret Bill Noki husat long taim bilong kot long Me 20 i tokaut olsem "ol rong pipel i stap long kot".

Sampela hap long Bogenvil laikim ol ami stap yet

OL PIPEL long Bogenvil husat i stap long ol eria we gavman i lukautim i no laikim ol sekuriti fos long lusim ailan. Ol resisten paitman tu i wanbel long dispela.

Ol komyuniti lida long ples Rorovana insait long Sentrel Bogenvil i bin tokaut long laik bilong ol long wanpela bung we Pipels Eksen Pati i bin holim long ples bilong ol long dispela wik. Lida bilong pati Ted Diro i bin stap long dispela bung.

Ol bikman na ol meri lida bilong dispela ples i bin tokaut olsem sapos ol sekuriti fos i lusim Bogenvil planti pipel husat i stap nau long ol ples we gavman i lukautim bai i kisim taim nogut na birua long ol paitman.

Ol i bin tokaut tu olsem taim ol sekuriti fos i no go yet long eria bilong ol na tu long olgeta hap bilong Bogenvil, ol pipel i save pret long go long gaden.

Wanpela meri lida bilong Rorovana i tok ol mama i save kisim taim tru na go long gaden wantaim bikipela pret bikos long ol birua tasol taim ol ami i stap, ol i pilim seif long raun i go long gaden bilong painim na planim kaikai.

Wanpela ples sief, Maselin Piri i tokim bung olsem ol sekuriti fos memba i mas stap long ailan.

Long wankain taim, komanda bilong ol resistens paitman long Sentrel Bogenvil Hilary Loani i singaut long gavman bilong resistaim ol resistens grup long ailan na ol bai i wok olsem ol non gavman grup wantaim mani helpim i kam long gavman.

Komanda bilong Fowod Tektikel ampani long Buka Letenen Kenel Frank Falaniki i askim ol Bogenvil Revoluseneri Ami long lusim ol samting bilong pait long taim bilong ileksen.

Kenel Falaniki i askim ol BRA long noken stapim ol pipel long go hetim raits bilong ol long i go i kam long ples bilong makim ol lida bilong ol long taim bilong makim vot. Em i tok ol sekuriti fos bai i lukautim ol pipel long taim bilong vot.





Ol ami na plis bai mekimsave long ol trabelman

Ol wok manmeri i ken salim vot long pas

OL WOKMANMERI husat i gat nem long Komon Rol buk bilong ileksen i ken salim vot bilong ol long pas sapos ol i gat planti wok long mekim.

Bos bilong Ilekseen 97 Reuben Kaiulo i tok ol wokmanmeri husat i rejista pinis long vot i mas hariap lukim ol Ritening opisa long ilektoret bilong ol na stretim dispela rot bilong salim vot long pas.

Mista Kaiulo i tok ol lain husat i putim nem long Komon Rol tasol bai mekim dispela.

Mista Kaiulo i tok em i klia sampela wokmanmeri i no inap long lusim wok bilong ol na i go vot. Sampela woka i tok bos bilong ol i no inap larim ol lusim wok bikos sapos ol i lusim wok, wok bilong kampani bai inap bagarap o givim sevis inap bagarap.

"Yu mas hariap stretim dispela hevi wantaim ritening opisa nau long yu i ken salim vot bilong yu long pas. Noken wet inap klostu taim," Mista Kaiulo i tok.

Dispela rot bilong salim vot long pas bai ol manmeri bilong Bogenvil na Rabaul husat i lusim ples bikos long birua na hevi na i go stap long arapela hap tu i ken mekim olsem.

Em i tok tu olsem ol manmeri i gat nem long vot na i go long ovasis o go skol long arapela kantri tu i ken salim vot bilong ol long pas.

Mista Kaiulo i tok aninit long lo, ol bos bilong kampani na ol wok i mas givim taim long ol wokmanmeri long go vot na ol i no ken katim pe bilong ol.

Olsem na em i askim ol wokmanmeri husat i gat nem long vot long toktok tu wantaim ol bos bilong ol na stretim ol dispela samting.

Mista Kaiulo i tok em salim pas pinis long Emplois Federesen, PNG Samba ov Komes na Industri, Samba ov Maining na Petroleum, Fores Industri Asosiesen, PNG Manufekseras Kaunsel na Gavman long askim helpim bilong ol long dispela.

Mista Kaiulo i tok ol rejista manmeri bilong bilong vot i no ken giaman bos bilong ol na lusim wok na i no vot.

Em i tok kampani i gat rait long katim potnait pe bilong ol woka husat i mekim giaman pasin.

Sas bilong dispela kain giaman pasin em K500, em i tok.

YAKAM KELO i raitim

DIFENS Fos ami nau i helpim ol plisman long ileksen 97 bai mekimsave long ol trabel lain husat i wokim ol bikhet na trabel long ileksen taim, bos bilong ileksen Reuben Kaiulo i tokaut long Sande dispela wik.

Long dispela taim, ol birua na trabel i bin bagarapim wok kempen insait long Westen Hailans, Sauten Hailans na Duk ov Yok long Is Nu Briten provins.

Bikpela hevi tru em long Enga, Sauten Hailans na Westen Hailans provins we ol pait na bekim bek long kilim man i kamap long ol sapota bilong narapela kandidate we 5-pela lain i dai pinis.

"Dispela i no gutpela tru, olsem na ol ami bai wok wantaim ol plisman long stapim ol man long noken kilim arapela," Mista Kaiulo, Iktrol Komisina i

tok. Em i tok sampela trabel lain long hailans i tok ol bai birua wantaim ol ami na plis fos olsem na ol fos i redi long bungim ol.

Mak olsem 35 Difens Fos soldia i pundaun pinis long Hagen taun long Sarere long statim wok bilong ol wantaim ol plisman.

Narapela grup bilong ol ami bai ig o insait long Westen Hailans liklik taim nau na olgeta ami bai redi long karimaut aut ileksen wok bilong ol.

Namba olsem 415 ami olgeta bai wok wantaim ol plis fos long taim bilong ileksen na moa yet bai redi tasol long go insait long wanem hap provins sapos hevi i kamap.

Mista Kaiulo i tok dispela kantri i no inap larim ol trabelman i bagarapim fridom bilong ol manmeri long gutpela na fri ileksen.

"Ol mamapapa na susa brata bilong mipela i mas vot long laik bilong ol na i no ken bungim pret na

birua long ileksen taim," em i tok.

Em i strongim disisen bilong em long kamapim wanpela de ileksen insait long sampela hap bilong Papua Niugini. Ol ples olsem Mosbi siti, Lae, ol Hailans provins, saut Bogenvil, sentrel Bogenvil na tripela eria bilong not Bogenvil. Olgeta bai stap insait long wan de ileksen tasol bikos ol dispela hap i gat hevi i stap na moa hevi inap kamap long dispela taim.

Em i tok Wewak, Rabaul, Kokopo na hap bilong Gasel Open long Is Nu Briten provins tu bai kamap long wanpela de tasol.

Mista Kaiulo i mekim dispela toktok long bekim bilong PNG Tred Yunion Kongres long holim tupela de ileksen long PNG.

Mista Kaiulo i tok ol ami na plisman i bin sapotim dispela wan de ileksen bikos sampela lida nugut na ol kandidate nugut i wok long haitim ol birua samting

bilong pait long kamapim birua egensim ol arapela kandidate husat i resis egensim ol.

Mista Kaiulo i tok em i wanbel wantaim dispela askim bilong PNGTUC long givim moa taim long ol manmeri i ken gat sans long makim gut lida bilong ol. Tasol em i mas skelim na tingim tu laip bilong ol manmeri i vot na ileksen opisel long dispela taim.

Em i tok tu olsem hevi bilong Sandline o ovasis paitman i kam long PNG i bin kamapim bikpela nois na olgeta wol i lukluk pinis. Na ol bai lukluk gen long dispela ileksen 97 bai gutpela na fri o nogat.

Yumi mas soim olsem yumi i gat fri na gutpela ileksen long kantri bilong mipela. Nogat bai nem bilong PNG long wol bai i go daun na inap kamapim hevi long ol wok bisnis, invesmen, tred na ol ovasis helpim we mipela i save kisim nau, Mista Kaiulo i tok.

Oro provins redi long ileksen

ILEKSEN long Oro provins i redi nau na ol opisel i makim Popondeta hai skol olsem sentrel ples bilong kaunim vot.

Dispela hap ol i makim em bikos Popondeta hai skol i gat bikpela waia banis na tu ol plisman bai holim bikpela was raunim banisim bilong skol taim ol wokman bilong Iktrol Komisina i kaunim ol balot pepa.

Provinsal Plis Komanda Lincoln Gerari husat i gat eksperiens long lukautim wok bilong ileksen long Isten Hailans provins long 1992 i tok em i ting ol plisman bilong em bai mekim gutpela wok.

Mista Gerari i tok hetmasta bilong Popondeta hai skol i givim tokoraip pinis. Long dispela taim tu bai ol studen i stap ausait long skol holiden na ol tisa na studen husat i stap bek bai nem bilong ol i stap ples klia long ol plisman na Poling Opisels.

I gat olsem 160 plismanmeri long Oro provins na ol bai bruk long 8-pela grup. Insait long ol dispela 8-pela grup, bai i gat 20 plisman long ol dispela wanwan grup.

Mista Gerari i tok em i bilip bai dispela ileksen i nogat hevi na trabel nabaut bikos taim

nominesen i bin stop, ol kandidate na ol sapota bilong ol i amamas tasol na go het long ol wok kempen bilong ol.

Ol plismanmeri long Popondeta i bin kisim tu sampela kain trening bilong wok ileksen long banisim balot bokis. Dispela trening i bin kamap insait long tupela wik na provinsel trening opisa Noel Hosapa i bin trenim ol.

Ol plismanmeri i bin kisim dispela trening insait long buk 'Election '92 Handbook for Police'. Buk ya i holim ol ripot long wok bilong ol plisman long ileksen taim.

Mista Hosapa i tok ol bai wok klostu long lukautim gut na was long lo we i bihainim ileksen. Sampela ileksen birua we ol plismanmeri bai lukluk long ol em, pusim ol manmeri long laik bilong ol long makim man, ol nois nabaut na ol manmeri husat i laik giaman vot tupela taim.

Insait long rekot bilong ol manmeri husat i putim nem long Komon Rol Buk long vot insait long 1997 ileksen, samting olsem 24,000 manmeri i putim nem pinis long vot. Sohe ilektoret i gat olsem 9,000 na Ijivitari ilektoret i gat olsem 15,000 manmeri.

Ilekseen opis makim pinis ples bilong kaunim vot

PLES bilong kaunim vot bilong Lae Open na Huon Galp bai i stap long Bumbu Plis Bareks. Na olgeta arapela ilektoret bai ol ileksen opisa i kaunim vot bilong ol long distrik het kota bilong ol.

Provinsal Iktoret Opisa, Kala Rawali i tokaut olsem Tewai Siassi bai ol wokman i kaunim vot bilong ol long Sialum, Finsafen long Finsafen stesin, Nawae long Boana stesin, Makam long Mutzin stesin, Bulolo long Bulolo taun, Menyamyia long Menyamyia stesin na Kabwum long Kabwum stesin.

Mista Rawali i tok Morobe provins i gat 178 poling tim bilong karimaut wok ileksen insait long 9-pela ilektoret. Na ol bai brukim ol dispela poling tim i go long 4-pela hap, bai ol i gat mak olsem 1,000 wokman olgeta. Dispela bai karamapim tu ol draiva bilong ka, ol lain bilong ronim moto na tupela plisman long wanwan poling tim.

Mista Rawali i tok olgeta wok na ol samting bilong karimaut ileksen i redi pinis na ol i redi tasol long go het long statim wok. Wanpela bikpela hevi tasol inap kamap em sapos ren i pundaun long ol de bilong ileksen. Morobe provins em wanpela provins we ren i save pundaun na dispela inap skruim moa taim bilong pinisim ileksen, em i tok. Tasol Provinsal Iktoret Opisa i tok sapos ren i pundaun, dispela em disisen bilong hetkota yet long tokaut long wanem senis ol inap mekim bihain.



TOKSAVE

Ol wokmanmeri husat bai i no inap lusim wok long i go na vot long ileksen 97 i noken wari.

Ol bai i ken vot yet, bos bilong ileksen Mista Reuben Kaiulo i toksave nau long dispela wik.

Lo bilong ileksen i stretim olgeta samting pinis na ol dispela lain wokmanmeri i ken yusimsamting ol kolim postol vot long makim vot bilong ol.

Dispela samting ol i kolim postol vot i wankain olsem leta o pas na ol wokmanmeri i ken makim vot bilong ol long dispela pepa na postim o salimi go long ol ritening ofisa long ilektoret bilong ol.

Mista Kaiulo, husat em i Iktoral Komisina, i tok olgeta wokmanmeri husat bai i no inap long lusim wok bilong ol long i go na vot i mas lukim ol ritening ofisa bilong ol nau na stretim toktok long yusim postol vot.

Em i tok ol dispela lain wokmanmeri i mas mekim dispela samting nau na i noken wet long mekim bihain.

Taim bilong vot i klostu nau na ol i mas hariap na lukim ol ritening ofisa bilong ol long stretim toktok, Mista Kaiulo i tok. Nugut bai ol i lait na i no inap vot.

I gat 3-pela wik tasol i stap bipo long taim bilong vot long Jun 14.

Mista Kaiulo i tok ol wokmanmeri husat bai i yusim postol voting i mas putim pinis nem bilong ol long Komon Rol long vot. Sapos nogat, ol i no inap long vot.

Em i tok ol turangu lain bilong Bougainville na Rabaul husat i bin ronawe i go long ol arapela provins bikos long trabel long Bougainville na pairap bilong volkeno long Rabaul bai i yusim tu postol voting long makim vot bilong ol.

Mista Kaiulo i tok ol arapela lain husat bai yusim postol voting em ol manmeri bilong Papua Niugini husat i go overseas long stap long hap or skol tasol na wok.

Em i tok klia ken olsem ol bos bilong kampani na ol Gavman dipatmen i mas bihainim lo na larim ol wokmanmeri long lusim wok na i go vot.

Mista Kaiulo i tok lo i tok olsem ol bos i no ken katim pe bilong ol wokmanmeri sapos ol i laik lusim wok long i go na vot.

Em i tok ken olsem ogeta wokmanmeri i mas go nau na lukim ol bos bilong ol long stretim toktok long lusim wok na i go vot. I noken wasim taim nau na wet long stretim toktok bihain.

Mista Kaiulo i tok olsem em i bin raitim pas pinis i go long ol bikpela bos bilong ol kampani na Gavman long larim ol wokmanmeri i go long vot.

Em i tok ol wokmanmeri i noken giamanim ol bos bilong ol na i no vot taim ol i lusim wok.

Mista Kaiulo i tok sapos ol wokmanmeri i giaman na i no vot ol bos bilong ol i ken katim pe bilong ol na tu ol i ken go long kot na peim kot long K500.

TU MINIT TINGTING

Ol tok i gat pawa bilong ol

WAN WAN tok em i bikipela samt- ing long laip bilong yumi. Laip bilong yumi i hangamap long tupela tok: "God" na "laik". Yumi save pait long tripela tok: "fridom" na "kantri" na "biknem". Ol bikipela namba man na namba meri long stori bilong graun, ol i bin muvim tingting bilong ol pipel wantaim ol tok bilong ol. Insait long kalsa bilong yumi yet, tok bilong ol bikman i gat pawa i stap insait long en. Na nambawan man tru i gat pawa i stap insait long tok bilong em, em Jisas yet.

Bikos Jisas em i pikinini bilong God, em i gat pawa bilong God. Na long tingting nating bilong em, em inap wokim kain kain mirakel. Tasol em i no bin mekim olsem. Olsem Nupela Testamen i soim yumi, planti taim Jisas i bin autim tingting bilong em long taim em i wokim mirakel. Em i bin tok. Planti taim em i bin tokim sikman olsem: "Bilip bilong yu i bin oraitim yu." Na long pamukmeri em i bin tok, "Mi tekewe sin bilong yu." Na long mama i lusim pikinini bilong em, Jisas i tok, "Yu no kra!"

Jisas i promisim stilman i

hangamap wantaim em long diwai kros, "Tude bai yu stap wantaim mi long heven." Jisas i bin skulim yumi long beten, "Papa bilong mipela." Long taim Jisas i oraitim wokboi bilong wanpela kepten bilong ol soldia, kepten ya i tok olsem long pawa bilong tok bilong Jisas, "Bikman, mi no inap bai yu kam insait long haus bilong mi; yu tok tasol na boi bilong mi bai orait gen." Ol Katolik i save yusim dispela hap tok long taim ol i go kisim komunio o Yukaris.

Ol tok bilong yumi yet i gat pawa insait long ol. Tok bilong yumi em inap pulim ol pipel o daunim na pretim ol. Tok bilong mama em inap givim bel isi long bebi. Tok em inap kilaim ol aidia bilong ol pipel o paulim tingting bilong ol. Tok em inap pogiv na tu em inap krungutim gutnem. Tok em inap helpim o bagarapim narapel manmeri. Yumi inap litimapim nem o daunim nem wantaim tok bilong yumi. Tok em inap mekim pipel i

hepi, o i bel kaskas. Tok em inap mekim bel i hat o i kol. Ol tok ol inap presim God o daunim nem bilong em. Tok em i gat pawa bilong mekim gupela samtung o samtung nogut.


Ol tok bilong yumi i soim wanem tingting i stap long kru bilong yumi. Sapos yumi hepi, orait, yumi save singsing. Taim yumi pret, yumi bikmaus. Taim yumi laikim wanpela man o meri, yumi save yusim spesel switpela tok. Sapos yumi no autim tingting, em bai no inap save long laik bilong yumi. Tok "Tenkyu" em i soim tingting bilong yumi. Tasol yumi mas autim dispela tok. Sapos nogat, em i no inap karim gupela kaikai bilong en.

I gat sampela spesel tok i gat pawa. Namba wan em i dispela "KAS BILONG YU." Na poroman bilong em dispela: "YU TING WANEM?" Dispela tok "TENKYU" em i save win oltaim.

Wanpela bikipela tok em i dispela: "YUMI." Na tok gat namba i daunbilo tru em i: "MI".

Tasol tok bilong yumi em i samtung nating; tok bilong God em i samtung tru. Na tok i winim olgeta arapela tok, em i tok bilong God i stap long Baibel. Long Hibr 4:12 Santu Pol i rait olsem: "Tok bilong God em i gat laip, na em i wok strong i stap. Em i sap moa, na i winim bainat i gat tupela sap. Dispela tok i save sutim man na i go insait tru. Em i go kamap stret long dispela hap we tel na spir- it i buk, na long dispela hap we skru na kru bilong bun i pas wantaim.

Las tok bilong yumi i kam long Jems 1:22-24, na i go olsem: "Tasol dispela tok yupela i kisim pinis, em yupela i mas bihainim. Yupela i no ken harim nating tasol. Nogat. Sapos yupela i harim nating, orait, yupela i giamanim yupela yet. Sapos wanpela man i harim nating tok bilong God na em



FRANK MIHALIC i raitim

i no bihainim, em i olsem man i lukim pes bilong em long glas bilong lukluk. Em i lukim pes bilong em yet, tasol em i go na kwiktaim em i lus tingting long em i gat wanem kain pes... Na sapos man i glasim gut dispela lo na i bihainim tru tok bilong em, God bai mekim olgeta wok bilong dispela man i kamap gupela tru. Tasol em i no ken harim nating na lus tingting hariap long en."

Em tasol stori bilong olkain pawa i stap insait long wan wan tok. Wanpela tok em i no wanpela toktok nating. Nogat. Tok em i samtung tru.

Tabubil Katolik Sios nau i gat nupela Groto bilong Santu Maria

FLORIAN DATI i raitim

SANDE Me 11, i bin wanpela spesel de bilong ol Katolik long Tabubil. Em i de ol meri bilong Baibel Rosari grup long Tabubil, wanpela bodi insait long Katolik Sios i selebretim namba 10 aniveseri bilong grup bilong ol. Ol i selebretim dispela bikipela de wantaim bikipela misa we Bisop Gerard i go pas long mekim wantaim helpim bilong Anglikan pater, Clower na planti ol lotu lida.

Bihain long Misa, Bisop Gerard i blesim nupela statu bilong Santu Maria ol Baibel Rosari grup long Tabubil i bin baim long Philipines na balus bilong Air Niugini i karim i go long Tabubil. Dispela statu em i soim kaikai bilong hatwok bilong ol mama long mekim ol kainkain fan resing long kamapim samtung olsem K1000 we ol i baim dispela statu. Man husat i bin go pas long helpim ol meri na kisim dispela statu i kam long Philipines em menesa bilong Air Niugini long Tabubil, Gerard Nau. Mista Nau i bin helpim ol meri long bringim statu i kam olgeta long Tabubil na em i no bin askim ol meri long baim balus long mekim dispela.

Insait long misa, Bisop Gerard i tokim ol lain i kam bung olsem ol i ken amamas long dispela de bikos hatwok bilong ol long wok- bung wantaim i bringim dispela statu i kam na olsem ol i gat as bilong amamas long selebretim dispela de. Ol Baibel Rosari grup i bin go pas long dispela wok bilong painim mani long baim dispela statu. Tasol bikipela tenkyu i go tu long olgeta ol kato-



• Ol lijen bilong Maria wantaim mrei i go pas Mis Kepu i bringim Baibel i go long olta wantaim wanpela danis bilong selebretim dispela de.

lik manmeri long Tabubil long helpim ol meri na mekim dispela de i kamap. Ol kristen long Tabubil i statim fan resing wok long Septemba 1996 i kam inap 1997 long baim dispela statu.

Lida bilong Baibel Rosari grup, Anna Hueimb i tenkim olgeta kongrigesen bilong katolik na ol mamba bilong grup bilong em long bikipela sapot ol i bin givim na mekim long painim mani bilong baim dispela statu. Mis Hueimb i tenkim tu ol famili bilong ol meri i stap insait long Baibel Rosari grup long sapotim ol mama i kam inap ol i baim dispela statu na selebretim dispela bikipela de. Em i tokim ol meri tu olsem kaikai bilong wok bilong ol

i soim olsem ol meri i ken kamapim planti bikipela samtung long ples o komyuniti bilong ol sapos ol i wok bung wantaim. "Nogat wanpela bikipela samtung em i hat, ol mama. Yumi ken mekim planti gupela samtung long sios na sosaiti bilong yumi, sapos yumi lusim ol mipasin na wok bung wantaim," Mis Hueimb i tokim ol meri.

Planti lain i kam long Kiunga na Tabubil long amamasim dispela de. Ol i putim kamap kainkain ol stail drama long stori bilong baibel, singsing tumbuna na kwaia. Na ol i kaikai tu long strongim bel bilong ol long pinisim dispela bikipela de bilong amamas.

Dipatmen het bilong ELC kisim insevis kos

OL HET bilong ol wan wan dipatmen bilong Evangelikal Luteran Sios bilong Papua New Guinea (ELCPNG) i bin kisim wanpela insevis kos i no long taim i go pinis. As tingting bilong dispela kos em long luksave long rot bilong kamapim budjet na mekim wok long en.

Man husat i bin givim toktok long dispela kos Will Thomas, Fainensel Kontrola bilong ELCPNG insait long Fainans Dipatmen i tok dispela kos i laik helpim ol dipatmen long kamapim gut pasin bilong ol long yusim budjet long mekim ol wok bilong ol.

Long dispela kos, ol i toktok long rot bilong redim baset na pasin bilong yusim dispela baset long 6-pela mun o wan yia. Ol i mas luksave tu long ol hevi mani na mani go i go long mekim wok olsem wanem. Na sapos i gat sampela hevi long wok orait ol bai mekim wanem kain senis.

Kodineta bilong kos, Wilson Waesa bilong ELC Staf Developmen Opis, i tok dispela kos em i gupela long kamapim ol sampela hevi Sios i no bin toktok na painim rot bilong stretim inap longpela taim i go pinis.

Sampela hevi long wok bilong ELCPNG em i olsem: Ol dipatmen i no skelim ol wok na wanem samtung ol i mekim wantaim ol narapela dipatmen. I nogat toktok i go i kam bilong wok bung wantaim bilong spendim mani gut long dispela kain wok.

Long displa kos ol wokman i luksave tu long hevi Sios i gat insait long pasin bilong skelim kaikai wantaim baset. Ol i painim aut olsem Sios i no inap long bihainim wankain rot olsem ol bisnis i save mekim bilong skelim samtung.

Olsem na samtung ol i toktok long en em long pasin bilong kamapim mak na sut long mak. Kisim wokman stret bilong mekim wanem kain wok. Na skelim wanem ol samtung i kirapim bel bilong ol wokman long mekim gupela wok na i no mekim.

Long tok bilong kamapim mak, bikipela mak bilong Sios em long

kisim ol manmeri i kamap lain bilong Kraisi. Na insait long het tok, 'Tuktok bilong wokman', ol i paitim tok long kisim ol manmeri i gat save stret long mekim wok. Na ol i no ken kisim wokman i no gat save o bikos em i wantok bilong ol. Long tok bilong kirapim bel bilong ol wokman long mekim gupela wok, ol i tglasim ol kainkain rot i stap pinis na tu kainkain nupela wei bilong kirapim laik bilong ol wokman long wok insait long Sios.

Mista Waesa i tok dispela kos em i givim sans long ol dipatmen het bilong sios long kam bung wantaim na toktok long ol hevi bilong wok inait long dipatmen bilong ol wan wan.

Wanpela bikipela hevi bilong Sios em pasin bilong yusim na lukautim samtung.

Ol i lainim tu olsem baset em i plen tasol na i makim wanem kain wok na hamas mani bai wokman i yusim long kamapim dispela wok. Wok bilong kamapim plen na kamapim namba bilong mani long disela plen em i yumi kolim baset. Ol wokman i yusim dispela plen long skelim hamas mani em ol i laik yusim long ol wok bilong ol na i no ken yusim nating taim ol i no lukim insait long baset i abrusim baset.

Mista Waesa i tok, em i amamas tru long planti bilong ol dipatmen het i bin kamap long dispela kos na bringim kamap planti gupela toktok. Em i tok Staf Developmen Opis bilong ELCPNG bai ranim wankain kos bilong ol tresera bilong ol distrik bilong lukautim mani na ripot. Em i tok tu olsem opis bilong em bai ranim narapela kos i sut stret long redim budeet na pasin bilong manesmen, bihainim plan stret long kamap long mak. Em i tok ol dispela kos bai kamap long mun Ogas.

Dispela insevis kos i bin kisim tupela de long Lae het opis.

ELCPNG i gat dipatmen bilong Evangelism, Sios Wokman Trening, Edukesen, Helt Sevis, Developmen Sevis, Fainans na Lands.

Aloitch no ken karim hevi bilong provins

OL PIPEL bilong Aitape i gat laik long lukim Deputi Gavana Piein Aloitch i no ken go pas long kotim Nesenel Gavman, na Fainens Minista long ol hevi bilong provins i no gat bilong nogat mani. Ol pipel i laikim lida bilong provins husat i hólom posisen olsem Gavana, John Tekwie long go pas long kot na i no Mista Aloitch.

Wanpeka komyuniti lida na olpela kaunsela bilong ples Lemteng long Aitape Eddie Sani i tok Aloitch i no Gavana bilong Sandaun, na olsem em i no ken go pas long kot wantaim Nesenel Gavman. Mista Sani i tok ol pipel bilong Aitape i sem long lukim Mista Aloitch i go pas long dispela kot taim Gavana na Rijinel Memba John Tekwie i kisim gupela taim long malolo na raun wokim kempain bilong em long dispela ileksen.

Ol pipel bilong Aitape, Nuku, Lumi na Telefomin i karim bikpela hevi long ol ol haus sik na ed pos we i mekim planti lain i dai. Ol skul i pas.

Long dispela taim tu wanpla sinia opisa long Aitape Plis Stesin i tokim Wantok olsem ol ol nogat bilip moa long olpela plis minista na memba bilong Aitape Lumi Mista Paul Mambe. Em i tok, Mista Mambe i wanpela mausman bilong provins insait long Kabinet. Tasol ol pipel bilong Sandaun i no lukim wanpela kaikai bilong wok bilong em.

Em i tok tu olsem ol plis na woda i no inap holim pas ol kalabusman insait long run gat bikos ol helt atoriti i pasim ol haus kalabus i inap tripela mun nau. Dispela plisman i tok i luk olsem ia na ai bilong ol bos bilong plis na ol memba bilong palamen i pas na olsem ol i no inap lukim ol hevi na bagarap i stap long provins.

Hailens kaukau i gat nem long Mosbi maket

LONG nau yet insait long ol maket, bilong Mosbi siti yumi ken lukim planti ol kaukau bilong Hailens i pulap tru. Dispela em i wanpela gupela sevis ol hailens i bringim i kam long siti.

Long Me 22, wanpela man bilong planim na salim kaukau, Mista Sevis Pove bilong Goroka long 1sten Hailen Provins i bin bringim 69 kaukau beg i kam long Mosbi bilong salim. Em i bin kam wantaim ol arapela wantok bilong em husat i gat samting olsem 30/40 beg.

MATHIAS MALE i raitim
Pasin bilong wok hat i ken kamapim gupela kaikai na bringim gupela sindaun. Na ol hailens i bilip long dispela. Long planti hap bilong PNG yu inap lukim olsem ol hailens i no save sem long mekim mani. Ol i ken salim buai, botol, bia, ronim bas sevis i go inap salim haus na ronim tu ol bikpela bisnis long kantri. Ating i gupela yumi opim ai na lainim skul long pasin bilong ol hailens. I tru planti bilong yumi long PNG i save kros long ol bikos ol i save mekim planti 'pipia long ai' tasol stap laiklik na glasim ol gut. Ol man bilong wok hat tru.

Olsem tasol, Mista Sevis Pove i tok pasin bilong kisim mani long tuat bilong man em i no isipela samting. Mista Pove i tokim Wantok long laip bilong em olsem wanpela man i save kisim kaukau long Goroka i kam long Lae na bihain kisim long sip i kam long Mosbi. Em i tok kain wok em i mekim i hat wok tru. Tasol em i tok, sapos em i salim olgeta kaukau bilong em, em inap kisim samting olsem K5000. Em i tok em inap salim wanpela beg kaukau long K65 o K75. Na dispela i kirapim bel bilong em long wok hat, planim kaukau, baim ol kaukau, na bringim i kam olgeta long Mosbi long salim.

Em tok, sampela bilong ol, i save i stap long we long Goroka taun na taim bilong kaikai i redi long salim, ol i mas kisim ka long ples i kam long Goroka taun bai ka i go long Lae na baim sip i kam long Mosbi. Em i tok olsem transport kos na balus fi i kostim em K600 long bringim olgeta kaukau bilong em i kam long Mosbi. Na long Mosbi em i mas baim kaikai na ples bilong slip inap em i salim olgeta kaikai bilong em. Long Lae i kam long Mosbi, sip i save kisim 6-pela de olgeta.

Japan i givim moa long K4.33 milion masin bilong wokim rot long PNG

JAPAN Gavman i givim moa long K4.33 milion masin bilong wokim rot long Papua Niugini. Japan i yusim mani insait long Japanis Non-Projek Grent Asistens Program. Ol masin Japan i givim em long Greda, Buldosa, Loda, na Fuel trak we divisen bilong Mekenikel Enjiniering insait long dipatmen bilong Transpot na Woks i ken yusim. Mausman bilong Japan Yujo Okano i givim ol dispela masin i go long Minista bilong Transpot na Woks, Peter Yama long Me 23 long Mosbi.

WENCESLAUS MAGUN i raitim
Gavman bilong Japan i luksave olsem hevi bilong rot insait long PNG em i wanpela bikpela samting PNG i bungim. Long mekim wok i go het PNG i mas i gat ol gupela masin we i ken stretim na mekim ol nupela rot i go long olgeta hap insait long kantri. Nau yet PNG i no inap long mekim dispela bikos PNG Gavman i nogat inap masin bilong mekim ol rot.

"Mi hop dispela ol masin Japan Gavman i givim yupela bai helpim PNG long mekim ol wok developmen insait long kantri. Na tu dispela pasin mipela i mekim i ken strongim wok bung wantaim namel long Japan na PNG," Mista Okano i tok.

Em i givim bikpela tok tenkyu tu i go long ol wokman insait long Mekenikel Enjiniering bilong dipatmen bilong Transpot na Woks long yusim ol dispela masin long mekim wok.

Long tenkim Japan, Mista Yama i tok dispela em i namba wan taim Japan i helpim PNG insait long dipatmen bilong Transpot na Woks wantaim bikpela mani bilong baim ol masin. Mista Yama i tok em i amamas tru long lukim Japan i mekim dispela na i soim ples klia olsem Japan i luksave long ol wok kamap kantri bilong yumi i mas i gat.

Mista Yama i tok bipo, Japan i helpim PNG long planti ol arapela samting. Tasol i no insait long Transpot na Woks dipatmen. Long 5-pela yia i kam inap nau, Japan i givim PNG samting olsem K22 milion bilong wokim Gerehu Nesenel Hai Skul, K20 milion bilong mekim Mosbi paip wara projek, K99 bilong wokim gen ol wok bilong stretim Mosbi Jenerel Haus sik, K34 milion bilong mekim Tokua ples balus long Rabaul, K15 milion bilong helpim Fores Rises Institut, K9 milion long stretim ol samting bilong tis, stadi na wok long Yunivesiti bilong Teknoloji na Yunivesiti bilong Agrikalsia long Vudal, K10 milion long stretim na kamapim redio Is Niu Briten na planti ol arapela wok we inap helpim tru ol pipel bilong PNG.

"Olsem Minista, mi laik givim tu bikpela tok tenkyu i go long ol wokman bilong dipatmen bilong mi. Mi bilip olsem long taim mi kamap Minista, planti wok i kamap gupela na mipela i wok bung wantaim gut long bringim planti gupela sevis i go long ol pipel bilong PNG," Mista Yama i tok.

Namba wan PNG man long UPNG i raitim 'thesis' long tok pisin

HELEN REI i raitim

WANPELA Linguistic tisa long Yunivesiti bilong Papua Niugini (UPNG), Dicks Thomas i kamap namba tu man long pinisim 'thesis' o wanpela ripot bilong kisim masta bilong arts digri insait long skul bilong lainim kainkain tokples o 'linguistics'.

Narapela man husat i raitim tu 'thesis' long tokples bilong em yet em Profesa John Waiko. Na em i raitim 'thesis' bilong em long tokples *Binandere*.

Mista Thomas em bilong Musau ailan long Niu Ailan provins. Em i pinisim skul bilong em long stat bilong dispela yia. Mista Thomas i raitim pinis wanpela buk bilong Tok Pisin na i kolim dispela buk: "Sot Pela Grama Bilong Tok Pisin".

I luk olsem Mista Thomas i bin wok inap long tri na hap yia olgeta long raitim dispela ripot bilong em. Em i no pinisim olgeta wok bai ol i ken pablisim o wokim kamap wok bilong em olsem wanpela buk.

Long tingting bilong Mista Thomas 'thesis' bilong em i gat

tupela as tingting. Wanpela as tingting em bilong kamapim wanpela stail bilong kisim save long ol toktok yu inap yusim insait long Tok Pisin olsem tok bokis na i no wankain long mining tru bilong toktok. Ol i kolim long Inglis, 'metaphor'. Kain olsem: Bai mi mekim em *kaikai* toktok bilong em yet. Na long narapela hap bilong dispela ripot, Mista Thomas i raitim sampela skul we yumi inap glasim na bihainim long kisim klia mining bilong ol 'metaphor' na yusim gut taim yumi laik toktok o rait long Tok Pisin.

Mista Thomas i tok em i amamas olsem em i namba wan PNG man bilong raitim dispela ripot long Tok Pisin long wanem, Tok Pisin em i wanpela bikpela tokples long PNG. "Tokples em i olsem paia. Na taim yumi no yusim gut Tok Pisin, yumi inap bagarapim yumi yet na planti ol narapela lain," Mista Thomas i tok.

Mista Thomas i bin tisim Tok Pisin long UPNG inap long 18 yia olgeta na em i man i go pas long Tok Pisin long yunivesiti. Em i stap insait long dipatmen bilong "Language and Literature".

Long raitim dispela ripot, Mista Thomas i bin yusim planti ol wok em i tisim pinis wantaim planti ol wok painim em yet i mekim long laibrari na long ol arapela buk em i ritim. Ol narapela saveman tu i bin helpim Mista Thomas. Kain ol saveman olsem, Dokta Nicholas Faraclas na Profesa Otto Nekitel, tupela tisa long UPNG. Ol saveman bilong Tok Pisin long wol na ol narapela tokples kain olsem Tok Pisin long New Zealand na Australia tu i bin glasim wok bilong Mista Thomas.

Tok Pisin em wanpela tokples ol saveman i save tisim ol sumatin long Germany na Amerika (USA) tu. Tok Pisin em wanpela tokples ol man i kamapim long helpim ol yet long wanem tingting ol i gat bilong mekim ol samting. Tok Pisin i stap long Solomon Ailans na PNG.

Panti ol lain i yusim Tok Pisin long wanem, Tok Pisin i gupela na planti lain i painim olsem dispela tokples i helpim ol long autim tingting bilong ol. Mista Thomas i tok, yumi inap developim Tok Pisin long PNG.

Pipel mas bringim developmen

... noken wetim Gavman: Masani

MARK MUNGUAS i raitim

MEMBA bilong Huon Galf, Tukape Masani i tokim ol pipel bilong Mau ples insait long Zaka Seket long Morobe distrik olsem: "Sapos yupela i laikim developmen, yupela yet i mas wok bung wantaim Gavman. Yupela i noken slip o sindaun nating na singaut tasol long developmen."

Mista Masani i mekim dispela toktok taim em i opim nupela haus lotu bilong ol lain long Mou. Em i tokim ol pipel bilong Mou long opim ai na lukim planti ol hevi i stap insait long Morobe distrik. Wanpela bilong ol dispela bikpela hevi em hevi bilong rot. Em i tok, i nogat gupela rot bilong kisim ol sevis i go insait long planti ples i stap long we long taun.

Mista Masani i tok tu olsem em i bilip wok bilong Sios em i wanpela bikpela samting long laip bilong man. "Sios i save helpim long kamapim gupela kristen famili na dispela ol kristen famili i save kamapim gupela komyuniti," Mista Masani i tok. "Long dispela as yumi olgeta i mas wok bung wantaim long strongim kristen pasin na wok bilong Sios."

Em i tenkim ol wokman bilong Luteran Sios na i tok: "Luteran Sios i bin bringim na kamapim planti bikpela na gupela sevis long Morobe. Pasin nogut inap go bikpela tru sapos ol wokman insait long Sios i no bin skulim ol pipel long bihainim gupela kristen pasin."

Em i tok wanem samting ol pipel i mas i gat, em developmen bilong man na Sios. "Ol pipel i mas i gat gupela tingting na pasin bai ol inap kamapim gupela sindaun



Wanpela kendidet bilong Midel-Ramu ilektoret long Madang provins Michael Mimp (namel) wantaim ol sapota bilong em i raun stretim ol wok bipo long ileksen. Foto: James Kila.

long ples, na kantri bilong yumi," Misat Masani i tok.

Mista Masani i givim K5000 olsem helpim mani long strongim wok bilong ol bilipman long Mou. Gavana bilong Morobe Provins, Jerry Nalau, na Het bisop bilong Evanjelikel Luteran Sios bilong Papua Niugini Sir Getake Gam i bin stap tu long dispela bung. Bisop Gam i blesim dispela nupela haus lotu.

Moa yet, Katolik bisop bilong Lae, bisop Henry van Lieshout i bin blesim tu sampela nupela klasrum bilong Santu Patrik Komyuniti Skul insait long Ten Siti long Lae long wik i go pinis.

Bisop Henry i tokim ol kristen

lain olsem pasin bilong kisim save em i wanpela bikpela samting long laip bilong olgeta manmeri na pikinini.

Narapela bikman i stap long dispela kibung Bart Philemon i amamas long lukim Katolik Sios i bringim moa sevis i go insait long ol komyuniti na i helpim wok bilong developmen wantaim Gavman.

Mista Philemon i givim bikpela tenkyu tru i go long Katolik Sios bilong sapotim Gavman insait long planti kainkain sevis na wanpela bilong ol dispela sevis em long givim save o edukesen long ol pipel bilong PNG. Em i salensim tu ol skul pikinini long yusim dispela sevis gut bai ol inap painim gupela sindaun long bihain taim.

Trukai statim namba wan rais de

LONG LAS mun, Trukai Indastris PTY LTD i kamapim namba wan rais de long Bugandi. Ol i mekim dispela bihain long sampela taim bilong mekim sampela wok painim long glasim kainkain rais.

Ol i bin mekim dispela bung long Bugandi Hai Skul we planti samatin, tisa na ol lain i gat laik long lukim ol samting long dispela de i kam bung.

FAY DUEGA i raitim Ol lain i kam bung i gat sans long lukim kainkain rais, stail bilong planim na kukim. Ol i lukim tu ol kainkain masin ol man i ken yusim bilong mekim rais.

Bugandi rais projek em i namba wan projek long Morobe provins we Trukai Indastris i kamapim. Dipatmen bilong Agrikalsa long Bugandi Hai Skul i givim tu hap graun i go long Trukai Indastris long planim rais. Ol lain bilong Trukai Indastris bai yusim dispela blok long skulim ol sumatin long we bilong planim rais. Dispela we bilong skulim ol sumatin i ken helpim ol long kisim save na skulim ol lain long ples tu.

I gat wangepa skul bilong skulim ol lain long planim rais

long Lae. Ol sumatin na ol arapela lain inap kisim save long skul, long video na long pasin bilong kuk. I gat wangepa laborotori tu i stap we ol save-lain ol i kolim ol long 'agronomists' i wok long en. Ol lain long dispela senta i wok long sait bilong planim rais na testim graun sapos i gutpela bilong planim rais o nogat.

Trukai Indastris i luksave olsem ol i mas kisim save long ol narapela lain long planim rais. Long dispela as, ol i givim bikpela sapot mani i go long PNG International Rice Research Institute (IRRI) long Philipines Rice Research and Training Program. Bikos long dispela program, PNG nau bai i gat ol saveman bilong em yet long planim, lukautim na kamapim gutpela rais.

Long wankain taim, Trukai Indastris i save salim foapela kain rais. Ol i save salim 'Trukai' lida bilong brend, 'Power' namba tu brend, na 'Sunlong' ol i kolim long 'recipe' rais wantaim 'Trukai' natural brown'. I luk olsem planti lain long PNG i gat bikpela laik long olgeta dispela rais. Planti lain long PNG i mekim rais i kamap namba wan kaikai bilong ol.



• Ol wokman pulim masin long brukim graun bilong planim rais long Bugandi hai skul, Lae.

Moa bisnis kirap long Milen Be

ALOTAU taun long Milen Be provins i lukim sampela gutpela wok kamap long sait bilong bisnis insait long 5-pela mun long dispela yia.

Namba wan wok kamap i bin stat long mun Februeri long taim Stimsips Treding kampani i tekova long wangepa hadwe stoa bilong Masurina Limited, wangepa asples kamapani. Long wangepa sait, planti pipel i ken tok ol ino wanbel long wangepa ausait kampani i tekova long wangepa lokol kampani. Long narapela rot, em i gutpela bikos bikpela kampani olsem Stimsips i kam bek long Milen be, ples we kampani i bin krugutim long kam nambawan taim insait long PNG long planti yia i go pinis.

Long dispela wik Tunde, nupela bekeri o ples bilong wokim bret i bin op long namel long Alotau taun.

Dispela nupela bekeri em ol i kolim long Fifita Tasty Bake. Wangepa bisnis man bilong asples Milen Be husat i papa bilong Fifita Traders kampani i patna wantaim Stimsips Trading kampani na sanapim dispela bekeri. Dispela em namba tu bekeri long Alotau taun. Narapela em Alotau Beker.

Nupela bekeri bai i kamapim namel long 100-150 lof bret long wangepa de. Bekerai bai i kamapim supasof, holmil na ol arapela kain bret moa. Holmil bret i ken stap long tripela na i no go bagarap. Ol i makim dispela bret long ol kastoma long provins bikos planti pipel i nogat pawa, lait na aisebokis long putim ol samting long en na ol i stap longpela taim na i no go bagarap.


Nigel Harkness husat nau i bos long Tasty Baka bekeri long Badili insait long Mosbi i kisim wok olsem bos long dispela nupela bekeri.

Long redim ol man long wok long bekeri ya, kampani i bin salim tupela wokman bilong em i kam long Mosbi na ol i skul long 8-pela mun bilong skruim save long dispela wok.


Mista Harkness i tok nupela bekeri bai i stat long wokim bred na kek, tasol long bihain taim, bai ol i bekim tu ol mitpai.

Em i tok tu olsem Fifita Tasty Bake bai i kisim oda long ol bret na kek samting long ol autstesen na ol ples longwe long taun.

Ol meri ting wanem? MERI LONG PALIMEN



NEM: Saivan Kombena
AMAS KRISMAS YU STAP LONG SITI?: 19
PLES: miks Morobe/Oro
SKUL: Gred 10
WOK: Nogat wok
MARIT O SINGEL: Singel
TINGTING: Em i gutpela tru. Ol meri i mas i gat nem na maus long palimen. Senisim sampela man.




NEM: Benedicta Giau
AMAS KRISMAS YU STAP LONG SITI?: 4
PLES: Rabaul
SKUL: Gred 10
WOK: Nogat wok
MARIT O SINGEL: Singel
TINGTING: Mi ting olsem ol meri tu i mas stap long palimen. Bikos nau ol man i stap na ol i no save wokim gutpela wok. Mi ting olsem sapos ol meri i stap, bai nogat hevi i kamap long yumi. Kain ol hevi olsem raskol, brukim haus na stil, rep na planti moa.



NEM: Vero Yan
AMAS KRISMAS YU STAP LONG SITI?: 6
PLES: Sepik wara
SKUL: Gred 10
WOK: Benk opisa
MARIT O SINGEL: Singel
TINGTING: Mi laikim ol meri long palimen. Tasol mi no laik ol i pait namel long ol yet. Ol i mas tingting na sanap olsem ol meri i laikim ol mama bilong famili long PNG.



NEM: Anne Simukai
AMAS KRISMAS YU STAP LONG SITI?: Moa long 30 yia
PLES: Yule Ailan/Kairiku
SKUL: Gred 10
WOK: Su Stoa Menesa
MARIT O SINGEL: Marit na i gat 5-pela pikinini. Tupela i marit na tripela i skul
TINGTING: Em taim nau bilong ol meri i kisim sia na wok lida. Ol meri i mas senisim ol man. Bikos ol man lida i save gridi na paulim mani bilong ol pipol. Mi laik ol meri i win i mas go insait long Gavman sait. Na senisim sampela gridi tingting bilong ol man. Sapos ol meri kamap Praim Minista tu bai i orait.



NEM: Helen Labeli
AMAS KRISMAS YU STAP LONG SITI?: 17
PLES: Misima Ailan
SKUL: Gred 9
WOK: Skul yet
MARIT O SINGEL: Singel
TINGTING: Em i gutpela long i gat meri long palimen. Bikos em bai mekim ol gutpela disisen bilong helpim ol pipel bilong PNG. Na tu em bai i stap long palimen na tok pait long hevi bilong ol pipel na i no inap raun raun nating o paulim mani na taim ilong wok Gavman long i go long narapela kantri na mekim praiwet bisnis bilong em. Mi tok strong olsem mas i gat gutpela meri wantaim kristen pasi long palamen.



NEM: Alu Simaliong
AMAS KRISMAS YU STAP LONG SITI?: 20
PLES: Morobe-Wain
SKUL: Tisa Koles
WOK: Komyuniti Skul Tisa
MARIT O SINGEL: Marit
TINGTING: Nau em i taim yumi mas lukluk gut na traim long votim ol meri i go insait long palimen. Amas yia ol man i stap long palimen ol i no harim kra i bilong ol meri. Ol meri i ken luksave long hevi bilong kantri olsem mama i luksave long hevi bilong famili na traim long stretim. Nau long dispela ileksen, planti meri i mas win na go long palimen.

Ol "whistle blowers" i gat wanem ples long sosaiti?

Korapsen o pasin nogut i olsem wanpela bikpela sua i wok long kaikai famili, ples, na kantri bilong yumi. Planti bilong yumi i karim bikpela pen. Na planti moa i dai.

Insait long olgeta dispela pen, yumi painim kainkain rot, dokta na marasin bilong stapim na pinisim dispela sik nogut ol i kolim korapsen. Ol Lotu lida, na ol misinari i autim tok bilong God. Ol tisa. Ol lapun long ples. Ol lida long sosaiti na kainkain ogenaisesen i kamap na i traim long skulim yumi. Kainkain man long kainkain ples na taim i yusim kainkain samting bilong traim long stapim korapsen. Tasol korapsen i no pinis. Watpo?

I luk olsem graun em ples bilong korapsen. I luk olsem yumi mas kamap wantaim korapsen na dai wantaim korapsen. Yu ting wanem?

Sapos yu save olsem pasin ol man i mekim i nogut bai yu mekim wanem? I luk olsem yu mas kotim ol o tokim ol long stapim pasin nogut bilong ol.

I no long taim i go pinis, sampela lain i kamapim wanpela grup ol i kolim Transparency International. Dispela ol lain i

laik stapim pasin nogut. Gavman i kamapim tu Ombudsman Commission bilong kotim ol lida long palamen sapos ol i painim ol lida i mekim pasin nogut taim ol i stap olsem lida yet long palamen. Planti taim ol lida i save go fri bikos ol i save risain. Taim ol i risain, leadership tribunal i no inap kotim ol moa. Olsem na pawa bilong

taim. Tasol yu no inap trikim olgeta man olgeta taim.

Taim yumi go het na tokaut long pasin nogut: olsem i bin kamap pinis long hevi bilong baim ol praiwet ami bilong Sandline. Gavman i kirap na holim sampela bilong yumi na kalabusim yumi. Yu ting em i sev long kamap "whistle blowers". Husat inap pait long stapim Gavman long mekim dispela? I luk olsem yumi i mas i gat moa matry long PNG, sapos yumi laikim bai i gat planti "whistle blowers". Sapos Gavman i no inap rispektim mama lo we i givim yumi ol pipel bilong PNG fridom bilong toktok na autim bel hevi bilong yumi long ol samting i no stret, na i redi long kalabusim yumi, bai yumi go we?. Long 1992, Gavman i toktok long kamapim wanpela independent anticorruption authority. I kam inap nau ol i no mekim. Em bai olsem wanem? Inap nupela Gavman i go insait long Julai i mekim dispela? Yumi mas i gat "whistle blowers" tasol Gavman i mas rispektim mama lo na larim ol "whistle blowers". Plis nupela Gavman, mekim gutpela disisen.

GLASIM POLITIK wantaim WENCESLAUS MAGUN

Ombudsman tu i no strong moa taim ol lida i risain.

I luk olsem Nesenel Alaiens Pati i kamap wantaim wanpela tingting bilong hapim pe bilong ol politisen taim ol i kisim Gavman. As tingting bilong polisi bilong ol em bilong stapim ol politisen long no ken mekim pasin nogut. Yu ting ol politisen bai stap taim ol i hapim pe bilong ol? Yu ken trikim dok long kaikai bun i gat marasin nogut bilong kilim dok. Tasol yu no inap trikim man. Yu ken trikim sampela man sampela



□ Ol gutpela lain bilong lukautim ileksen long Namatanai i sindaun redi long ileksen i stat.

Inap Papua Niugini i soim ol arapela kantri olsem mipela i no save pait long lotu? Las mun, mi bin glasim ol pait na woa insait long wol. Mi tok lukaut long yumi long PNG. Noken kirapim pait namel long yumi yet.

Bikos yumi wok long paul nabaut na bihainim kainkain lotu. Yumi mas lukaut, nogut yumi pait insait long famili bilong yumi yet. Na famili bai bruk bruk. I tru olsem planti ol pait o woa insait long wol i kamap namel long ol kainkain lotu. I gat 23 woa olgeta nau i stap, stat long 1948 i kam inap long 1997.

Wanpela lotu i no laikim arapela na ol i laik rausim ol. Sapos ol i traim long rausim ol na i no inap, i luk olsem ol i save statim pait. Na ol Muslim tu i pait namel long ol yet olsem ol kristen. Opim ai na lukim olsem ileksen i kamap nau long planti ap bilong wol. Long wankain taim, PNG tu i redi

long go long nesenel ileksen stat long Jun 14. Long wankain taim pait i kamap yet long planti kantri.

Long dispela wik tasol, ol brata bilong yumi long Indonesia i pait na kilim ol yet i dai. Ol i no pait long ileksen tasol. Nogat. As tru bilong pait bilong ol em bikos ol i kros namel long lotu bilong ol. Samting olsem 79 man i dai pinis long dispela pait. Ol Muslim (Islam) i kirapim dispela pait. Tasol tingim, God em i no God bilong bel hat hariap. Bilong wanem bai Em i kirapim bel bilong ol man long pait? God i no laikim ol pikinini bilong Em long pait long lotu. Yumi mas soim wol olsem yumi save tok pait. Tasol yumi save

GLASIM LEWA na TINGTING

wantaim
Eddie
Saunders



rispektim tu ol arapela bikos yumi olgeta i bilip long wanpela God bilong yumi olgeta. Yumi lotuim Em long kainkain we tasol.




No ken bihainim ol arapela kantri na statim pait nating. Na lukaut gut long dispela ol lain i save statim pait na kros long God. God i blesim PNG wantaim bel isi bilong Em.




• LEPHAN: Ol plastik ruf haus long Hartisheik kem bilong ol refuji. Bikos long hevi bilong mani long baim ol nupela plastik long kisim ples bilong olpela we i bagarapi pinis, ol pipel i stap yet long ol dispela we i bagarap. Ol kain haus em ol i bin sanapim 8-pela yia i go pinis taim ol i go sindaun pastaim long kem.

• ANINIT: Ol pikinini bilong Hartisheik refuji kem long Ethiopia. Stat long 1988, ol pipel bilong Somalia i roinawe lusim kantri bilong ol bikos long pait na sindaun i bagarap long kantri bilong ol. Hartisheik kem wantaim moa long 59,000 pipel long em em i bikpela refuji kem long wol. Nau ol refuji long kem ya i tok nogat lain i lukluk tumas long ol bikos long pait na hevi insait long ol arapela kantri long Afrika olsem Zaire na Tanzania. Kem i sot long wara, kikai na ol plastik ruf long ol kanvas haus i bagarap. Yunaitet Nesens Hai Komisin bilong ol Refuji (UNHCR) i bungim hevi long mani na em i hat long lukautim ol refuji.

• RAITHAN: Ol lain bilong kantri Zaire i soim ol pepa mani long ples klia long soim olsem ol i no wanbel long harim olsem nupela gavman we i tekova long olpela Presiden Mobutu sese Seko long dispela mun bai i givim ol nupela mani gen long kantri i yusim. Long taim bilong Mobutu, kantri i bruk long tripela zon o hap na wan wan long ol i yusim narakain mani. Zaire i wok long bungim hevi long mani bikos stat long 1990 taim gavman i givim tok orait long sampela praiwet bisnis long wokim na prinim mani. Wanem samting ol dispela lain i mekim em kwik-taim ol i kisim i go insait long kantri ol kontena wantaim bengnot we ol i prinim ausait long kantri na senisim i go long mani bilong Zaire bipo long eksens reit i pondau. Nau velu long mani bilong Zaire i go daun olgeta. Ol papa bilong ol stoa long Kinshasha i belhat na long yia 1993, ol i no laikim nupela mani. Dispela i mekim na ol soldia long kantri i go bagarapim ol stoa. Nau yet, ol asples pipel i no wanbel long senis insait long gavman we senis i kamap gen long nupela mani.





• LEPHAN: I no wanem. Tupela man ya em ol brata ya tasol wanpela i blek na nara-pela em i waitskin. Long hankais em Wayne Leal na long hansut em Paul Koutny. Tupela em wanmama husat i miks Afrika na Karibien Tasol tupela i no wan papa. Wayne em papa miks Afrika na Karibien taim Paul em papa i waitman bilong Sekoslovakia long Isten Yurop. Wanem samting i no wankain long tupela em Paul husat papa bilong em i waitman na em yet i luk moa waitskin i karim binatang bilong sik ol i kolim long sikel sel animia taim Wayne i nogat. Dispela sik em ol i ting em sik bilong ol blakman long Afrika na Karibien bikos ol lain long hapsait tasol i save kisim. Tasol i luk olsem nau planti waitskin pipel i wok long kisim. Long ol ripot, wanpela long 10-pela manmeri bilong Afrika na Karibien i karim binatang we i kamapim sikel sel animia. Long dispela sik ol binatang we i luk olsem sikel, (wanpela binatang i luk olsem sotpela naip ol i tanim bilong katim gras o rais samting) i save blokim oksisen i go long olgeta hap long bodi bilong man. Taim dispela samting i kamap, em i save pasim blut na kamapim ol hevi olsem man i no inap wokabut, bagarap long sampela hap long bodi bilong man, hat atek na ol kain sik olsem. Moa long 20 krismas i go pinis, planti pikinini we mama i karim wantaim dispela sik i save dai tasol long tude, i gat marasin bilong em na planti pikinini i kamap orait. Samting tru we ol dokta na ol saveman i luksave long en tude em sik ya i no stap tasol long ol blak-skin man, nogat. Em i wok long daunim ol waitman tu.





KAIKAI

INDAS

STRI



Saplimen



NISIT i bringim long PNG toksave bilong nupela teknoloji

YU SAVE long ol senis i wok long kamap long wol?

Yu save long stendet na konfomens bilong Asia Pasifik Ekonomik Koperesin (APEC)?

Sapos yu no save oke dispela em samt- ing yu mas save.

Bikos Papua Niugini em i wanpela memba kantri bilong APEC, em i mas bungim wanem samt- ing APEC i laikim long stendet na konfomans.

Dispela i go wantaim wanpela gol long fritred na invesmen long dispela rijon we kantri i mas bungim inap long yia 2010 long industrial ekonomiks na long yia 2020 long developim ekonomi we PNG tu i stap insait. Em i min olsem long yia 2020 olgeta samt- ing ol i wokim long PNG bai i resis wantaim ol guds na sevises bilong ol narapela kantri.

Sapos PNG i laik sanap strong long dispela resis, ol prodak bilong PNG i mas bihainim ol ol gutpela stendet. Sapos nogat ol guds na sevis PNG i wokim bai i painim hat long maket insait long kantri na ovasis wantaim.

Long helpim long bungim ol dispela samt- ing APEC i askim long en NISIT i gat ol samt- ing we i ken helpim.

1. NISIT infomesin senta.

Dispela infomesin senta i holim 5000 stendets, we i gat olgeta set intanesenel (ISO, IEC, CAC) Britis, Australian, Nu Silan na Papua Niugini stendet.

Nau yet senta i save givim dispela ol kain sevis olsem;

- Givim ol nupela infomesin stret long ol stendet;
- helpim ol man long painim rait stendet;
- Kisim ol infomesin long ol lain i askim taim dispela infomesin i no stap long senta;
- Givim ol infomesin long ol wan wan subjek eria.

2. Calibresin sevis

Wanpela rum bilong makim o skelim ol stendet ol i kolim "measurement standards laboratory" (MSL) i save givim kalibresin sevis bilong lukluk long ol samt- ing ol indas- tri na ol narapela lain i laikim. Dispela ol sevis i lukluk insait long referens meses stat long 1 mg i go long 30 kg na samt- ing bilong skelim ol tempritsa (mekuri insait long glas temomita, platinum, resistens temomita, temokopel na ol narapela sensa) i stap namel long 30 C i go long 15000 C.

3. Laboratori akreditesin sevises

Dispela eria i save helpim ol lebarotoris long go wantaim Intanesenel Stendets. Dispela i save kamap long skelim ol dispela sistem we i stap na i lukluk long stretim ol samt- ing bilong rejistarim ol lebarotoris.

4. In-haus trening

NISIT i save givim in-haus trening long ol wokman meri bilong en na ol husat man meri long ol narapela ogenaisesin i laikim. Ol trening i save givim bikipela lukluk long ol Stendet na Gaidlain long ol yus bilong dispela stendet.

5. Sels

Ol i ken baim Papua Niugini, Australia na Nu Silan stendet long sels-senta na ol nara- pela nesanel na intanesenel stendet ol i ken odarim sapos ol i askim.

IFC tingim ol wokman meri long fri plet kaikai long belo

... Besta tinpis em abus tru ya wantaim kumu

JAMES KILA i raitim

INTANESENOL Fud Koporesin Pty Ltd, kampani husat i save wokim Besta na Supreme tinpis long Malahang, Lae, Morobe provins i stat pinis long givim fri plet kaikai long ol wokmanmeri bilong en.

Ol wokman meri i save kisim fri plet kaikai olsem rais, tinpis na kumu olgeta de bilong wok.

I gat samt- ing olsem 1,000 wokman meri i save wok long fektori bilong IFC long Malahang. Dispela kain halivim long strongim na developim bodi na tu givim gutpela tingting long het i ken bringim gutpela sindaun long halivim wokmanmeri insait long wok na kantri olgeta.

Insait long wanpela nius- leta bilong IFC, kampani i tok olsem olgeta taim ol i save lukluk long bihainim stret ol gutpela na stret- pela pasin. Lukluk i go het kampani i ken lukim olsem dispela tinpis fektori i narakain olgeta long ol narapela fektori.

IFC i gat strongpela bilip tru long kamapim gut moa wok na i laik ol wok operesin bilong en long olgeta divisen na seksin i mas stap gut. Wanpela tok- piksa em olsem long sampela mun i go pinis menes- men bilong IFC i mekim nupela senis pinis long daunim stim o simuk i kam



• Ol wokmeri bilong IFC skelim rais, tinpis na kumu long belo.

long hot-wara. Dispela i mekim ples bilong wok i kamap kol na ol wokman meri i kisim gutpela win.

IFC em i wanpela nupela kampani nau i stat long wok insait long PNG tupela yia olgeta. Tasol em i raitim pinis ol tems na kondisen na ol dispela hap pepa i tok klia long lo na pasin ol wokman meri i ken bihainim na mekim gut wok. Dispela hap pepa i wankain tasol olsem ol narapela fud kampani i save bihainim long PNG.

Olgeta wokman meri i mas kisim gutpela trening na i gat moa save long ol lukautim gut masin na prodaksin wok insait long fektori.

Fultaim trening opisa

Nau yet IFC i gat wan- pela ful-taim trening opisa na operesinol manuel o buk em ol wokmanmeri i skul long en na save long wok.

Long karimaut trening wan wan prodaksin dipat- men o fektori (masin i stap

long en) i gat wan wan trening opisa na job instrak- ta husat i go pas long skulim ol wokman meri i ken save long en.

Gutpela trening i no halivim tasol ol wokman meri long skulim moa, nogat, em i halivim ol tu long lukautim gut sindaun na bosim skin bilong ol yet.

IFC i gat trening long sefti, haegin o gutpela ples bilong sindaun, kaikai na wok na slip, taim-menes- men na komunikesin skil.

Nupela fes-eid plen long IFC


JAMES KILA i raitim

FES EID Komiti bilong Intanesenel Fud Koporesin i kamap pinis wantaim ol strongim tru wok bilong imejensi yunit bilong en.

Dispela yunit wok bilong en em long hariap long stretim wari bilong ol wokman husat i kisim bagarap, sevim laip na tu stopim ol wokman meri long kisim ol bikipela bagarap long wok-ples.

Fes eid kodineta, Mista Yaosa Kaikar i tok olsem fes-eid i stap olsem wan- pela samt- ing olgeta man- meri i mas save long en. Em i isi long lainim na bai i halivim long lukautim laip long taim bilong birua na tu long halivim long stretim ol bagarap i kamap long bodi. Sapos ol manmeri i lainim gut ol i ken stopim ol birua long kamap bihain.

Mista Kaikar i tok 5-pela fes-eid stesin i bin kamap




• Mista kaikar i givim marasin long wanpela wokmeri long IFC Fes - eid stesin.

long ol eria insait long keneri long givim halivim bilong marasin long ol wokman meri husat i

pinim sampela hevi bipo long ol i go long ol rejista nes o dokta, Nau yet 15- pela lain wokman meri i

bin pinisim pinis wanpela fes-eid trening kos we IFC Fes-Eid komiti i bin ronim.

Introducing White Sugar



RAMU
SUGAR

“Natural as Life”

IFC bungim planti senis insait long tupela yia: Raja

JAMES KILA i raitim


INTANESENOL Fud Koporesin (IFC), kampani husat i go pas long wokim Besta na Supreme tinpis long Malahang insait long Lae i bin bungim planti ol gutpela senis insait long wanpela yia bilong operesin bilong en.

Sif Eksekutiv Opisa bilong IFC, Raja Abd. Aziz Raza Musa i bin mekim dispela tok-tok wantaim *Wantok Niuspepa* las wik.

Mista Raja i tok insait long las 12-pela mun IFC i bin mekim bikpela wok long sait bilong trening o skulim ol wokman meri long wok insait long prodaksin plant.

Em i tok tu olsem IFC nau i gat wanpela ful-taim trening opisa husat wok bilong em bai lukluk long karimaut ol trening o skul insait long fektori yet na tu long ol spesel program bilong ol supavaisas. Insait long las wanpela yia i go pinis 140 wokman i bin kisim trening.

Mista Raja i tok olsem bikpela as wok bilong ol dispela trening em long mekim fektori long IFC i mekim moa wok prodaksin, ron stret wantaim mani na bikpela samting em long winim resis insait long ekonomi.



• Prodaksen lain lida Rhonda Wapeya i sekim olsem yunifom i mas stret long wanwok bilong em.

Maket bilong IFC

Lukluk bek long namba wan taim IFC i statim prodaksin bilong en, i bin gat bikpela win tru i kamap.


Mista Raja i tok, IFC i bin salim moa prodak bilong en na i winim moa long 110 pesen sels mak.

Long bekim toktok bilong *Wantok Niuspepa* long ol kompetisen resis IFC i bungim, Mista Raja i tok olgeta dispela

kain pasin i stap long tingting bilong kampani yet.

"Pasin bilong mipela i olsem, i tru olsem mipela em wanpela mekerel keneri tasol mipela i no egens long kompetisen," Mista Raja i tok.

"Kompetisen em i helti o gutpela, tasol mipela laik sampela was i kam long gavman. Dispela em bikos mipela i bringim planti investmen i kam long PNG. Olsem na mipela



• Mista Raja

laik go long level bilong kompetisen we mipela i ken resis wantaim ol narapela prodak, kampani o ogenaisin husat i stap long ovasis," Mista Raja i tok.

Em i tok olsem i gat taim bai kam we IFC inap resis wantaim ol long open-maket. Tasol long nau yet ol i wok aninit long planti presa. Dispela em bikos kain pasin bilong wok hat bilong ol wokman meri long PNG.

Dispela em sapos yu skelim wantaim kain wok ol wokman meri long kantri olsem Malaysia na Thailen i mekim.

PNG i gat samting olsem 40 i go 50 pesen produktiviti level, olsem na IFC i wok hat long bringim ap dispela pesen.

Mista Raja i tok ol i gat wanpela kwaliti eria we ol i save karimaut ol trening.

Halivim IFC i givim

IFC i bin givim planti ol kain invesmen o ol spin-of benefit o halivim long manmeri na ekonomi bilong Morobe na PNG.

IFC i kisim moa long 1,000 manmeri long wok long fektori bilong en long Malahang.

Kampani i save kisim planti ol saplai bilong en long lokal maket. Sampela bilong ol dispela samting em ol katen, ol mak o lebel bilong ol prodak, ol pepa bilong edvataising.

IFC i givim halivim tu long baim sekuriti sevises, benk sevises, wok bilong rausim pipia o rabis.

Em i halivim tu long givim ol liklik manmeri ol rot bilong painim moni ol yet bihain long wanpela liklik maket i bin kirap long Malahang.

Mista Raja i tok long namba wan taim tru taim em i kam long Malahang eria i no bin gat maket i stap. Ples i bus karamapim olgeta.

Tasol nau sapos yu go olsem long Malahang, i gat dispela kona maket i stap we ol manmeri husat i wok long IFC na ol narapela wok long hap i save go na baim ol kaikai na narapela ol samting.

Em gutpela Em Besta!



Mipela save kukim gutpela Mackerel long stail bilong PNG stret, olsem na femili bilong yu bai laikim tru nupela teis bilong Besta.

Tinpis bilong PNG stret . . .



Tanubada Fud Prosesing strongim wok bilong en long Kamkumung


JAMES KILA
i raitim

TANUBADA Fud Prosesing i bin statim operesin bilong en olsem wanpela teltrapak UHT bilong milk stat long 1985. Dispela em i stap insait long wok bilong fud prosesing indastri.

Olgeta ol dispela kain prodak ol i wokim long PNG i save stap long fektori bilong kampani long Kamkumung insait yet long Lae siti.

Planti ol wok em i save wokim i stap aninit long kontrak ol kampani olsem SP Holdings, Coca Cola Amatil na Pacific Industries i save askim long en.

Oi i save pekim tu ol narapela ol liklik prodak we ol i save salim i go stret long ol holsela na ol supamak. TFP i save kisim ol sekap bilong en olgeta taim i kam



• Masap Poange i dravim foklif long Tanubada Food Prosesing. Foto: James Kila.

long ol ovasis kampani olsem Vitasoi Intanesenel Holding na Coca Cola. Dispela em long mekim ol amamasim ol kamtoma bilong ol, olsem ol i wokim ol gutpela prodak long stendet ol ovasis i wokim disain long en long wokim na ol kastoma i ken baim.

Menesa bilong TFP, Rod O'Brian i

tok olsem bipo ol i save baim ol milk prodak bilong ol long Niu Silan. Dispela em i wanpela bikpela gret bilong milk paura we i save kamap long bungim na givim strongpela hot tritmen.

Bihain ol i save stretim gen ol milk insait long lebratori bilong ol yet long fektori long

testim kwaliti bilong milk.

Bihain long dispela i kamap gutpela tru long mak ol i save pastaraisim milk long daunim namba bilong milk long daunim namba bilong ol "bags" we i save stap long milk. Oi i save testim gen dispela long kwaliti na bihain milk i sae homoje-naised na ol i save

steralaisim at 140 digri and bihain ol i save kolim gen long pekim i go insait long Tetra Pak Aseptik katon.

Dispela ol samting i kam long Australia insait long ol rol we i gat 4000 pek long wanpela rol. Dispela pepa i save stap insait long TBA Failing masin na pepa i save go steralais taim ol i



• Oi wokman bilong Tanubada Food Prosesing i redi long karim ol prodak i go long ol kastoma. Oi lain i sanap em Gerson Kerake (daunbilo), Ponege Tende na Moses Ruru(antap).

kapsaitim wanpela kain marasin ol i kolim Peroxide, na bihain ol i save hatim peroxide taim dispela pepa i go olsem long rot bilong elemen bilong hatim we i save stap olsem 480 digri selsius. Dispela paket i save kisim seip bilong en,


na bihain ol i save pulumapim na pasim maus bilong en long masin.

Dispela paket i save go gen insait long wanpela Fainel Folda we i save foldim ol sait bilong en long masin na bihain salim i go long riteil sekta.



Tanubada Food Processors Pty Ltd


"Tanubada Food Processors are the only producers of UHT products in Tetra Pak packaging in PNG. We are able to supply locally, Milk and Fruit Juice products at very competitive prices as they are all produced here in Lae.



We will supply large or small orders direct to the wholesaler or direct to a Caterer or Site.

For more information please contact TFP for an up to date product guide and price list."

P.O. Box 1369, Lae. M.P. 411, Papua New Guinea.
Telephone: (675) 472 3800
(675) 472 3996
(675) 472 3395
Facsimile: (675) 472 1745



PHOTOCOPY

Musik bilong Paramana kik moa long Tumbuna Trak

JAMES KILA i raitim

WANPELA man husat i save soim stail bilong em long pilai lid gita bilong Paramana Strangers bipo, Vali Rai i katim pinis kaset bilong em wantaim Tumbuna Trak Studio long Madang.

I tru olsem dispela kaset i karim yet nek na melodi bilong Paramana, tasol musik stail bilong Tumbuna Trak i mekim em i sanap narakain liklik long ol narapela Papua musik long maket.

Dispela nupela kaset bilong Vali Rai taitel bilong en "Sounds of Paramana" i gat planti ol gutpela singsing we i ken winim lewa bilong ol lain Papua bilong Aroma Coast na Rigo husat i lusim ples na wok nabaut long Niugini sait.

Wanpela singsing long tokples Rigo, Vali i raitim em E Sinagu na narapela em long tokples Hula Anopara. Ol song i mekim planti ol manmeri bilong Rigo na Hula i salim tingting long ples ating?

Narapela ol singsing we i gat kik long en em Ples Paramana na Singel Boi. Planti ol liklik mangi long Kristen Pres long Nagada i save long dispela song Paramana. Sapos yu raun long hap bai yu ken harim ol singsing insait long mangoro ol taim ol i pul kanu long basis bilong Nagada.

Wanpela song long kaset Lau 21 la i stori long wanpela famili i gat 21 pikinini long femili. Wanpela kandere bilong Vali i askim em na em i raitim song long singim long album bilong em.

Vali i mekim pinis tupela vidio klip pinis. Tupela klip i wokim pinis em Sinagu E na Anopara. Ol klip ya em i mekim long Nagada basis na i soim stail nambis na lain kokonas bilong Madang stret. Yu yet skelim.

Vali i tok em i dediketim dispela kaset i go long olgeta yangpela manmeri long PNG na lain Aroma na Rigo i stap nabaut long kantri.

Em i givim bikpela tok tenkyu tu i go long menesmen bilong KPI na Tumbuna Trak olsem Chris Seeto na olgeta musikman long studio.

Vali i stat pilai musik taim em 12 krismas na skul long Aroma praimer skul. Long namba wan taim em i pilai yukulele na bihain em i kalap long gita.

Em i bin stat pilai wantaim grup Paramana Strangers long

Em i save pilai nabaut long ples bilong em long Paramana wantaim ol


mangi long ol pati na singsing nabaut long ol ples klostu.

Nau yet Vali wantaim tupela pikinini meri bilong em Geno na Serah i wok long lainim ol song bilong nupela kaset em i laik wokim.

Vali i stori olsem insait long dispela nupela kaset bai i gat ol song we i gat hap Tok Pisin na tokples Paramana na dispela bai i stail stret.

Nau yet Vali i wok wantaim Kristen Pres long Madang. Bipo em i save wok wantaim Word Pablisng long Mosbi.

Em i marit na stap wantaim 4-pela pikinini bilong em long KPI long Nagada, Madang province.



• Vali Rai.



• Wokman bilong Madang Taun Interim Komisn Chris Walames i sanap wantaim narapela wokman klostu long opis bilong MTIC.

Matmat long Madang taun pulap long daiman bilong setelmen

... olsem na ol papagraun les long givim graun

JAMES KILA i raitim

MATMAT long Madang taun i pulap pinis na long 6-pela yia i go pinis ol i no planim ol indai manmeri long hap.

Madang Town Interim Komisn i wok hat tru long painim graun long mekim nupela matmat.

Tasol taim ol i laik askim ol asples long givim ol graun ol i painim hat liklik bikos ol lain ol asples i tok olsem dispela matmat long taun i no pulap long ol wokman meri bilong taun. Nogat, planti bilong ol lain i pulapim matmat bilong Madang em ol lain bilong setelmen.

Siaman bilong PNG Len Trensport Bod na deputi siaman bilong Madang Taun Interim Komisn, John Gosiba i tok nau yet komisn bilong ol i painim hat tru long askim ol lokal pipel o papagraun long givim ol sampela

graun long wokim nupela matmat.

Ol asples pipel i tok olsem ol bai i no inap givim graun bikos planti ol setelmen lain i save dai na pulapim matmat.

Mista Gosiba i tok ol asples long Amele na Madang i tok ol i bin givim graun long gavman long mekim developmen long taun, ino long bringim ol setelmen i kam insait long bagarapim sindaun bilong ol pipel bilong Madang.

Dispela hevi namel long ol setelmen i mekim ol asples bilong Amele i les long givim graun long gavman long wokim matmat.

Bihain long Madang taun matmat long Modilon rot i pas, komisn i tok toktok wantaim ol lain long Sek long kisim hap graun long wokim matmat.

Komisn i bin lusim moa olsem

K10,000 long stretim ples long Sek, tasol bihain ol i painim aut olsem wara i no stap longwe taim ol i laik digim hul long wokim ol matmat. Ol bekho i digim graun na bungim wara antap tasol.

Sampela toktok i bin kamap pinis wantaim sampela lain papagraun long kisim graun bilong ol long wokim matmat. Wanpela opisa bilong MTIC, Philip Posanau i wok long pasim toktok yet wantaim wanpela komyniti lida bilong Furan, Job Sogasog long stretim dispela toktok.

Olsem na nau yet ol manmeri o residen bilong Madang taun husat wantok o femili bilong ol i save dai, i save go lukim ol asples na kisim tokorait na baim moni long planim ol dai man long graun bilong ol.

Sampela taim ol i save karim ol dai bodi i go planim long ples bilong ol.

• Liklik Yacob Danip i sindaun pilai wantaim pik bilong em "Killer". Ol i kisim pik ya i kam long Karkar Ailan. Sampela taim pik ya i hangere em i save raunim ol man. Poto: James Kila.





• Taim bilong baim meri long PNG ol lain bilong meri na man i mas redi gut. Ol i mas luk hat long redim planti samting. Taim bilong marit, em taim bilong bikpela amamas.

Wanem samting bai kamap long yia 2000?

...Yumi mas redi

SISTA ESTELLA ANGELES i raitim

YU SAVE glasim ol lain i redi long marit o nogat? Man na meri laik marit i laik bai olgeta samting i mas redi gut. Ol i laik bai olgeta samting i mas stap stret taim ol i marit. Ol samting long haus lotu: baibel rit, musik, dres, flawa olgeta samting. Nogat wanpela samting i mas bagarap. I luk olsem dispela de na taim long laip bilong ol em i wanpela spesel de. Na ol i no inap tingting lus long en. Ol i bin stat long redim ol samting bilong dispela de longpela taim yet. Olsem na long de tru bilong marit, ol i laikim olgeta samting i mas kamap gut na bai ol i ken amamas.

Tingting na laik bilong Pope John Paul II long yia 2000 em i wankain. Em i lukim olsem long yia 2000, God bai salim Holi Spirit bilong em i kam long graun na pulimapim ol man long kainkain we.

Na yumi ol man bai redi olsem wanem, long bungim yia 2000? Long tingting bilong Pope John Paul II, yumi olgeta i mas beten na mekim penens. Pope i laik yumi olgeta i mas lusim ol sin pasin, na bihainim laik bilong God. Em i laikim olsem long dispela bikpela jubili, yumi olgeta mas i gat strongpela bilip long God na holim strong pasin God i laikim. Pope i laikim yumi soim gutpela pasin God i laikim long ol narapela manmeri na pikinini maski long wanem taim na hap yumi stap.

Prea em i no taim yumi glasim tasol ol pasin nogut na gutpela pasin yumi i tingting, toktok na mekim long litimapim na tenkim God. O mekim ol pasin God i laikim. Prea em taim yumi larim God i go pas. God i kam bihain. Na God i stap insait long olgeta samting yumi mekim olgeta de na taim long laip bilong yumi wan wan. Yumi mas i gat taim long harim God i toktok long yumi.

Prea em i rot bilong kisim grasia bilong God. Grasia em i blesing God i ken givim yumi. Jisas em yet i go pas na i soim yumi pasin tru bilong prea. Jisas i prea em yet na wantaim ol narapela. Em i prea long bik moning tru na long bik nait. Em i prea taim em i hangri, bipo long em i kaikai, bipo long em i mekim ol mirakel na taim satan i traim em. Jisas i save long pawa na wok bilong prea. Jisas i prea bikos prea em i laip lain bilong em. Prea i bungim em wantaim papa bilong em.

Prea wantaim klapela bel na tingting em i gutpela rot bilong bringim ol pasin bilong yumi long God. Taim bel bilong yumi i stap tru long



prea na taim yumi givim olgeta bel, laik na tingting long Jisas, yumi inap go insait long pasin holi wantaim Jisas. Kisim Baibel bilong yu na rit. Ritim ken na ritim oltaim inap pasin bilong ritim Baibel i kamap laip bilong yu. Putim ia na harim wanem samting Jisas i laik tokim yu. Traim bihain tok bilong Jisas. Sampela taim yumi laik tanim bel tru. Yumi laik bihainim tru laik bilong God na tokaut long dispela long ol narapela manmeri na pikinini.

Husat i save? Yumi inap lukim ol mirakel i kamap long laip bilong yumi.

Nogat yumi ting olsem Sios i laikim yumi mekim olgeta dispela pasin God i laikim. Nogat. Wan wan bilong yumi i gat bikpela wok bilong bihainim laik bilong God. Sios i givim yumi tingting tasol. Sios i no bosim laip bilong yumi. Laip na laik i stap long yumi wan wan. Tasol long strong bilong yumi yet, yumi i no inap long mekim planti gutpela samting. Yumi mas kisim grasia bilong God. Bilip bilong yumi long God long em yet em i grasia bilong God. Na grasia em i presen God i givim yumi bai yumi ken stap holi na hepi. Yumi inap kisim dispela presen sapos yumi tanim bel na givim yumi yet long Jisas na askim em long givim

yumi dispela presen em i gat bikpela laik long givim yumi.

Long dispela yia we Sios i onaim Jisas tok bilong God, Sios i laikim yumi tingim na selebretim Jisas taim mama i karim em. Na taim Jisas i dai na kirap bek long kisim bek yumi. Yumi mas tingim tu Holi Spirit Jisas i salim i kam na i stap wantaim yumi inap long taim Jisas bai kam bek long pinis bilong taim.

Yumi mas glasim pasin God i stap wantaim yumi inap long 2000 yia olgeta. Na yumi mas tenkim God long dispela wantaim bel isi na daun pasin.

Dispela pasin bilong redim yumi yet insait long misteri bilong Kraus, pikinini bilong God i kamap man, i mas kamap rot bilong yumi i stretim kristen laip bilong yumi long pasin bilong bilip long God. Em i min olsem yumi bungim na bihainim Kraus insait long Sios wantaim pawa na strong bilong Holi Spirit. Na tu, yumi pasim tingting tude long bihainim laik bilong God na pinisim wok Jisas i kam long graun na mekim bilong kisim bek ol man.


Long painim gen amamas insait long pasin bilong pogivim narapela, tanim bel na kisim bel isi em ol sampela rot bilong redim yumi gut

long bungim yia 2000. God i bin laikim yumi tru olsem ol sin manmeri na pikinini. Jisas i kam long graun na dai na kirap bek bilong kisim yumi ol pikinini bilong God taim yumi stap sin manmeri na pikinini yet. Jisas i singautim yumi long tanim bel. Lusim ol sin pasin. Bihainim God. Na save olsem Em i redi long pogivim ol rong yumi bin mekim.

Yumi inap painim trupela amamas sapos yumi larim laip bilong yumi i go bikpela insait long bikpela laik bilong God, grasia bilong Em, na larim God i lusim na rausim yumi long kalabus bilong sin. Long senisim bel na laip bilong yumi long kamapim bel isi wantaim God, yumi yet na ol narapela.

Dispela taim bilong wokabaut i go long yia 2000, ating i gutpela long yumi mekim toktok bilong laikim ol narapela olsem yumi laikim yumi yet, insait long Baibel na mekim dispela pasin i karim kaikai long laip bilong yumi wan wan long ples, komyuniti na kantri yumi stap long en. Yumi inap mekim dispela pasin long kainkain rot. Yumi ken autim tok bilong God long Sios long ol Sakramen, insait long tingting, pasin, toktok, ol sain, long soim tru bilip bilong yumi long God.

PEN PREN



NEM: Wesley Buape
KRISMAS: 21 (man)
ADRES: Lutheran Youth PO Box 82, Kavieng, NIP
LAIKIM: Raitim pas, serim aida na mekim ol gut-pela pasin na painim gutpela meri bilong maritim.

NEM: Samuel Morinkasio
KRISMAS: 19 (man)
ADRES: C/ VMC Medical Clinic, PO Box 2882, Lae, Morobe province
LAIKIM: Go lotu, baibel stadi, tok pilai, serim pre- sen na raitim kat bilong ol sikmanmeri.

NEM: Bembo Moka
KRISMAS: 21 (man)
ADRES: Poroporo Trading, PO Box 2413, Lae Morobe province.
LAIKIM: Go long olgeta Sande sevis, harim ol lotu singsing, raitim pas i go long ol kristen wantok na painim gutpela kristen meri bilong maritim.

NEM: Kava Yaku
KRISMAS: 18 (man)
ADRES: Wau Vocational Centre, PO Box 165 Lae Morobe province.
LAIKIM: Harim redio pilai, pilai basketbal, soka na raun lukim ol ples na waswas long wara.

NEM: Thomas Greg
KRISMAS: 21 (man)
ADRES: Paup Comm School, PO Box 33, Aitape Sandaun province.
LAIKIM: Pilai spot, pilai s ka na volibal na harim FM PNG Top 20 program na harim ol gutpela musik, raun lukim arapela ples na raitim pas.

NEM: Hillary Nungs
KRISMAS: 16 (man)
ADRES: PO Box 1164, Japs Estate, Wewak ESP.
LAIKIM: Go lotu, pilai ragbi tas, lukim muvi na harim PNG Top 20 na mekim tok pilai.

NEM: Samuel Miti 16, James Rambdui 15, Rombai Nori 17, Robert Waglipi 18 (ol man)
ADRES: Kitip Provincial High School, PO Box 1113, Mt Hagen, WHP.
LAIKIM: Ritim buk, stori, raun long arapela ples, raitim pas, lukim TV, pilai spot na harim musik na tok pilai.

NEM: Linus Bai
KRISMAS: 19 (man)
ADRES: Navo Estate, PO Box 123, Bialla, WNB
LAIKIM: Ritim niuspepa, harim lokol musik, pilai ragbi tas, raun wantaim ol poro, tok pilai, raitim pas na mekim pren.

NEM: Selven Heinna
KRISMAS: 21 (man)
ADRES: PO Box 480, Kimbe WNB
LAIKIM: Pilai soka, ritim niuspepa, go lotu na serim gutnus na raitim pas na serim ol presen wantaim arapela.

NEM: Emelin Benedicata Yalley
KRISMAS: 23 (meri)
ADRES: PO Box 1034, London Bridgest, Cape Coast, Ghana West Africa.
LAIKIM: Laik raun, senisim ol tumbuna bilas, kukim kaikai, lukim pilai, harim isi musik na painim man long maritim.

NEM: Cynthia Jonah
KRISMAS: 23 (meri)
ADRES: PO Box 1034, Kindsway Road, Cape Coast, Ghana, West Africa.
LAIKIM: Raun, ritim buk, raitim ol swit leta, lukim ol ben i pilai, kukim kaikai, senisim ol presen, mekim pren, go lotu na laikim man bilong maritim na stap wantaim.

NEM: Elizabeth Walker
KRISMAS: 25 (meri)
ADRES: PO Box 1063, Oguua Town, Central, Ghana, W/Africa
LAIKIM: raun lukim ol ples, kukim kaikai, senisim ol potu na painim man bilong maritim long bihain.

NEM: Janet Linda Daning
KRISMAS: 23 (meri)
ADRES: PO Box 1063, Mobil Lane, Cape Oguua Town, Ghana W/A.
LAIKIM: Raun lukim ples, bungim ol pren, raitim ol swit leta na sensim ol potu na painim wanpela rait man bilong stap wantaim long bihain.

ME 11 i bin makim dai bilong wanpela biknem singa o musikman long wol we yumi long PNG i save laikim tru musik bilong em. Nem bilong dispela man em Bob Marley. Em i wanpela blakman bilong ailan kantri Jamaica insait long Karibien. Ol ailan long Karibien i stap long is kos namel long not na saut Amerika.

Planti yangpela pipel na ol arapela bik manmeri i save laikim kain musik bilong Bob Marley. Kain musik em ol i kolim long "Reggae" musik. Em i bun tru long planti yangpela na arapela pipel long olgeta hap bilong wol.

Man husat i bin statim dispela kain musik em Bob Marley. Nau planti lain i save bihainim kain musik bilong em na kamapim ol singsing long stail bilong em.

Sampela ol biknem Reggae singa we planti yangpela pipel long PNG i save laikim tru em long Lucky Dube bilong Saut Afrika, UB40 em wanpela musik grup masta na ol blakman na planti arapela moa. Lucky Dube i bin kam long PNG wantaim ol lain musik manmeri bilong em long 1995 na kantri i paia long musik bilong em. Musik em Reggae stail we Bob Marley i bin kamapim pastaim. Sampela ol singsing bilong ol lain musikman na grup bilong yumi long PNG i save bihainim reggae stail bilong pilai na singsing olsem Bob Marley.

Bob Marley em dispela man na grup bilong em husat i bin mekim rasta gras i kamap popula long 1970s. Rasta gras em dispela longpela paspas gras we long tude, yumi lukim planti man na meri tu i gat long en. Taim Bob Marley na grup bilong em i kamap wantaim dispela stail, ol i kolim ol long "rasta" o "rastafarians".

Yumi ken tok Bob Marley i gat nem long reggae stail musik na danis na kain gras stail ol i kolim long rasta.

Sotpela bekgraun stori bilong dispela biknem reggae singa em mama bilong em em wanpela blakskin meri bilong Jamaica. Na papa bilong em em i wanpela waitman bilong Inglan.


Taim em i stap laip, nem na musik bilong em i no kamap strong inap long em i dai.

Wantaim grup bilong em ol i kolim long Wailers Marley i miksim ol kain stail musik olsem ol rok n' rol singsing, folk musik na kain musik bilong ol blak musikman bilong Amerika ol i kolim long sol na kamap wantaim dispela nupela stail ol ritim bilong Jamaica yet em "Reggae".

Sik kensa long kru bilong em i bin kisim nogut Marley na em i dai long Me 11, 1981. Em i bin yangpela man tasol wantaim 36 krismas. Taim em i dai, em i gat sampela lain husat i save laikim na bihainim kain stail musik bilong em tasol em i no kamap olsem wanpela biknem long wol inap bihain long em i dai.

Em i tru long yumi i ken tok olsem long planti taim, nem bilong man na musik bilong em i save kamap biknem taim musikman i dai. Dispela i tru long sampela biknem singa long wol olsem Tupac Shakur wanpela biknem bilong rapa musik, BIG, Selena we planti pipel i baim musik bilong ol bihain long ol i bin dai.

Wanpela musik albam bilong Marley we i kamapim moa long nain milion dola em dispela ol i kolim long Legend. Long dispela albam ol i putim wantaim ol top



Musik bilong Bob Marley i gat kik

singsing bilong Marley. Album ya i winim moa long 9 milion dola long Amerika taim ol i salim bihain long ya 1984. Long ol arapela hap bilong wol, albam i winim moa long 12 milion dola.

Wanem samting i mekim na musik bilong Marley i kamapim bikpela mani moa winim ol arapela musikman na singsing bilong ol? Em stail long musik bilong em tasol. Taim em i stap laip, em i no wanpela man husat i meknais na pulim ol planti man long en. Na dai bilong em tu i no kirapim das o meknais.

Wanpela mansave long musik i tok dispela albam bilong Marley em i gat kik olsem ol singsing na albam bilong ol arapela biknem musikman long wol olsem ol Beatles bilong Inglan. Em i tok dispela albam, Legend em i wanpela we planti man i gat tasol ol i no meknais long en. Em i tok Marley wantaim grup bilong em, em i dispela man husat i kamapim stail musik bilong Jamaica yet ol i kolim long reggae. Ol i kamapim kain stail bihain long ol i miksim ol rok na sol musik wantaim.

Long taim em i stap laip, musik bilong Marley i no bin winim wanpela top hit posisen o wanpela gol rekot. Ol singa i save winim gol rekot bihain long ol i salim moa long 500,000 rekot long wanpela albam long ol singsing bilong ol.

Tasol tripela yia bihain long dai bilong em, Islands rekot kampani i putim wanpela albam long ol singsing bilong em. Ol i laik wokim wok rise, presiden bilong kampani Chris Blackwell i tok.

Em i tok planti pipel i no bin wanbel tumas wantaim dispela wod reggae na em i kamap wanpela taim tasol long albam ya. Namba wan singsing long dispela albam em "Is This Love". Planti long ol arapela singsing em ol i toktok long politik.

Pastaim albam i no mekim hot seil tasol bihain long 1990 planti ol yangpela sumatin long ol kolis i gat bikpela laik long reggae stail musik na albam i sut i go antap long seils bilong em.

Blackwell i tok nau long Amerika, albam ya i save salim 500,000 rekot insait long wanpela mun.

Marley i kamap olsem

wanpela biknem kalsa mak we ol pipel long Amerika i luksave pinis long en.

Wido bilong Marley, Rita Marley i tok long taim em i go raun long ol singsing konset wokabaut bilong ol, planti moa pikinini na ol yangpela i save pulap kapsait long lukim konset na Rita bikos em i meri bilong biknem man.

"Taim mi singim tripela o foapela singsing bilong Bob, ol i save laikim tru na go wail. Taim mi singim "Could you be Loved", ol i save go wail moa yet na taim mi singim, "Is This Love" ol i save singaut bikpela tru", Rita i tok.

Em i tok ol yangpela husat i kam long ol konset i save karim ol liklik flek na putim tisiot bilong Marley. Misis bilong Marley i no bin amamas tumas long Islands rekot kampani bikos ol i no bin laik peim wokabaut bilong em long promotim musik bilong Marley klostu long pinis bilong 1980s.

Kampani i no save olsem em i gat top musik long han bilong em pastaim, Misis Marley i tok. Rita i tok em yet i no bin ting olsem albam long man bilong em bai i gat kik long en.

Tasol Blackwell husat i go pas long stretim planti ol singsing long Legend albam i tok musik bilong Marley em i gutpela tasol pastaim em i no bin fit tumas long putim kamap long redio. Tude yet em i no kamap gut long redio, Blackwell i tok.

Long wankain taim, Blackwell i tok wanem samting i narakain long musik bilong Marley em ol liklik pikinini i save laikim tru dispela kain stail. "Ol liklik pikinini olsem dispela wantaim foapela krismas bilong ol. Musik bilong Marley i gat stail, melodi na ritim. Yu harim tasol na bai yu laik kain stail na musik bilong em", Blackwell i tok.

Bihainim kik bilong salim Legend albam, Islands rekoting kampani i i kamapim ol arapela albam na salim. Albam olsem The Legend Lives On. Wankain piksa bilong Marley olsem long namba wan albam bilong Legend albam i stap long dispela namba tu rekot tasol Marley i gat smail long pes bilong em. Tasol nambawan albam i winim ol arapela na em i stap top yet.

YUMIFM

TOP

20

This Week!

L/W	T/W	SONG	ARTIST
1	1	LULU	QUAKES
3	2	MANU AFAI HIMENE	LAURENT DEGACHE
2	3	KAKAUL	KANAI PINERI
5	4	IA LYNETTE	LEONARD KANIA
6	5	DESI	TELEK
4	6	KEPOKO	ARIKANA
7	7	ACTING YANG	WALI HITS
9	8	ANGEL MANGAS	JUNIOR KOPEX
10	9	AI DAUE	WALI HIT
8	10	RI USHIWA	NODEAK
16	11	MERI WALI	WALI HITS
12	12	MELBOURNE CITY	G. TELEK
17	13	KULUNGI	JUNIOR KOPEX
13	14	LILI	QUAKES
15	15	LAMBADA RAGGAE	DAVID ANDREW
14	16	NA KUM BIO	MANDARAH SOULS
11	17	VUVU	TARIKANA
18	18	MANAM ISLAND	QUAKES
19	19	MANI PENI	REKS BAND
20	20	YU KEN DANCE	BANEX OA



PNG FM PTY LTD
 Trading as
 NAUFM and YUMIFM
 P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995

KANAGE



• Kanage wantaim pikinini bilong em i ron long pmv bas i go long Boroko. I no longtaim na musik bilong Duaks ben i pairapim song bilong Ariobale. Pikinini bilong Kanage harim na tokim olgeta manmeri long bas olsem, "harim a, em ankol Ariobale i singsing long dedi bilong mi taim em wantaim mami bilong mi i bin yangpela yet".

Kanage smol bro
Mosbi

• Kanage i go long lotu wantaim meri pikinini. Ol sindaun i stap na wanpela olupela pren meri bilong Kanage wokabaut i go insait long haus lotu. Em nau ai bilong Kanage i lukim pinis na em laik mekim sampela kain trik bai em yet i ken sindaun bilong em yet na bai meri ya i lukim na ting Kanage i stap singel boi yet.

Em nau Kanage holim junia na muvim i go long mama bilong em. Nau Kanage isi tasol kirap na i laik wokabaut i go long narapela fom taim pikinini singaut, "dedi, maski long traim soim nektai bilong yu long pasto. Kam bek na sindaun klostu wantaim mi na mami". Olgeta skin gras bilong Kanage i sanap na klostu bai i lus stret bikos ai bilong planti manmeri na dispela pren meri bilong Kanage tu na junia i bagarapim em long pablik.

Kanage Spai
Lae

• Kanage i laik lainim long draivim ka. Em i wok long sindaun insait long ka bilong wanpela poroman bilong em i giaman putim lek long brek na senisim gia i go i kam. Em i wok long mekim olsem na i no longtaim, han bilong em i tanim han brek na man, ka i ron isi i go daun. Kanage i paul long putim brek na stopim ka olsem na em opim dua na kalap i go daun. Ka i ron long laik i go na bamim as bilong diwai na stop. Pes bilong ka i bagarap olgeta. Na Kanage tu em olgeta skin bilong em i tekewe nabaut long kolta.

Kanage Spai
Lae

• Planti kendidet i wok long kempen long ileksen na i kam long fran bilong haus bilong Kanage. Kanage i les tru long harim kain kain nois nabaut bilong ol kendidet na sapota i kempen long fran bilong haus bilong em. Olsem na em kirap na putim bikpela toksave long geit olsem, "Sevis i kam, vot i go, mani i kam vot i go, nogat, yu yet nao". Planti kendidet husat i ritim dispela toksave i pret liklik long mining bilong dispela kain toksave olsem na ol i wok long kempen i go longwe. Ol i ting Kanage i mas wanpela man nogut tru ya.

Kanage Fan
Wewak

Tupela susa kamapim bikpela famili nau



LONG bipo tru, i gat tupela yangpela susa i stap. Wanpela taim tupela susa ya i waswas arere long wara i stap na lukim wara i karim ol skin bilong suka ken i kam daun. Tupela lukim na tingim hariap olsem i mas gat sampela lain i stap antap long het bilong wara. Olsem na em bihainim wara i go antap.

Taim tupela bihainim wara i go antap, tupela lukim olsem skin bilong suka ken i wok long kam yet long wara. Olsem na tupela bihainim i go yet.

Taim tupela meri ya i bungim sampela liklik han wara i kam, tupela sekim tasol nogat skin suka ken. Taim tupela sekim bikpela wara, suka ken skin i kam yet. Olsem na tupela wok long bihainim bikpela wara i go antap.

Tupela susa ya i bihainim wara i go i go inap klostu long hap we wara i go kol nogut tru bikos em i het bilong wara na em lukim paia i lait i stap.

Em nau tupela yangpela meri ya i hait na i go klostu long dispela paia. Nau tupela lukim olsem paia i wok long lait long sampela kaikai. Tupela sekim paia na lukim olsem i gat muruk i stap antap long paia.

Olsem na isi tasol tupela bungim olgeta abus ya na wok long kaikai i stap. Tupela mekim save long kaikai i stap na i no longtaim, papa bilong dispela kaikai i kam bek. Wanpela bikman i kam. Bikman ya i kam na lukim



tupela meri ya i stap. Olsem na em i nogat toktok nau. Em i amamas nau bikos i gat sampela lain tu i stap long em i ken toktok wantaim. Em i save olsem ol gutpela spirit bilong graun i mas painim na kisim dispela meri i kam long stap wantaim em. Olsem na em kisim tupela meri ya na tupela i stap wantaim em.

Bikman ya i lukautim tupela meri ya wantaim na ol i marit na i stap. Long dispela taim, tupela meri ya i gat ol pikinini na olgeta i stap wantaim. Tasol long dispela taim, i nogat ara-

pela ples i stap klostu long ol. Olsem na ol pikinini bilong tupela meri ya i tanim na marit long ol yet na long dispela taim, ol i srukim famili i go bikpela.

Planti pikinini i kamap na ol marit nabaut long ol yet na ol i sruk i go wokim kem nabaut na stap na mekim namba bilong ol famili bilong ol i go moa.

Nau planti ples i kamap bikos ol dispela famili i go sin-

daun nabaut long wanwan liklik kona bilong ol na kirapim ples. Tasol bikpela samting em, olgeta i gat wanpela tokples tasol long ol i ken tromoi long ol yet na ol bai klia long ol yet i go kam. Nau planti ples tru i kamap na ol manmeri i go sindaun nabaut long laik bilong ol. Tasol ol i kam long wanpela famili na tumbuna tasol.

Dispela stori i kam long ol Veyangta pipel bilong Mumeng long Morobe provins.

Masta Wai
Mumeng Morobe provins

Mi sem bikos mi gat hevi long toktok long pablik



DIA LAIPLAIN,
Taim mi stap long skul, mi no bin gat hevi long ol stadi bilong mi. Mi bin stap insait long ol gem pilai na mi amamas.

Long nau, mi save kisim planti toksave long toktok long sampela pablik bung tasol mi

DIA PREN,
Man bai i ni pilim gut long taim em i painim hevi long toktok na autim ol tingting bilong em. Pasin bilong bungim hevi long toktok na pasin bilong pret na guria i save mekim hevi i go nogut moa.

WOULD-BE SPEAKER

save guria na wari.
Long taim bilong mi long kirap na toktok, mi save bungim hevi long toktok na dispela i bagarapim tru nem na stail bilong mi. Mi sem long dispela samting i kamap long mi.

Long sampela taim em i helpim long slekim hevi taim yu save olsem i gat ol arapela pipel tu wantaim wankain hevi i stap. Maski planti lain i save bungim dispela hevi, wan wan manmeri bai i no pilim gut tumas long en.

Ol dokta husat i gat save long dispela kain hevi i painimaut olsem ol hatwok lain i save bungim dispela hevi. Mipela i bilip olsem yu dispela kain man bikos yu bin wokim gut long skul na yu save pilaim ol spots pilai.

Ating wanpela hevi bilong yu em yu nogat gutpela malolo long wok na tingting bilong yu. Yu save gat taim wantaim famili bilong yu? Yu save gat ol arapela pipel i kam long haus bilong yu?

Taim wanpela man o meri i bisi tumas na i go kam long wok wantaim nogat malolo, bodi bilong em bai i bungim hevi. Ol sain i save kamap long ples klia long tokaut long dispela samting. Sampela pipel i save gat hetpen, sampela i gat bel i pen, ol arapela i bungim ol kain hevi na wanpela bilong ol em long maus i pilim hevi long toktok.

Wanpela rot we mipela i tokim yu long bihainim em long rilaks o stap isi, noken wari planti tasol painim wanpela gutpela buk na ritim. I no buk bilong wok tasol wanpela gutpela stori buk we taim yu rit tingting bilong yu bai i klia na yu stap isi.

Lukluk long wok program bilong

yu na tingim, noken putim planti wok tumas long wanpela de. Famili bilong yu inap helpim yu long skelim wanem ol bikpela wok yu inap wokim pastaim.

Sampela taim ol grup olsem Laions na Roteri Klub i save ranim ol kos long helpim ol man long toktok long pablik. Moabeta yu kontekim wanpela long ol dispela grup na painaut sapos yu inap long stap insait long ol kain kos bilong ol. Gutpela rot bilong daunim pret bilong toktok long pablik em long toktok long pablik tasol. Na ol dispela kos bai i helpim yu tru long daunim hevi bilong yu.

LAIPLAIN

Maski tok nogut long Kanage stori

Dia Edita

Mi LAIK save. Tok pilai bilong Kanage i helpim ol manmeri na ol pikinini long Papua Niugini o nogat?

Taim ol manmeri i dring bia, ol i save mekim wanem? Ol i save tok nogut, singaut nabaut, singsing nogut, na mekim ol tok doti, na yumi save pret na tok em ol spak man.

Olsem wanem long tok pilai bilong Kanage? Harim yu husat i wok long tok pilai long Kanage. Yu wok long spak planti long toktok nogut.

Olsem Spirit bilong bia i kontrolim spakman, wankain tasol, satan i kontrolim tingting na bel bilong ol lain i save raitim tok nogut long Kanagem stori. Tingting nogut i pulap olgeta long bel bilong yu na yu wok long trautilim. Satan i wok long kisim biknem na i tok Kaman mekim moa yet. Satan i laik kilim na bagarapim Spirit bilong God long laip bilong yu. Yu no save dispela?

Harim yu inap long lukautim poisin snek long haus bilong yu na pilai wantiam em istap? Wantu bai em i kilim yu i dai. Yu wok long lukautim dispela pasin nogut long bel bilong yu.

Baibel i tok, satan em i man bilong tok giaman na em i papa bilong pasin bilong tok giaman (Jon 8.44). Yu mas lusim dispela kain tok i kam long satan. Harim, Baibel i tok, sin i save bringim pe long wok man bilong en. Pe bilong sin em dai tasol (Rom 3.23). Sapos man i laik lukim gutpela taim, orait em i mas putim tambu long maus bilong en na noken mekim tok doti. Yu noken i stap kalabus man bilong satan. Yu mas lusim dispela rot na painim nupela rot na laip tru. Dispela nupela rot na laip tru i pulap long Jisas Kraus. Laip i stap long Jisas, na dispela laip em i laip bilong ol man meri (Jon 1.4-5).

Bilong wanem kantri bilong yumi na i wol long bagarap. Planti stil pasin i stap, ol man i kilim man i dai, repim ol meri, na planti pait i stap. Bikos ol manmeri i tingim ol yet na larim man bilong giaman, satan i kontrolim laip bilong ol. Kain giaman tok pilai nabaut i kirapim tingting na bel bilong ol long mekim pasin nogut. Yu husat i yusim dispela tok pilai bilong Kanage long tok nogut harim, yu no helpim yu yet, na ol arapela manmeri. Yu wok long kirapim na bringim bagarap long yu yet na long ol manmeri insait long PNG. Yumi lukim husat tu long wol i sapotim tru na kirapim ol manmeri long bagarapim lo na oda insait long kantri. Nogut God i gat tok long yu long bihain. Plis yu stopim dispela kain tok pilai.

Sapos wanpela man o meri i laik sapotim tok bilong mi gutpela. Tasol sapos yu husat i laik tok kros long tok bilong mi, yu skelim gut ol dispela toktok pastaim.

**Pelick Z Gumoing
Lae**

Putim wara long we long toilet long Lae taun maket

Dia Edita

Inap yu givim mi liklik spes na mi autim liklik wari bilong mi. Mi wanpela man bilong Morobe. Mi save stap long ples bilong mi na mi kam raun long Lae siti na mi lukim Lae maket i no gutpela tumas. Bilong wanem? Mi lukim planti lain i yusim wara bilong toilet long dring, wasim ol kaikai na kumu. Dispela pasin em i no gutpela. Dispela ol kaikai na kimu em bilong man i kaikai na i no bilong em i givim long pik. Bilong wanem na ol meri i mas go wasim kumu na kaikai long wara bilong toilet?

Plis wanem kompani o gavman i lukautim Lae maket mas lukluk long dispela samting. Stretim Wara bilong wasim kumu na kaikai long wanpela hap. Na larim toilet i stap longwe long ol kaikai na kumu ol manmeri i laik salim long maket.

Moa yet, em i no gutpela long putim wara bilong dring long toilet. Mi man bilong ples na mi no save gut. Ating em wei bilong taun laip? Tasol mipela ol lain bilong ples, mipela i no save mekim olsem. Mi lukim dispela pasin na mi komplem. Sapos yu husat brata, susa long taun yu lukim dispela pas long Wantok nius, rait tasol long Wantok nius na mi lukim. Tenkyu.

**M. Damben
Birman Village
Morobe**

Obura-Wonenara ilektoret i nogat nem long PNG

Dia Edita,

Mi wanpela hauslain mangi long Obura-Wonenara ilektoret. Mi laik autim wari bilong mi na ol pipol bilong mi olsem i kam inap nau, 10 pela yia olgeta mipela i no lukim wok bilong memba insait long Gadsup na Tairora senses divisen.

Ileksen bai kam na memba i mas kamap ples klia na toksave long mipela long wanem rot tru em i yusim Ilektoel Developmen Fan (EDF) na Rurel Aid Projek (RAP) mani insait long ilektoret?

Nem Obura-Wonenara ilektoret em wanpela hait nem tru long Papua Niugini na planti manmeri i no save yet bikos memba bilong mipela i no save tu long mekim wok. Mi save harim planti manmeri i save tok:

*Long 1987 i kam inap 1997, i no gat wok kamap bilong stretim rot. Olgeta rot i kamap olsem bus rot na rot bilong pik.

*Planti hevi i kamap long ol bikpela kofi plentesin na Bank i lusim olgeta yet. Memba i mas luksave na helpim mipela. Bikos, kofi em laip lain bilong mipela long kisim mani.

*Bikpela pawa long Yonki i no kam long pipol bilong Gadsup. Toktok bilong "Rural electrification Scheme" o givim pawa long ol ples i stap we? Mipela i no lukim. Mipela ol papa tru bilong graun i no kisim pawa yet.

*Ol skul na haus sik i wok long bruk daun na sampela skul i pas pinis na ol haus sik tu i nogat marasin yet.

Olsem na mi laik askim ol pipol bilong Obura-Wonenara long tingting gut na votim man husait bai bringim biknem na sevis i kam long mipela. Yumi noken stap las long PNG. Yumi mas sanap na tok pait

long gavman long kisim sevis o developmen na i no ken sindaun olsem papet.

Yumi wanwan i gat fridom long makim man long laik bilong yumi yet. Tasol tingting i go moa long 5-pela yia na i no ken tingim nau tasol. Nogut yumi Obura-Wonenara pipol i stap yet bihain long ol arapela pipol bilong PNG.

Dispela em hevi bilong mi na yu husat brata o susa i laik autim tingting bilong yu long tok bilong mi plis rait i go long Wantok na mi ken lukim.

**Umia Ama
Arau, Kainantu**

Nahu Rawa noken stap long Raikos Distrik

Dia Edita

Mi wanpela pikinini bilong Nahu Rawa na mi stap long Tawasis insait long Madang provins. Mi laik autim bel hevi bilong mi long ol pipol bilong Nahu Rawa olsem. Mi bin harim long radio olsem Nahu Rawa i no moa i stap long "Upper" Ramu distrik. Nogat. Em i go pinis long Raikos distrik. Tasol mi laik tokim yu husat man yu tokim ol memba o ol bikman olsem yu wanpela batafai man. Yu no gat tingting long bihain

taim bilong yu o ol pikinini bilong yu. Na tu yu no gat tingting long ol papamama na ol lapun bilong ples insait long Nahu Rawa. Husat i strongim dispela toktok olsem Nahu Rawa i stap long Raikos Distrik. Harim, yu save long gutpela bilong em. Tasol yu no save long nogut bilong em. Yu no tingim ol hevi inap kamap bihain na bai bagarapim pikinini bilong yu. Nau em i no taim bilong yu bikos liklik taim bai yu dai. Nau em i taim bilong mipela ol yangpela. Amaspela yia i go

pinis Nahu Rawa i no bin kisim wanpela sevis i kam long ol memba bilong Raikos. Ol lapun bilong bipo i dai na nau sampela i toktok long ol sevis i go na ol i dai pinis na yet sampela bilong yupela i het het long suvim yupela yet long joinim narapela eria.

Em tasol na yu welkam tasol long bekim pas bilong mi.

**Vincent Sonde
Tawasis
Madang**

Luteran Siping bilong helpim Sios na pipol

Dia Edita

Mi laik tenkim Lutheran Shipping long baim nupela pasindia bot Mr. Geyamsao na tu i go long Wenceslaus Magun long raitim stori bilong Luteran Sios i kamap long Finsafen na stori bilong siping bisnis bilong sios i kamap olsem wanem long Wantok niuspepa, bilong Epril 10, 1997.

Mi laik autim bel hevi bilong mi olsem:

Long Finsafen yumi gat sip long olgeta de. I gat ol kago sip na pasindia sip tu. Nupela MV. Geyamsao i ron, na Sea Lark tu i ron. Sip bilong Luteran Sios na sip bilong ol arapela kampaim ron tu. Na pe em narakain.

Sea Lark K20. Na Geyamsao K25. Na olgeta manmeri i kalap long Sea Lark tasol.

Hei ol wantok, harim gut. Mani yumi givim Sea Lark bai

i no inap helpim Sios bilong yumi ol Luteran na ol wokman meri bilong em. Nogat na nogat tru. Mani yumi baim i go long ol Luteran siping sip, bai go bek ken long helpim yumi na strongim wok Sios bilong yumi long sanap strong long wanwan hap bilong yumi long PNG. Olsem na yumi manmeri bilong Finsafen, plis skelim dispela tingting na strongim Sios bilong yumilong sanap strong. Toktok strong na rausim Sea Lark i go na larim Luteran siping pasindia sip tasol i go kam long Lae-Finsafen.

Em tasol bel hevi bilong mi. Na yu husat barata o susa i laik bekim pas bilong mi em i orait tasol.

**Dee Dee Kats
Finschhafen**

Smok mariwana i kamap bikpela long Aitape

Dia Edita,

Mi wanpela mangi i stap long Aitape na mi save lukim planti ol mangi i save salim mariwana smok olsem ol arapela gutpela smok. Planti ol mangi i save baim na smok olsem ol arapela gutpela smok. Ol i no save wari long ol plisman long Aitape: Planti ol plis long taun i no save holim ol dispela mangi. Nogat.

Mi ting olsem ating ol plisman long Aitape i no save long painim aut man i smokim mariwana. Mi ting i moa gutpela ol plisman i mas traim na lukluk gut long ol yangpela mangi taim ol i raun long Aitape taun na askim ol. Em tasol kumplen bilong mi na husat i laik bekim em laik tasol.

**Jackson Warap
Sandaun**

Makim gutpela kendidet bilong Kabwum open ilektoret

Dia Edita

Mi wanpela mangi Kabwum long Morobe Provins tasol nau mi stap long Tabubil long Westen Provins. Mi laik autim bel hevi bilong mi na yu husat kendidet i laik kontes long 1997 ileksen, yu mas skelim yu yet gut pastaim bipo long yu sesis.

Taim PNG bin kisim indipenden i kam inap nau, nogat wanpela taim ol memba bilong Kabwum i bin kisim wok olsem wanpela minista. Nogat tru.

Ol pipol salim ol lida long holim posisen olsem bek bensa/memba nating Ol memba bilong Kabwum em long Ginson Saune na Tom Horick. Olsem na yu husat kendidet nau i laik sanap yu mas saveman na i gat planti gutpela tingting na ekspiriens bipo long yu sanap. Mipela les long yu i go long palamen na i stap bek bensa yet. Mipela i laikim yu mas kisim wok olsem wanpela minista na inap makim maus bilong mipela long palamen.

Mipela laikim pikinini Kabwum i ken soim olsem mipela tit long karim ol bikpela wok bilong kantri, na developim eria bilong mipela. Em tasol na yu husat pikinini Kabwum, i wanbel o saptim mi plis rait i go long Wantok na bai mi lukim.

**S. Kmuringga
Wekos Nkum, Tabubil
Western provins**

Ol giaman papa graun long Kare paulim planti man

Dia Edita

Mi laik putim dispela toksave, i go long pablik bai yupela i ken lukim na save. Stat long 1990 i kam inap nau, planti man bilong Tari i giamanim planti manmeri long ples na taun olsem wok bilong Maunten Kare bai stat klostu tru.

Na tu ol save raun long Hagen, Kundiawa, Goroka, Mosbi na trikikim planti ol bisnis manmeri i wok long opis na tu ol manmeri i holim ol liklik wok nambaut na giamanim ol long kisim bikpela mani bilong ol dispela lain.

Ol dispela giaman mausman o giaman komiti i save grisim ol na tok taim Maunten Kare main i kamap bai yu holim posisen o bai yu kisim kontrakt. Ol i save giamanim planti lain na kisim mani bilong ol.

Mi wanpela papa tru bilong graun tasol mi stap long ples. Mipela ol man tru stap long ples na ol dispela pipiaman karim brifkes na raun long ol opis nabaut bilong wanem hap tru ya?

Noken giamanim ol manmeri na kisim mani nating. Mipela harem pinis olsem gavman i no inap long givim aut maining lis. Husat tru bai main long Maunten Kare? Mipela harem pinis olsem gavman i no inap long givim maining lis olsem na plis noken giamanim ol manmeri.

**Maya Igini
Hagen**

Pilaim musik bilong lotu long Sande

Dia Edita,

Mi Adam Yember bilong Sandaun provins. Wari bilong i go olsem, Olgeta taim, mi save harim redio Sandaun i save pilaim singsing bilong pop musik long olgeta Sande. Mi laikim redio Sandaun i ken pilaimol pop musik long long Mande na pinis long Sarere. Long Sande ol mas pilaim musik o singsing bilong lotu tasol.

Husat ol kristen brata na susa i sapatim dispela tok bilong mi, God i blesim yu.

Adarn Yember Vanimo, Sandaun provins.

Wantok sistem strong insait long Plis

Dia Edita,

Mi laik sapatim pas bilong tupela brata, Peter Joelo, na Max Aunton. Tupela brata i sut stret long tingting na lukluk bilong mi tu. Mi lukim olsem poisin bilong wantok sistem ol plisman i wokim long Aitape i bikipela tru.

Long wanpela de mi bin sindaun arere long kaunsol opis na mi lukim ol plis i paitim wanpela liklik boi i gat 15 o 16 kris-mas. Em i stil long stua bilong Porer. Samting olsem 10 o 15 minit bihain, mi wokabaut i go na abrusim tupela plisman i wokabaut na stori igo daun. Long sait bilong tupela, wanpela boi husat i save smok na salim spak brus long Aitape i sindaun i stap. Ai bilong em i red nogut tru na em sindaun i stap na wok long tok-tok nabaut long ol meri i stap. Dispela boi em tambu bilong wanpela plisman olsem na ol plisman i no holim em. Wantok sistem long Aitape i go bikipela tru. Olsem na mi askim nesenol plis komisina long opim ken wanpela nupela stesin long Aitape. Na tu pinisim ol plisman husat i sapatim na strongim ol lain i brukim lo bilong PNG.

Junia Lugonabim Aitape, Wes Sepik provins.

Lukluk gut na makim wanpela lida tasol

Dia Edita,

Mi laik sapatim pas bilong Indeks Soripa. Pas bilong yu i tru. Mi wanpela mangi Gadsup mi bilong Tompena tasol nau mi stap long Alotau.

Tru tumas long Gadsup, i no gat wanpela samting i kamap.

Em asua i stap long ol manmeri ol i no makim gut wanpela man long dispela 8-pela ples Onanika, Omaura, Ikana, Tombena, Akuna, Amomonta, Woepa, na Onamuna. Long dispela ileksen, ol mas makim gut wanpela man bilong dispela

8-pela ples. Olgeta mas givim vot long em tasol.

Husat i laik givim sapat. Yu ken rait i go long Wantok Niuspepa bai mi lukim.

Dennis Kau Alotau Milen Bay provins.

Votim ol independens kandidat tasol long 1997 ileksen

Dia Edita,

Mi wanpela man long Potsia ples, long Lae na mi laik tokim ol manmeri olsem long dispela 1997 ileksen, yumi mas votim ol independen kandidat tasol long go long palamen.

Yumi bin ritim planti nius pinis long Morobe provins na ol lida bilong yumi long dispela kantri olsem planti pasin nogut i bin

kamap pinis long dispela gut-pela kantri bilong yumi. Mi laikim yumi mas givim vot long man bilong ples stret, olsem ol grasruts ol i stap wantaim ol pipol long ples, na i no man i stesin bai i gat planti das.

Man i stap long taun em i gat mani, haus na ka, o bikman i gat nem long dispela kantri, noken

pulumapim poket bilong ol gen. Votim man bilong ples, we i nogat nem bai i ken helpim yumi na developim ples bilong yumi.

Em tasol em liklik wari bilong mi.

Nim Koni Potsie viles Lae, Morobe provins.

Das long Vanimo taun i bagarapim ol manmeri

Dia Edita,

Mi laik sapatim brata Joel Tapi bilong Vanimo, Sandaun provins. Em i tok; 'mi laik autim belhevi bilong mi i go long Sandaun gavmam'.

Mitupela i laik toktok moa long ol gavman husat i no save lukluk gut na stretim bikipela rot. Stat long Vanimo taun i go olsem long Vanimo hai skul na DPI stesen rot.

Mi save lukim long ai bilong mi olsem taim ol bikipela ka, o ol liklik ka i ron i go i kam ol i save kirapim das i go long ol manmeri na tu long ol skul pikinini taim ol i save wokabaut long rot.

Tarangu ol lain i wokabaut long rot i save kisim taim stret long ol das bilong ka long taun. Olsem na belhe-

vi bilong mitupela brata ya i go olsem: gavman mas lukluk gut na putim kolta. Gavman bilong Sandaun no ken slip tasol. Gavman mas traim na opim ai. Stretim gut provins bilong yumi Sandaun. Mekim Sandaun taun i kamap olsem hetkwota i taun na noken luk olsem wanpela distrik o stesin bai i gat planti das.

Em tasol bikipela belhevi bilong mi i go long Sandaun gavmam.

Yu husat man o meri yu laik sapatim o skruim moa tok orait rait tasol long Edita Wantok nius na mi ken ritim.

Bootex M. Fatty Pikinini Safexs Vanimo, Sandaun provins.

Kisim ol gret 6 long plis

Dia Edita,

Mi wanpela mangi bilong Okapa na mi stap long Lae siti. Mi lukim ol lain i lusim skul olsem mi i raun long taun na mekim kinkain pasin nogut na ples i bagarap. Planti bilong ol dispela yangpela manmeri i askim long mani, smok mariwana, brukim haus na stil. Dispela ol pasin nogut i mekim planti ol manmeri bilong taun i no kaikai gut o slip gut. Mi no amamas long dispela. Gavman mas lukluk gut long ol lain i pinisim skul na i no painim wok na toksave long ol bos bilong ol plis na kisim ol dispela kain long joinim plis fos. Plis depatmen i wok

long kisim ol gret 10 na 12 tasol na ol i no kisim ol lain i pinisim gret 6, 7, 8 na 9. Ol dispela mangi i save bagarapim ol manmeri na stil long ples na taun. Na tu ol i kros bikos ol i nogat wok o i no kisim wok long taun. Olsem na ol i save raun long taun, brukim na bagarapim ol samting.

Em tasol liklik hevi na wari o komplem bilong mi. Yu husat i laik bekim toktok bilong mi em laik bilong yu tasol. Mi bai amamas long lukim na ridim bekim bilong pas bilong mi long Wantok Niuspepa.

Eyari Manayamo Lae, siti.

Sans long ol mangi Is Sepik na Wes Sepik long wok

Dia Edita,

Mi wanpela mangi Witex nambawan long Wes Yangoru Is Sepik provins. Nau mi stap long Hagi oil pam blok long Bialla Wes Nubriten Provins. Mi laik sapatim tingting bilong brata John Wanpis i bin kamap long Wantok Niuspepa long 23 Januari, 1997.

Yes mi sapatim toktok bilong em. Nau yet mi lukim olsem planti ol

mangi long Is na Wes Sepik i save raun long olgeta hap bilong provins na mekim planti biket pasin.

Moabeta yumi olgeta i go na stap long provins bilong yumi yet na wok long kampani o stap gut long ples. Em tasol wari bilong mi. Husat i laik sapatim dispela tingting. Em orait tasol.

Lucas Yauyapi Bialla, Wes Niu Britan provins.

Morobe o Madang i bosim Teptep?

Dia Edita,

Mi mangi Kabwum nau mi stap long ples. Mi laik askim Morobe gavana Jerry Nalau na tu namba tu bilong em Titi Christian na rijinel memba bilong Madang Peter Barter na gavana bilong Madang, George Wan.

Yupela ol dispela lain mas lukluk na glasim gut stesin ol kolim TepTep. Em i stap long Madang o Morobe. Teptep i stap long boda mak bilong Morobe na Madang. Planti taim ol lain teptep i brukim boda i kam long Kabum ilektoret.

Ol Teptep ol bilong Madang na ol rong long kam insait long Kabwum. Ol bilong Madang na i no bilong Kabwum. Long taim bilong ileksen ol i save brukim boda i kam insait.

Samanga em tru Kabwum bosim. Teptep tasol mi no klia.

Teptep i stap long Kabum o Madang? Plis ol lida, yupela mas sekim gut dispela tingting na tok-tok na tokim mipela ol lain long ples. Em tasol yu husat i laik sapatim em welkam tasol.

Guring Geso Kabwum, Morobe provins.

Tabubil mas i gat nius ripota

Dia Edita,

Mi wanpela man long Tabubil Westen provins. Mi laik tokaut uolsem Tabubil i mas i gat ol man bilong raitim niuspepa long hia bikos Tabubil em wanpela taun na kinkain gutpela na nogut samting i save kamap long hia. Tasol i no nius save kamap long niuspepa.

Mi tok strong long Tabubil mas igat ol man bilong raitim niuspepa bikos sindaun long hia i wok long senis klostu, klostu. Bipo kala bilong wara em wait na nau em luk olsem susu na mailo. Bipo ol pisin, kapul, wailik na Muruk i pulap long bik bus tasol nau ol i ranawe i go long sampela hap na ples i kamap olsem deset na yumi i no inap painim ol dispela kain samting.

Laip bilong manmeri long Tabubil i senis. Bipo ol manmeri long hia save putim purpur na selkam-bong, slip long bus haus wantaim dok na pik. Tasol nau, yu bai ting olsem ol manmeri long narapela hap kantri o provins olsem, Mosbi, Lae o Hagen. Ol i putim klos bilong ol waitman na slip long gutpela haus. Bipo ol manmeri i no save pilai soka, ragbi, basketbol na ol narapela gem. Tasol msu, ol i wok long pilai gut ol dispela gem na kisim nius bilong Tabubil i go long narapela hap bilong Papua New Guinea.

Olsem na mi laik wanpela nius ripota bilong Wantok Niuspepa mas kam na wok fultaim long hia. Tenkyu long ritim wari na tingting bilong mi.

Geseng Galungm Tabubil, Westen provins.

Noken ritim Baibel olsem komik buk

Dia Edita,

Mi wanpela mangi Lumi insait long sandaun provins. Mi stap nau long Dylup Plentesin long Not Kos Rot Madang.

Mi laik sapatim brata Daniel Polope bilong Hagen. Mi no wanbel long ol yangpela mangi bilong Papua New Guinea. Ol save yusim buk baibel olsem buk Komik. Hating ol i no ritim gut tok bilong God na skelim gut tok bilong em? I luk olsem planti bilong yumi i no save gut long tok bilong God yet.

Yumi ting olsem tok bilong God em samting bilong bilasim skin tasol.

Tasol mi skelim olsem tok bilong God em i kaikai tru bilong holi sprit. Olsem na yumi mas skelim gut. Nogut bihain bai yumi lus long hel. Sapos yumi laik save moa, plis opim buk baibel long pas Santu Paul i raitim i go long ol Rom (Roman 3: 9-12).


Em tasol. Husat i laik skurim moa tok bilong God. Yu ken rait tasol long Wantok na bai mi ritim.

Primus M. Yawi Not Kos Rot Madang

TOKSAVE:

• Sapos yu laik long salim pas. salim long dispela adres:

WANTOK NIUSPEPA P. O. BOX 1982 BOROKO NATIONAL CAPITAL DISTRICT.



WANTOK PABLIK NOTIS

Sapo yu laik advertais, telepon 325 2500 na askim long

Miri Alori Ext. 214
Jeffrey Maliou Ext. 215
Jack Mahuru Ext. 217



DEPARTMENT OF FOREIGN AFFAIRS AND TRADE

CONDOLENCE MESSAGE

Long makim Minista bilong Foren Afes na Tred, Kilroy Genia na ol wokman bilong dispela dipatmen long hetkwata na long ovasis, Sekreteri Veali Vagi i givim bikpela tok sori bilong ol i go long wanpela bikpela wokman bilong dipatmen. Dispela wokman i dai kwik tumas na i hat long bilip olsem em i dai,

Man husat i dai em long Christopher Thomas Wariambu.

Christopher Wariambu i dai long abinun bilong Tunde 20 Me, 1997 long Quebec siti, Canada taim em i stap insait long miting bilong ol 'APEC Senior Officials' na ol wankain miting olsem.

Mista Wariambu i stap long Washington DC, na i mekim wok olsem Minista/Kaunsela. Em i bin wok long hap i stap bipo long ol i salim em i go bilong stap insait long dispela ol 'APEC' miting long Canada. Bipo long ol i salim em i go wok long Washington DC, Mista Wariambu i bin holim ol sinia posisen insait long dipatmen na long ovasis misin. Insait long ol dispela wok bilong em, Mista Wariambu i bin givim planti sevis na bringim ol planti developmen i kam long PNG wantaim ol arapela gavman na ol intanesenel ogenaisesen.

Minista bilong Foren Afes, Sekreteri na ol wokman long Papua Niugini na ol lain i wok long ovasis i soim na salim bikpela sori long lewa bilong ol stret i go long Misis Wariambu na ol pikinini, David, Sammy na William.

Mipela i bung wantaim yu na soim bikpela sori long lewa bilong mipela stret i go long man bilong yu, em i papa na tu wanpela gutpela pren na wan wok bilong mipela.

Mipela i prea long Jisas husat i king na man bilong givim bel isi na bikpela laik long strongim ol lain i gat hevi long laip bilong ol long kain taim olsem.

Larim bikpela God i givim em gutpela malolo na bel isi bilong oltaim.

Veali Vagi
Sekreteri

MIPELA I SALIM



THE Independent

Baim wanpela kopi tete
na lukim ol nius bilong
PNG, wol na kainkain
nius bilong spot tu.

*Pepa
bilong yumi
stret!*

**LONG
60t
tasol!**

BAIM NA RITIM!

PROMOTE YOUR BUSINESS

WITH

WANTOK


THE Independent

PNG BUSINESS

Are you launching a new business, celebrating an anniversary, staging a big event or exhibition?

**WE CAN HELP YOU TO TELL YOUR
POTENTIAL CUSTOMERS ABOUT IT!**

Simply call our advertising department and we will send a representative to you for advice.



WORD PUBLISHING COMPANY PTY LTD

Phone 325 2500

Fax: 325 2579



**DEPARTMENT OF TRANSPORT & WORKS
OFFICE OF TRANSPORT**

PABLIK TOKSAVE

Mipela laik toksave long olgeta manmeri o pablik long nupela fi Trensport Ofis i bin kamap wantaim aninit long Seksen 10 bilong Motor Trefik Regulesen.

Na tu mipela laik toksave olsem olgeta fi Traffic Registries i sasim bai bihainim wanem samting i stap insait long buk bilong Traffic Registries. Sapos yupela kisim narapela sans i no i stap long buk bilong mipela orait yupela mas toksave hariap i go long Supritendent bilong Motor Traffic o namba tu direkta bilong Len Trensport divisin long telepon namba 325 4277 o faksim yusim namba 325 4091, long Hyundai Building Hohola.

NUPELA LO BILONG MOTOR TRAFFIC

58: MIPELA RAUSIM NA KAMAP WANTAIM NUPELA LO SANISIM LO

SEKSEN 10:

Mipela rausim seksen 10 bilong Prinsipal Regulasen na sanisim wan taim olgeta samting i stap aninit.

SEKSEN 10:

Reg, Secs. 3(1), 4(1), 4(5)(b), 5, 8(2), 14(1), 16(2), 19(3), 21(3), 23(5), 26(4), 29(1), 33, 33A, 37, 39, 56, 82(2), 88(2), 90, 91(2), 159

Not: -

1. Wanem as tingting bilong dispela sanis long Seksen 10 -
"Moto Kar" dispela i min ani kain kar (tasol i no moto baik/wilwil o treila), we ol manmeri i save yusim long olgeta dei.
"Semi-treila" dispela i min olgeta kar i stap long seksen 1(13) bilong Ekt.
2. We olgeta kar i gat wanpela bodi tasol, o husat i save yusim wanpela semi treila; tupela wantaim bai kam aninit long nem bilong wanpela dispela kar tasol.
3. We wanpela kar i yusim moa long wanpela semi-treila. Dispela kar i kam aninit long:
 - a) sapos dispela kar wantaim semi treila bilong em bai kisim liklik registresen fi aninit long nem bilong dispela kar na
 - b) tupela treila bai kamap wanpela treila tasol.

ITEM	TORI BILONG DISPELA ITEM	FI
1.	Husat laik baim draiva peimit aninit long Lo seksen3 (1)	K10.00
2.	Draiva Laisens o laik sanisim olpela laisens	K10.00
3.	Fi bilong baim peimit o sanis olpela peimit long draivim wanpela pablik kar (PMV) aninit long seksen 33.	K33.00
4.	Long ol ples we dispela ol samting bai kamap - baim laisens o sanisim olpela laisens long draivim wanpela kar	K30.00
5.	Laisens long sotpela taim tasol ol trening draiva	K9.00
6.	Long ples we dispela samting bai kamap - man o meri husat laik draiva wantaim laisens long sotpela taim tasol	K10.00 K9.00
7.	Man husat laik sanisim olpela laisens o laisens i bagarap liklik	
8.	Long ples we dispela samting bai kamap - sanisim olpela laisens long sotpela taim tasol long draivim kar	K10.00
9.	Long ples we dispela samting bai kamap - man husat laik baim bek laisens olgeta o long sotpela taim tasol long draivim kar taim em i bin go long kot aninit long Seksen 37 bilong Ekt	K10.00
10.	Yu laik rejisterim o sanisim olpela rejistresen bilong kar wantaim ol kain enjin sais olsem: i no abrusim 130 cm3 (c.c.) abrusim 130 cm3 (c.c.) tasol i no abrusim 200 cm3 (c.c.) abrusim 2000cm3 (c.c.) tasol i no abrusim 4000cm3 (c.c.) abrusim 4000cm3 (c.c.)	K88.00 K103.00 K147.00 K250.00

11. Rejistresen o laik sanisim olpela rejistresen bilong ol bikipela kar bilong ol kampani (tasol i kain kar olsem ol liklik kar, moto baik, trekta o liklik semi treila kar we ol manmeri i no save

yusim long mekim wok bisnis), we hevi bilong ol i olsem:

I no abrusim wan tan	K90.00
abrusim 1.0 tan tasol i no	
abrusim 2.0 tan	K103.00
abrusim 2.0 tan tasol i no	K125.00
3 tan	
abrusim 3 tan tasol i no	K150.00
abrusim 6 tan	
abrusim 6 tan tasol i no	K180.00
abrusim 8 tan	
abrusim 8 tan tasol i no	K200.00
olgeta kar abrusim 10 tan, bai ol baim	
K25.00 long wan tan abrusim 10 tan	K25.00

12. Rejistresen bilong kar o laik sanisim olpela rejistresen bilong kar.
i no wantaim sait kar K30.00
wantaim sait kar K60.00

13. Rejistresen bilong kar o laik sanisim olpela rejistresen bilong kar i gat treila we ol i save yusim long mekim praivet wok tasol o slip insait long en:

Longpela bilong bodi -	
i no abrusim 2 mita	K8.00
abrusim 2 mita tasol i no abrusim 4 mita	K29.00
abrusim 4 mita	K44.00

14. Rejistresen o laik sanisim olpela rejistresen bilong kar i gat treila- (we ol i save yusim long mekim praivet wok tasol), long olgeta tan aninit long gros hevi K20.00

15. Rejistresen o laik sanisim olpela rejistresen bilong ol trakta i gat kain sais olsem:
i no abrusim 2500 cm3 (c.c.) K30.00
abrusim 2500 cm3 (c.c.) tasol i no
abrusim 6000 cm3 (c.c.) K36.00
abrusim 6000 cm3 (c.c.) K46.00

Olgeta trakta, husat i save yusim ol taya nogat win bai baim sampela moa fi antap long ol fi stap antap.

16. Rejistresen o laik sanisim olpela rejistresen bilong foklip, winis, loda, greda, o arapela bikipela kar i no stap insait long buk bilong trefik bai baim moni olsem: K36.00

17. Sapos yu laik sanisim setifiket bilong rejistresen bilong yu taim yu lusim olpela, wara i wasim na bagarap o sampela hap bilong em bruk bruk. Bai yu mas baim sampela moni olsem: K9.00

18. Sapos yu laik sanisim olpela namba plet, taim em i lus, bagarap i bin lus. Yu mas baim K9.00

19. Sapos yu laik kisim setifiket bilong namba flat taim em i lus, bagarap o sampela hap bilong em i no luk gut, yu mas baim K9.00

20. Fi bilong taim yu transferim rejistresen bilong kar bilong yu K9.00

21. Fi bilong setifiket bilong rejistresen taim yu laik kisim planti long sem taim long olgeta moto baik o sait kar wantaim moto baik.

22. Fi bilong kisim nupela laisens o laik sanisim olpela laisens bilong ol pablik kar (PMV).
a). fi bilong ol kar inap karim 10-pela man K30.00
b). kar husat bai karim moa long 10-pela man K0.45 long wanwan man.

23. Fi ol bikipela haive kar mas baim -
sapos ol man husat laik salim namba plet o kamap man bilong sanisim olpela namba pret long ol kar K73.00
sapos man i laik givim namba plet i go long moto baik K9.00

24. Fi bilong baim permit laisens na draivim kar i nogat rejistresen bilong em K9.00

25. Fi bilong baim permit aninit long seksen 122(1)(iv) K6.00

26. Setifiket bilong rejistresen long sanis i go kamap olsem pablik haya kar, yu mas baim olsem K5.00


27. Setifiket bilong rejistresen long sanis i go kamap olsem praivet haya kar, yu mas baim olsem K5.00

28. Laisens long sotpela taim tasol aninit long Seksen 39 K10.00

29. Setificate bilong rejistresen long kamap olsem liklik bas sevis -
a). we dispela liklik bas inap karim pasidia inap long 20, (draiva tasol bai nogat) K10.00
b). long arapela taim K20.00

30. Laisens long sotpela taim tasol aninit long Seksen 56 K10.00

31. Fi bilong peimit bilog ol boskru laik sanisim peimit bilong wanpela bos-kru K10.00


MIRIA UME
Supritendent of Motor Traffic




• Batsman bilong Vanu Auna, Ralavu Rai train pairapim bal tasol tim bilong em i bin lus long Paramana long Keleone kompetisen.


Ol poto: Harry Kombega



• Pilai namel ong Anda 21 tim bilong Skailan wantaim West Coast long Mosbi ragbi yunien resis.



• Francis Moyap (lephan) na Richard Daniel sindaun na malolo i stap bihain long PNG training. Poto: Yakam Kelo.



• Wapela susa bilong Raiowai train long kisim bal tasol meri nogut bilong Rakaone stillim pinis long Pot Mosbi netbal kompetisen.



• Anda 21 tim bilong Skailan wantaim West Coast brukim bun long las wik ragbi yunien kompetisen long Mosbi.

Nupela basketbal asosiesen kamap

BUANG kominiti long Pot Mosbi bai i gat nupela basketbal asosiesen long National Kapital Distrik. Ol redim olgeta samting pinis long afiliat i go insait long Papua Niugini Basketbal asosiesen.

WATSON GABANA
i raitim

Man husat i go pas long helpim ol manmeri bilong Bunag, long kamap wan-

taim dispela nupela asosiesen, em Ben Ziski. Ziski i bin tingting long kamapim dispela asosiesen taim em i bin lukim ol yangpela manmeri bilong Buang i bin bung na kamapim wanpela pilai bilong ol tupela wik i go pinis. Long dispela taim, Buang Kominiti long Mosbi i bin bung long Hohola spot senta na ranim tupela wik basketbal kompetisen bilong ol. Long dispela taim, 16-pela tim olgeta i bin bung na tek pat long dispela gem.

Ben Ziski em i fauda bilong Capital basketbal lig (BCL) na tu wanpela senia referi long Mosbi. Taim em i bin kam na refim ol gem long dispela taim bilong ol Buang kominiti, em bin lukim stail na laik ol i bin soim. Olsem na em i bin askim ol sapos ol i

ken statim wanpela asosiesen long Mosbi. Ol Buang manmeri i bin amamas long dispela tingting bilong Zisti na holim wanpela miting pinis. Long dispela miting, ol i bin pasim tok olsem, ol bai kik ov wantaim gems bilong ol long stat bilong neks mun na i go inap long pinis bilong dispela yia. Ol i bin makim 8 mail olsem ples bilong pilai na olgeta dro bilong gem bai kam aut long neks wik.

Zisti i bin tok olsem, Buang Basketbal Asosiesen bilong Mosbi bai afiliat i go insait long PNGBF. Ol bai i go het long pilai insait long ol bikpela gem bilong kantri olsem Sauten jon basketbal tonamen long Popondetta na Nesinel basketbal sempionsip long Hagen long dispela yia.

"Mipela tingting long kamap wantaim dispela asosiesen bikos long Mosbi i gat tupela asosiesen tasol na planti gutpela manki bilong pilai i no save i gat sans long pilai insait long ol nesinel gems," Zisti i bin tok. "Nau yet, mi laik traim long developim ol yut. Olsem na mi laik statim dispela asosiesen," em i tok.

Zisti i bin tok tu olsem, planti

kampani i bin soim laik pinis long sapatim na helpim dispela asosiesen. Gavana bilong NCD, Bill Skate i bin helpim ol manmeri long 8 mail setelmen wantaim tupela basketbal kot. BBA bai yusim dispela kot long holim olgeta gem bilong ol.

Nau yet, ol i gat 16pela tim husat i soim laik pinis long pilai insait long dispela resis. Siksipela tim bilong meri na 10-pela tim bilong ol man. Zisti i bin tok olsem, taim olgeta tim i kam bung long dispela Sarere, ol bai stretim olgeta toktok na kamap wantaim hamas tim tru bai pilai long dispela taim.

Taim asosiesen i go strong, Zisti i bin tok olsem, ol bai ranim ol kosa na refiri kliniks long lainim ol yangpela long kamap gutpela refiri na kosa. Em tok tu olsem, CBL na POM basketbal asosiesen bai traim long helpim dispela nupela asosiesen gro insait long NCD.

Zisti, husat i bin go pas long statim CBL na tu wanpela biknem referi bilong kantri i laik bai olgeta basketbal asosiesen long Mosbi siti bai wok bung wantaim long developim basketbal insait long junia levul.

Fonde 4 pm: Bisini soka graun

OL PILAIA EM

RAPATONA:
Lesley John
Clement Anisa
Mark Loap
UNIVERSITY
Desmond Waku
Maino Kwallimu
Ben Lakasa
BABAKA
Kila Kila
DEFENCE
Robert (g/k)

Robert Sino
Selan
HOODS
Itaube
Kila Laundi
Steven Mail
ELA UNITED
Paul Isorua
David Geama
GURIA
Michael Toblas
KOSA
Scot Vavine

Namba foa taim Shell sapatim PNGSF

SHELL PNG i givim PNG spot federesen K50,000 long helpim wok bilong en aninit long wok "Operesen Go" long Tunde dispela wik.

Maketing menesa bilong Shell, Juan de Radigues i bin tok olsem, dispela em i namba foa taim bilong kampani bilong em long helpim PNGSF. Em tok dispela em i bikpela komitmen bilong Shell we em bai givim long wan yia wan yia.

"Aninit long hat taim kantri bilong yumi i wok long stap long em, we yumi wok long bungim bikpela hevi bilong moni, mipela i laik tenkim PNGSF long gutpela wok menesmen bilong em long lukautim na spendim ol moni mipela na ol arapela sponsor i save givim en," Radigues i bin tok. "Mipela bilip olsem PNGSF bai yusim gut dispela moni gen long kirapim kainkain wok bilong em long developim spot insait long kantri bilong yumi," em tok.

Em tok Shell i gat bikpela tingting long sapatim spot insait long kantri bikos Shell i laikim kainkain salens na kompetisen namel long wanwan spot oganaisasin. Na tu Shell i laik helpim long developim ol spot we bai kamapim gutpela sindaun long wan wan haus lain.

Narapela samting watpo Shell i wok long go het na developim spot long kantri em bikos, wantaim helpim ol i save givim, PNGSF i trenim na helpim long developim ol top klas rana bilong kantri, we ol i save apim neim bilong kantri bilong yumi. Wantaim dispela, De Radigue i bin soim olsem, dispela moni bai helpim olgeta pilai bilong PNG long Mini Saut Pasifik gem long Pago Pago. Em tok olsem em bilip strong bai PNG tim karim moa go medol i kam bek bihain long gem.

PNGSF jeneral sekretari, John Dawanicura i bin tenkim Shell long helpim ol wok long givim long spot federesen. Em tok olsem dispela em namba wan hap bilong kontrak, Shell i bin mekim wantaim PNGSF. Em tok bai Shell helpim gen wantaim narapela K50,000 long olgeta yia inap tripela krisimas i pinis.


Dawanicura i bin tok tu olsem, em askim Eking Praim Minista, John Giheno long givim K250,000 i go long PNGSF. Em tok dispela moni bai helpim federesen long salim tim i go long Mini Saut Pasifik gem na arapela bikpela gem long ovasis. Em tok bai em bung wantaim praim minista na stretim toktok long kisim dispela hap moni.

STORI BILONG PILAIA



Nem: Flossie Jeva
Niknem: Filroy Junior
D.O.B: 10/5/81
Krismas: 16
Netbal tim: Evedana
Posisen: Wing Atek
Feveret kaikai: Sips na kakaruk
Feveret dring: Fanta (orange)
Feveret kosa: Gewa Abaijah
Feveret ragbi pilaia: Brad Fittler
Samting yu save les long mekim: Tok baksait
Samting yu save laik mekim: Stori wantaim ol wantok
Driman: Kisim gutpela wok na ejoim laip.

- ROBERT KAN-ABOTE i raitim



• Wanpela straika bilong PNG Wesley Waiwai traim long rausim bal long lek bilong boi Bombers long PMSA soka resis long las wiken. Foto: Harry Kombega.

PORT MORESBY SOCCER ASSOCIATION

Catch Up Games - Week Six
Sunday, June 1, 1997.

Bisini One

08.00	First	Buresong vs Tawala
09.20	W2	GFC vs Tawala
10.25	W2	B/Kumuls 2 vs C.T Kings
11.35	W2	B/Kumuls 1 vs Pepsi Momase
12.00	First	Ilimo Bombers vs Sians
01.00	W2	Naniu vs Kurti-Andra
02.20	First	Wanzesi vs C.T Kings
04.00	First	Simla vs PS Rutz

Bisini Two

08.00	Second	Nisco vs Toring
09.20	W2	Keweh vs PS Rutz
10.30	First	Adau vs Keweh
11.45	W2	Pom United vs Cyclone
01.00	First	GFC vs Shell Eastenders
02.15	First	Pom United vs Normads
04.00	Premier	Guria vs Hoods

Bye: W2: Morata Sisters/Medics

PORT MORESBY SCHOOL SOCCER ASSOCIATION
WEEK 11 Saturday May 31, 1997

Under 7

8.00	St. Joseph's vs Ela Beach	3
8.40	Korobosea vs Gordons	3
9.20	Murray vs Pom Int'l	3

Under 8

8.00	Korobosea vs Vacant	8
8.40	Pom Int'l vs Gordons	8
9.20	Ela Beach A vs St. Joseph's	8
10.00	Murray vs Ela Beach B	8

Under 10

8.00	Ela Beach vs W.S. Dmo	10
8.50	Korobosea vs Gordons	10
9.40	Pom Int'l vs St. Joseph's	10
10.30	Murray vs Ted Diro	10

Under 11A

8.00	Pom Int'l vs Vacant	11
8.50	Murray vs W.S. Demo B	11
9.40	Ela Beach A vs St. Joseph's	11
10.30	Korobosea A vs Sacred Heart	11

Under 11B

8.00	Korobosea B vs t. Peters	2/1
8.50	Bomana Com. vs W.S. Demo A	2/1
9.40	Ela Beach B vs Gordons	2/1

Under 12A

8.00	Murray vs Ela Beach	2/2
8.50	Korobosea vs Gordons	2/2
9.40	Pom Int'l vs St. Joseph's	2/2

Under 12B

10.30	Kila Kila Prim. vs Korobosea B	2/2
11.20	W.S. Demo vs Ted Diro	2/2
10.30	St. Peters vs Vacant	2/1

Under 13

8.00	Pom Int'l vs St. Peters	1
9.00	St. Joseph's vs Sacred Heart	1
10.00	Ela Beach vs Philip Aravure	1
11.00	Pom Grammar vs Gordons	1

Under 14A

8.00	W.S. Demo vs St. Peters	MS
9.00	Philip Aravure vs Bavaroko A	MS
10.00	Pom Int'l vs Korobosea	MS

Under 14B

12.00	Ted Diro vs Holy Rosary	1
12.10	Bavaroko B vs De La Salle	2
1.10	Kila Kila Prim. vs Pom Grammar	2

Under 15A

8.00	De La Salle vs Gerehu High	1
9.00	Sacred Heart vs Holy Rosary	1
10.00	Don Bosco vs Coronation	1
11.00	Hohola Youth vs Ted Diro A	1

Under 15B

8.00	Pom Grammar vs Ted Diro B	I/S
9.00	Kila Kila High vs Bavaroko	I/S
10.00	St. Theresa vs W.S. Demo	I/S

Under 16B

12.00	St. Peters vs De La Salle B	I/S
1.00	Maino Heduru vs Pom Grammar	I/S
11.00	Hohola Youth vs Coronation	MS

Under 17A

1.00	Hohola Youth vs De La Salle	1
2.00	Maino Heduru vs Gerehu High A	1
2.10	Don Bosco vs B.V. Center	2

Under 17B

12.00	Pom Grammar vs Kila Kila High	MS
1.00	Gerehu High B vs Badihagwa High	MS
2.00	Coronation vs Holy Rosary	MS

MT HAGEN SOCCER DRAWS

Saturday, 31 May, 1997.

Gr 2	12.00pm	U19	Kalem vs Sunam
Gr 2	1.15pm	U19	Pascols vs B/Kumuls
Gr 2	2.20pm	W	Kalem vs Bismark
Gr 1	12.00pm	W	Icy Drifters vs BFC
Gr 1	2.00pm	Res	Kalem vs Sunam
Gr 1	4.00pm	Premie	Kalem vs Sunam

Sunday, June 1, 1997.

Gr 2	12.00pm	U19	Icy Drifters vs Bismark
Gr 2	1.15pm	W	Pascols vs B/Kumuls
Gr 2	2.20pm	Res	Pascols vs B/Kumuls
Gr 1	12.00pm	Res	Icy Drifters vs Bismark
Gr 1	2.00pm	Premier	Pascols vs B/Kumuls
Gr 1	4.00pm	Premier	Icy Drifters vs Bismark

Bye: BFC Premier
Premier Reserves
Under 19

Points Table as of May 24 & 25, 1997

Premier Division


Clubs	3P	W	D	L	GF	GA	Points
Blue Kumuls	3	3	-	-	12	4	9
Pascols	2	2	-	-	5	1	6
Bismark	3	1	1	1	9	5	4
BFC	3	1	1	1	5	6	4
Icy Driftory	3	-	1	2	5	10	1
Kalem	2	-	1	1	1	2	1
Sunam	2	-	-	-	1	9	0

Premier Reservers


Blue Kumuls	2	2	-	-	7	2	6
Bismark	2	2	-	-	4	-	6
BFC	2	2	-	1	3	3	3
ICY Driftery	2	1	-	1	4	4	3
Pascols	1	-	-	1	0	2	0
Kalom	2	-	-	2	3	8	0
Sunam	2	-	-	1	0	2	0

Under 19 Division




Blue Kumuls	2	2	-	-	10	0	6
Bismark	2	1	1	1	4	2	4
BFC	2	1	1	1	2	4	3
Pascols	1	-	1	-	2	2	1
Kalom	2	-	-	-	2	3	8
ICY Drifters	2	-	-	2	0	2	0
Sunam	1	-	-	1	0	2	0



• Ken McGuinness pilaia bilong Western Suburbs husat i werim NSW Blu's aste nait insait long namba wan pilai bilong Stet ov Origin. Em i bin fes taim bilong McGuinness long pilai long ol bikpela gem olsem Stet ov Origin... ANINIT: Bihain long wanpela yia olsem risev pilaia long Rooster Klub, John Simon nau mekim mak bilong em gen long Stet ov Origin olsem risev pilaia bilong ol NSW Blu's.



WANTOK SPOT



BUNGIM OL PNG SOKA SKWAT HUSAT BAI PILAI WANTAIM NU SILAN



Nem: Ben Beneho
Luluai
D.O.B. 20 Oct 1972
Ples mama karim yu:
Amaiufo Asaro)
Longpela: 173cm
Hevi: 74 kg
Ples: Goroka
Provins: EHP
Soka tim yu save pilai
long en: University-
Premier tim (POM)



Nem: Taku Sam Nebo
D.O.B. 28/10/70
Ples mama karim yu:
Kitava Island
Longpela: 168cm
Hevi: 65 kg
Ples: Kitava Island,
Trobriand
Provins: Milne Bay
Soka tim yu save pilai
long en: University
soccer club, Port
Moresby



Nem: Gidix Nasa
D.O.B. 27/01/68
Ples mama karim yu:
Mosbi haus sik.
Longpela: 175cm
Hevi: 65 kg
Ples: Zenag (Mumeng)
Provins: Morobe
Soka tim yu sav epilai
long en: Telikom (Lae)



Nem: Harrison
Kamake
D.O.B. 15/06/74
Ples mama karim yu:
Mosbi haus sik

Longpela: 165cm
Hevi: 65 kg
Ples: Labu- Morobe
Provins: Morobe
Provins

Soka tim yu save pilai
long en: (Cellnet)
Sobou Soccer club
(Lae)



Nem: Abiang Kera
D.O.B. 05/05/62
Ples mama karim yu:
Kaiapit
Longpela: 5ft 9 ns
Hevi: 80kg
Ples: Bagabuang
Kaiapit
Provins: Morobe
Soka tim yu save pilai
long en: Blue Kumuls



Nem: Willie Bera
D.O.B. 10/8/64
Ples mama karim yu:
Valoka (Hoskins)
WNBP
Longpela: 175cm
Hevi: 72 kg
Ples: Kassia, Hoskins/
Akrag Biwat, Sepik
Provins: WNBP/ ESP.
Soka tim yu sav epilai
long en: Rapatona
stret.



KOSA Richard Nagai wantaim nambatu bilong em Robert Popat i bin kamap wantaim dispela tim bihain long tupela trening kem long dispela yia. Planti bilong dispela manki em ol plaiia bilong las yia Melanesian kap salens long Lae, we PNG i bin winim Vanuatu. Dispela win long las yia mekim na PNG i bin gat sans long go insait long namba tu raun bilong wol kap kwalifaing pilai bilong en, we PNG bai pilai wantaim Nu Silan long dispela Sarere.

"Nu Silan i gat bikpela sans long win, tasol PNG i ken kam long bihain na winim dispela gem," Kosa Nagai i bin tok. "Mipela i no save long Nu Silan pilaiia na tu ol i no save long mipela. Oisem na mipela i gat traipela sans long dispela," Nagai i tok.


Dispela sem tim, husat pilai long Sarere bai i go long Fiji na bihain long Nu Silan long pilaim tupela gem bilong ol. Na laspela gem bilong dispela namba tu raun bai kamap gen long Mosbi.

"Nem bilong dispela kantri, win o lus, i stap long han bilong ol dispela manki nau. Sapos mipela winim oigeta gem bilong mipela, bai mipela pilai wantaim Australia. Na sapos mipela winim Australia, PNG bai i go insait long Wol kap," kosa Richard Nagai i bin tok. "Dispela oigeta samting bai karim kalkai, sapos ol dispela manki hia bungim tingting na save bilong ol wantaim long oigeta gem bilong mipela," em tok.

Nem: Francis Moyap
DOB: 16.10.1969
Ples mama karim yu:
Lae
Longpela: 178cm
Hevi: 65kg
Ples: Buke
Provins: Manus Island
Soka tim yu ave pilai
long en: Pot Mosbi
United



Nem: Yarawi Duri
D.O.B: 4/9/69
Ples mama karim yu:
Bosadi
Longpela: 176 cm
Hevi: 76kg
Ples: Bosadi village
Provins: Morobe
Soka tim yu save pilaia
long en: Rapatona ,
Port Moresby



D.O.B: 15/6/66
Ples mama karim yu:
Bulolo
Longpela: 178 cm
Hevi: 80kg
Ples: Maramba
Provins: East Sepik
Soka tim yu save pilaia
long en: Guria Football
club Lahi




Nem: John Laskam
D.O.B: 17/4/71
Ples mama karim yu:
Lae (Angau haus sik)
Longpela: 175 cm
Hevi: 61kg
Ples: Manau
Provins: Oro
Soka tim yu save pilaia
long en: Sobou soccer
club

Nem: Roy Karang
D.O.B: 28/2/70
Ples mama karim yu:
Lae
Longpela: 163 cm
Hevi: 66kg
Ples: Siassi Island,
Provins: Morobe
Soka tim yu save pilaia
long en: University
soccer club (Pom)



• Paniu Karol
Rapatona - Mosbi
Midfil




• Richard Daniel
Sobou - Lae
Midfil



• Wesley Waiwai
United - Mosbi
Straika



• Joe Aisa
Uni - Mosbi
Fulbek




• Hans Gewabing
Uni - Mosbi
Straika



• Steven Mune
Uni - Mosbi
Straika



• Geoffrey Emang
Rapatona - Mosbi
Midfil



• Emmanuel Tatau
Uni - Mosbi
Fulbek




• Batman Furigi
Uni - Mosbi
Winga



• David Aua
Babaka - Mosbi
Golkipa




• Richard Nagai,
Het kosa na antap
em asisten kosa
Robert Popat.





CAMBRIDGE *Rugbi Lig Nius*



Hagen Eagles
daunim
City Cowboys

Lukim moa stori bilong Inta siti long pes 3



CAMBRIDGE



GOVERNMENT WARNING. SMOKING IS DANGEROUS TO HEALTH.

Rema opim ai bilong ol selektas



• Senta na kepten bilong Kaubois Zachery Kipsy i traim long abrusim takol bilong Chris Itam (namba tu lephan) na wan pilaia bilong em bilong Hagen Eagles. Tim bilong Zachery ino pilai strong na ol i lus 20-16.

JOE KANEKANE i raitim

WANPELA yangpela fowet bilong ol Siti Kaubois i opim ai bilong ol nesenol selektas

long kain stail bilong pilai bilong em las wiken.

Dominic Rema, lilik brata bilong kepten bilong ol Kaubois Joe Rema i soim olsem em tu bai i no longtaim i bihain bikpela brata bilong em i go insait long Kumul tim sapos ol selektas lukluk.

Stat long las yia i kam inap nau long stat bilong Inta-Siti. Rema i soim olsem em inap long stap insait Kumul tim long wanem kain stail bilong pilai bilong em i kamap klia olgeta.

Namel long Kaubois, Rema i wanpela bilong ol strongpela pilaia i bin takol gut tru

na ranim bal i go kam.

Long olgeta gem bilong em, Rema i save wokim planti takol tru, na tu em i save go hit ap long wankain pasin.

Insait long ol gem wantaim Kundiawa Warias na Hagen Eagles, Rema tasol i givim hat taim tru long ol pilaia.

Long kliam we, em i ron na takol, we ol Eagles pilaia i bin kisim taim tru.

Rema em i wanpela yutiliti pilaia na em i ken pilai namel long ol fowet na long ol beklain tu.

Long ol gem wantaim Eagles, em i pilai long tripela posisen olgeta, seken row, huka na hav-bek.

Taim em i pilai long dispela ol poisen em i save pilai gut tru long wanem em i gat eksperiens long pilaim ol kain kain teknik. Tasol posisen we Rema i save pilai gut tru em seken roa. Namel long ol Kaubois fowet, em i kam aut kilia tru olsem em wanpela strongpela fowet tru.

Em i mekim moa long 13-pela hit ap na em i wokim 18-pela takol long dispela gem.

Takol bilong Rema i nogut long wanem, husat lain i kam klostu long em i save kisim taim tru.

Em i bai mekim yu pilim takol gut olsem bai yu no inap kam bek gen.

Bikos Rema i pilai long ol beklain bipo em i save gut tru long rausim bal i go taim ol i takolim em na dispela i helpir ol Kaubois long surukim birua bilong ol i go long hap bilong ol.

Rema tu i wanpela klinpela pilaia long wanem em i no save pait o statim trabel. Em i save pilai klinpela na hatpela gem.

Rema i bilong ples Kau insait long lalibu distrik na em i save pilai long Mendi Bulldogs bipo long em i kam long Mosbi.

Long siti em i jonim bikpela brata bilong em, Joe na tupela save pilai long Morata Swans.

Dispela em i seken yia bilong em long stap insait inta - siti tim.

INTA SITI SALENS RIPOT

Lahanis raunim tewel bilong Bombers

SAPE META i raitim

LAHANIS i bin soim pawa bilong en long asples bilong ol taim ol i daunim Lae Bombers 28-11 insait long gem bilong SP Inta-siti Kap long las wiken.

Bombers inta-siti tim bilong Lae siti wantaim kambek bilong eksperiens na bikpela Kumul fowat Simon Kundi i bin putim kamap wanpela strongpela salens agensim Goroka Lahanis long Danny Leahy pilai graun long Goroka long raun 3 bilong SP Inta-Siti Kap salens.

Bombers husat bin winim tupela gem bilong ol long las tupela raun agensim Mt Hagen Eagles na Rabaul Guria i bin kamap long Goroka las wiken wantaim driman bilong win. Tasol sori tumas, driman bilong ol long win i popaia na bagarap taim Lahanis i pilai kaskas long ol na bagarapim stret sindaun bilong ol wantaim siksipela trai na tupela konvesen kik long kam aut wantaim 28 poin win.

Sapos kika Ferdinand Nongkas i bin kikim gut ol konvensen kik, Lahanis inap long kamaut wantaim 36 poin win.

Long stat bilong Bombers ol i skorim wanpela konverted trai, tupela penalti kik na wanpela fil gol long i kam bihain wantaim 11 poin skoa lain.

Dispela pilai namel long Lahanis na Bombers i bin kik ov na stat isi. Pilai i pikim ap strong bilong en long 8 minit na Bombers i skorim wan-

pela fil gol.

Kirap nogut ol sapotas bilong Lahanis i singaut, kalap na paitim han i go i kam taim tupela feveret pikinini bilong ol Tai Onise i brukim strongpela difens banis bilong Bombers na abrusim tripela takolas bipo long em i mekim wanpela stail kat aut pas i go long faiv eit Fatty 'stail mangi' Buka long skorim wanpela isi-trai namel long tupela gol pas. Fulbek Nongkas isi tasol painim mak bilong tupela moa poin na Lahanis i kalap i go pas wantaim 6-1 skoa lain.

Faiv minit bihain long dispela, ol sapotas i pairap gen taim ol i lukim bikpela fowat bilong Lahanis Simon Nul i ron stret namel long difens bilong Bombers na i go slip antap long trai lain. Nongkas i edim tupela moa poin long su bilong en na Lahanis i surik i go antap 12-1.

Bombers wok hat na skorim tupela trai, tasol referi i no wanbel long dispela tupela trai we em i lukim olsem i bin kamap long fowat pas. I luk olsem long dispela as ol mangi long Lae siti ino moa tingting strong long pilai bikos dispela disisen bilong referi i daunim tru spirit bilong ol. Tasol ol i kamap wantaim tupela penalti kik na satim skoa 5-12.

Faiv minit bipo long hap taim Lahanis i kamap wantaim narapela trai em Jeffrey Aize i skorim na ol i go pas 16-5 long hap taim.

Long sekan hap Lahanis i skorim tripela moa trai em pawa haus fowat na kepten John Markham, senta Ivan Mosoka na winga Steven Saki i putim. Konvensen kik

bilong dispela tripela trai i no painim mak.

Lae Bombers long dispela hap i skorim tasol wanpela konverted trai.

Dispela wiken Lahanis bai i ken lukluk long narapela win taim ol i bungim het wantaim Rabaul Guria long Goroka. Nau yet Lahanis i pilaim pinis tripela inta-sti gem na winim tupela tasol. Ol i lusim wanpela gem agensim Mt Hagen Eagles tupela wik i go pinis. Na ol i ken kamap wantaim narapela win long dispela Sande long hom graun sapos ol i ken kamap wantaim wan kain atek na difensiv pilai we ol i bin putim kamap long las wiken.

Kosa bilong Lahanis Leva Teta itok em igat wanpela strongpela inta-siti tim isnait long dispela sisen.

Em itok em bai yusim sem lainap long sait bilong em we ibin pilaim Bombers las wiken. Kepten John Markham bai igo pas na lidim ol yangpela pilaia olem Steven Seki, Tai Onise, Simon Nul na Jeffrey Aize. Long saptim Markham bai ol eksperiens pilaia olsem Tuiyo Evei, Agi Tete, Kairo Makaso, Malum Oiyufa, Ivan Mosoka, Ferdinand Nongkas, Fatty Buka na Oscar Zugu bai sambai tasol long bagarapim sindaun bilong ol bai Tobras.

Tasol ol ino ken ting olsem Guria bai ikam na givim gem isi tasol igo long ol, nogat. Guria tu igat sampela strongpela pilaia we bai iken paia bek na spaos ol Lahanis ino was gut, Guria iken tanim tebol antap long ol na kamaut wantaim apset win.

Panthers soim pawa long Madang lig

JAMES KILA i raitim

GLOBE New Town Panthers i soim olsem i gat ol pilaia bilong ol i stap long soim stret stail bilong futbol long Madang lig.

Dispela em bihain long New Town i bagarapim sindaun bilong Royals 31-4 long las Sande.

Dispela win em i namba-4 bilong ol dispela yangpela strit mangi husat i save stap long New Town. Long tupela wiken i go pinis New Town i bin kisim wanpela gutpela sponsa i kam long James Barnes mit keneri long Madang yet. Olsem na long amamasim ol sponsa ol dispela das mangi i paia lait stret long Madang lig kompetisen.

New Town em primia bilong Madang lig long las sisen.

Long gem las wiken, ol yangpela bilong Panthers pilai strong tru long olgeta posisen long stopim olgeta sans bilong Royals.

Long stat bilong 20-minit insait long gem, tupela sait wantaim i bin strong tru long pasim ol yet long skoa.

Kepten bilong Panthers,

Chris Walames i luksave long dispela presa olsem na em i kikim wanpela gutpela bomkik we Fabian Enzo i bihainim gut i go na skorim namba wan trai.

Bihain long dispela Panthers i putim gen narapela trai taim yangpela hapbek Konie Lanke i abrusim ol birua bilong em na skoa.

Skoa long namba wan hap em Panthers 10 na Royals 0.

Long namba tu hap ol strongpela fowat bilong Panthers olsem Manuel Tropu, Joe Passingan i bin wok hat tru long brukim ol banis bilong ol plisman.

Insait long seken hap, Panthers i paia lait olgeta na kukim stret tewel bilong Royals taim ol lain olsem Manuel Tropu, Simon Jack na yangpela Francis Nagide i go na skoa.

Bihain long dispela sponsasim James Barnes i givim long Panthers ol i soim stret olsem ron bilong ol long resis bai i paia stret na ol narapela tim na tu ol selektas bilong provinsal sait, Madang Malins.

Long narapela gem las wiken Hawks i winim Brothers 22-10 na Tarangau i winim nupela tim North Raiders.

Guria bai traim strong bilong Lahanis

INTA SITI SALENS

WATSON GABANA i raitim

RABAU Island Spear Gurias i redim supsup bilong ol long sutim daun ol Goroka Lahanis long asples bilong ol dispela wiken long namba foa gem bilong Inta-siti salens bilong dispela yia.

Bihain long ol manki Guria winim Madang Marlins long wik i go pinis na putim tupela poin bilong ol i go antap long poin lada bilong Inta-siti salens, ol kisim strong nau na redi tasol long brukim nek bilong ol Lahanis.

Kosa bilong Spear Gurias, Dennie Reynolds i bin tok olsem, dispela win bilong ol las wik i putim spirit bilong ol manki bilong

em antap tru. Em tok, ol i redi tasol long go long Goroka dispela wiken na lukim wanem samting bai kamap insait long fil.

"Mipela i gat gupela difens... tasol mipela mas traim long wok long ol atek bilong mipela," kosa i tok. "Narapela samting tu faivpela manki bilong mipela i bin kisim bagarap long bodi bilong ol na dispela bai daunim tim spirit liklik."

Reynolds tok olsem; ol faivpela manki husat i bin kisim bagarap em; Geoff Iruki, Lukas Salbert, Charlie, Peter Dunn na Peter Walters. Em tok ol dispela manki i save pilai gut tru na sapos ol i no orait long dispela wik, ol bai painim narapela manki long kisim ples bilong ol.

"Goroka Lahanis i gat wanpela strongpela tim

long winim. Mipela mas pait hat long kam aut wina long Sande apinun," Reynolds i bin tok. "Ol i gat moa trening gem long pri season. Mipela i bin i gat wanpela pri season gem tasol. Dispela bai helpim ol, tasol mi gat strongpela bilip bilong mi long ol bois bilong mi," kosa i tok.

Wanpela manki husat Lahanis mas putim was gut em; Eremas Batki. Em i bin pilai wanpela gem tasol long pre season wantaim Lae long Mas na em mekim nem i go insait long Winfil 13 tim. Bihain tasol long em kam bek long Nu Silan tupela wik i go pinis, Batki bin pilai fu! 80 minits wantaim Marlins las wik. Kosa Reynold i bin tok olsem, Batki i no bin malolo liklik long dispela gem.

Narapela pilai bilong Guria husat i bin mekim

nem bilong em long Winfil 13 tim em Peter Walters. Walters i bin go pilai long Nu Silan long las mun long Osenia salens na kam bek wantaim nupela eksperiens long helpim tim bilong em Guria long dispela win bilong ol las wik.

Long Goroka, ol manki Lahanis i sapim spia na redim bunara bilong ol long sutim daun ol manki Rabaul long dispela wiken. Wantaim hom graun sapot na spirit bilong win las wik i stap yet, ol bai yusim wankain teknik na stail bilong ol las wik na givim Rabaul Guria hat taim tru.

Wantaim sapot bilong stail manki bilong ol Mark Mom, Fatty Buka na faia pawa bilong bikman, Tuyo Evei, ol bai traim long brukim banis bilong Rabaul na kam aut wina long Sande apinun.

Hevi bilong Rabihamul i pinis tasol WHRL bai stap klostu

TOK PAIT namel long Westen Hailens na Maut Hagen ragbi lig long Rabihamul pilai graun kamap klostu long arere bilong en. Tupela asosiesen i bin pasim tok long serim dei na yusim fil. Tasol tok tok bilong Hagen lig long baim wanpela loya i sanap yet.

Tupela asosiesen i bin pasim tok olsem wanpela bai pilai long Sarere na narapela long Sande. Ol i bihain dispela tok tok bilong ol na i pilai gut i stap. Tasol long wik i go pinis, ol klap bilong Westen Hailens ragbi lig i no bin kamap long Sarere na pilaim gem bilong ol.

Ragbi lig kodineta bilong PNGRFL long hailens rijen, Joe Tokam i bin tok olsem, planti klap bilong WHRL i no moa soim amamas bilong ol long kam na pilai. Em tok, ol bos bilong Nesinel ragbi lig (NRL) long Hagen i no soim laik moa long sapotim wan wan klap bilong ol.

"I nogat gupela kominikesen namel long ol bikman bilong NRL long Mosbi na WHRL. Olsem, na ol bikman bilong WHRL i paul nabaut na i no sapotim ol klap long hia," Tokam i tok.

Em i bin tok tu olsem bikos long ileksen, planti pilaia i lusim lig na i go sapotim ol kendidet bilong ol raun long taim bilong pilai na ol i no save kam na pilai. Olsem na planti taim, sampela klap i no save kamap long fil. Em tok; ol mekim olsem i kam na sampela tim i les olgeta long kam na pilai. Ol mekim olsem i kam na planti presiden bilong wan wan klap i bin les long salim ol tim bilong ol i kam long fil na pilai.

"I no longtaim bai kompetisen bilong WHRL i pinis hia long Hagen. I nogat gupela wok bung namel long man husat i go pas long ranim asosiesen," Tokam i tok.

Westen Hailens Kange, tim bilong WHRL insait long NRL kompetisen i bin i go pilai wanpela taim tasol wantaim Mosbi Vipers long stat bilong Mas dispela yia. Bihain long dispela taim, ol i no bin raun moa na pilai wantaim ol arapela tim bilong NRL. Long pinis bilong las mun tasol, ol Goroka Nokondis i bin go antap long Hagen long pilai wantaim Kanges. Dispela em tupela gem tasol bilong ol Kange long dispela yia. Ol pesman bilong Kanges i bin pasim tok olsem ol bai i go pilai wantaim ol arapela tim bilong NRL olsem: Nondugul, Morobe Country, Gumine na tu Vipers namba tu taim tasol dispela i no bin kamap. Na nau, lokel kompetisen bilong ol long Hagen i laik kamap long arere bilong en.

Kodineta bilong ragbi lig long hailens rijen i tok olsem, taim ol Westen Hailens Kanges i bin i go pilai long Mosbi wantaim ol Vipers, ol selekta bilong Vipers i bin kisim nem bilong tupela man tasol. Em tok, dispela tupela man i pilai tupela gem tasol na ol Vipers i dropim ol long tim. Dispela pasin i mekim na planti yangpela manki bilong WHRL i les long pilai ragbi. Na ol i go wantaim ol kendidet long kempein raun.

Ol bikman bilong WHRL i bin les long toktok long dispela hevi taim RLN i bin askim ol long givim sait stori bilong ol.

Klia long ol dispela lain!

• Knights A-gret tim (antap) na B-gret tim bilong Roosters long Guntabeg Tas asosiesen long Madang. Tupela tim wantaim em ol sempion bilong las yia husat i train bun gen long kisim bek taitel long dispela yia.



Strongpela tingting bilong Lozza

*Nogat
samting i bin
sens bihain
long 20 yia...*

"Soim mi wanpela boi krismas bilong em seven na bai mi soim yu wanpela man." Wanpela saintis, husat i save stadi long pasin bilong man i bin kamap wantaim dispela tok. Nau dispela hap tok i soim pasin bilong Laurie Daley.

Taim Laurie i bin seven yias, em i bin tingting long pilai ragbi. Dispela driman i kamap tru nau. Tasol taim ol senisim dei bilong pilai, em i save kra i na i go slip. Laurie i pilai ragbi 20 yias nau. Em i lusim pasin bilong kra i long sapos em i no pilai ragbi long wanpela dei. Em lusim pasin bilong kra i go long pikinini meri bilong en, husat i gat wanpela krismas tasol. Tasol strongpela tingting bilong em long pilai ragbi i stap yet.

Long dispela as na em i bin mekim wanpela strongpela disisen long stat bilong las yia. Wanpela disisen we em i no inap lus tingting na tu toktok bilong em i no bin wanbel wantaim tingting bilong em. Olgeta taim em i save tingting long holim bal long wanpela han na ai bilong em pas long ol birua bilong em, em i no bin save gut, husat i bin panisim em taim Laurie i bin tokaut olsem em i no inap pilai aninit long ambrela bilong ARL gen. Tasol i no longtaim, Daley wantaim ol arapela Supa lig sain-ap pilaia i bin tanim bek na kam bek.

"Em i bin wanpela hat taim tru," Laurie i bin tingting i go bek. "Mi bin minim tru wanem samting mi bin tok, tasol insait tru long mi, mi bin tingting long pilai ragbi. Taim i bin sindaun na tingting i go bek gen. Mi no bin tingting gen olsem mi nogat arapela sans.

"Sapos mi no bin pilai dispela em i no inap stapim wanpela samting."

Tasol dispela i no bikpela samting nau. Olgeta dispela samting i pinis

las yia. Tasol Daley i bin kisim sotpela taim tru long putim olgeta samting i go bek long baksait bilong em. Wanpela bikpela strong bilong em, em pasin bilong putim olgeta dispela toktok long baksait bilong em na go fowat. Em wankain olsem long pilai insait long fil.

Long Tri-Series gem, tupela wik i go pinis wantaim Nu Silan, Daley i bin klostu tru putim wanpela trai taim wm i bin tromoim wanpela bal i go fowat. Tasol i no longtaim, em sapatim Ken Nagas long wanpela trai bilong ol.

"Mi ting mi bin laki tru... Mi no save wari taim mi mekim mistek," em tok. "Mi oltaim save mekim olsem.

"Mi bin save long dispela taim olsem, nogat wanpela man inap pilai gut olgeta taim na i no inap mekim wanpela mistek. Olsem na go het long gem bilong yu."

Dispela sem tingting i bin helpim Daley long sanap strong na kam bek hariap gen long pilai taim em i bin kisim bikpela bagarap long bodi bilong em i no longtaim i go pinis. Taim tupela poroman bilong em; Ricky Stuart na Bradley Clyde i stap yet long bagarap ol i gat, Daley i kam bek hariap long bagarap na go stret long pilai. Em pilai tu na hap sisen nau. Em i no bin bungim wanpela bagarap long bodi bilong em na em wok long pilai namba wan futbol long ragbi lig gem bilong em.

"Yes, em gutpela long bringim olgeta samting wantaim bihain long sampela bagarap mi bin kisim long bodi bilong mi i no longtaim i go pinis," em tok aut.

"Yu bai stat long wari taim yu bungim bagarap long bodi o mekim samting i no stet long laip bilong yu. Planti manmeri i save tok olsem, mi save kisim bagarap long bodi bikos mi save pilai strong tru.

"Ating, i mas tru. Tasol mi save ting olsem laki sans em bikpela samting tru insait long fil. Mi bin traime long sanisim gem bilong mi liklik tasol - Mi nau pilai smat liklik winim bipo."

Daley i lukim bikpela inpruvmen long gem bilong em taim em lukim



h a u
e m
s a v e
setim sapat
pilai. I no dispela tasol. Husat man o meri i bin bihainim gut pilai bilong Canberra Raiders bai tokaut olsem, Daley i gat gutpela spit tu.

I no gutpela long wanpela man i gat "olpela lek".

Dispela em wanpela maus i kam long Anthony Mundine, pilaia bilong Brisbane Broncos, husat i bin tok olsem Daley mas step daun na givim sans long ol yangpela manki.

"Mi save olsem em i ken pait hat na kamap long dispela mak," em bekim Brad Fittler i bin mekim long dispela toktok bilong Mundine..... tasol beks bilong Broncos i no wari long wanem samting ol kisim.

"Em wanpela naispela pilaia na mi save amamas long lukim em pilai," Daley i bin tok. "Yu no inap save tru long wanem samting em minim na toktok, olsem na mi larim dispela toktok slip tasol."

Wantaim arapela salens, Daley i bin bungim long laip bilong em, bisnis bilong Mundine i bin mekim em

pilai kranki
tru insait long
fil long stat
bilong dispela
sisen. Dispela em
wanpela as watpo na
Canberra i bin kik ov wantaim dispela sisen krangki tru.

Nupela kosa bilong Canberra, Mal Meninga i bin kisim taim tru taim ol lain bois bilong em i no bin mekim gut long stat bilong sisen. Dispela i bin wankain tu long Canberra klap olgeta.

"Mipela i bin redi gut tru long wanpela gutpela sisen. Tasol dispela i no bin kam aut gut, Daley tok.

"Wanpela hevi bilong Canberra em olsem, em i no wanpela bikpela samting, husat i lusim mipela na i go. Mipela oltaim i save kam aut sempion.

"Long stat bilong yia, mipela bin gat sevenpela pilaia bilong mipela i bin bungim bikpela bagarap long bodi bilong ol. Na tu sampela ol Agret pilaia bilong mipela i bin pilaia insait long ol lokol tim yet. Olsem na mipela i bin lusim ol gem bilong mipela. Tasol nau, mipela stat long brukim ol birua bilong mipela insait long fil."



STORI BILONG PILAIA

Nathan Long
Cronulla

Posisen: Seken Rowa.

D.O.B: Me 20 1973.

Niknem: "Longy".

Wanem samting yu ken tingim yet long nambawan A-gret gem bilong yu? Ol West i bin winim mipela long 1994.

Bikpela mak yu bin kisim taim yu bin pilai ragbi? Long las sisen, klap bilong mi bin makim olsem nambawan fowat bilong klap.

Feveret dring: Frut jus.

Feveret funiman blong yu? Olpela Cronulla pilaia, Craig Dimond.

Feveret niteklap: Carmen's long Miranda.

Feveret hap yu laik i go holide: Bali, bikos, i gat gutpela ples bilong sef na laipstail long hap em i no ekspensiv.

Hau yu bin stat long sef? Taim mi bin faivpela krismas tasol, papa bilong mi bin kisim mi go daun long nambis long sef. Long dispela taim, mi bin pas olgeta long en.

Wanem feveret hap yu save holimpas ol gutpela si bruk? Yu no inap winim Cronulla.

Yu save tingting long kain kamikaze stail bilong sef yu bin kisim tu o? Mi taim long developim wanpela rot bilong sef. Bikos mi pilim

olsem mi no inap stap longpela taim long dispela gem.

Taim yu manki, yu tingting long kamap long wanem kain mak? Long kamap wanpela profesinel tenis pilaia of sefer.

Yu save mekim wanem taim yu no pilai? Mi save go lukim hos i ran.


Yu gat wanpela hos tu o? Mi gat wanpela hos nem bilong en Manomars. I no longtaim i go pinis em i bin ran tupela taim na winim wanpela ron tasol long Doomben.

Yu tingting long kamap olsem husat long bihain taim? Greg Norman. Bikos em i gat naispela laipstail.

Wanem longlong samting tru yu bin mekim? Mi bin go betim hos.

Wanem funi samting tru i bin kamap long yu taim yu bin pilai ragbi lig? Long las yia taim mipela i bin pilai semi fainel wantaim Brisbane, mi lukluk i go antap long ol manmeri na mi bin lukim ol sapota bilong mi i bin welim ol giaman fes olsem bilong mi. Dispela i bin mekim mi lap nogut tru.

Wanem gutpela stia tok wanpela kosa i bin givim long yu? Go insait long fil na pilai ol gem bilong mi. Dispela wanem samting mi save oltaim traim long mekim.



• ANTAP: Wapela bilong Mt Hagen i painim rot long han bilong ol Cowboys.

• RAITHAN: Wapela Magani pilaia hangamap long han bilong ol manki Souths long las wiken.


• ANINIT: Wapela pilaia bilong Souths i bin laik long traim ol Magani banis long las wiken.

Ol poto: Harry Kombega

Eksen poto bilong las wiken



• Joe Roma bilong Capital Cowboys laik ron abrusim ol Eagles pilaia long SP Inta Siti salens las wiken.



• Insait senta bilong Mt Hagen Eagles James Kops i traim long brukim takel bilong Sine Sine na Fred Leo. Kops i soim stail bilong em na ol bin win.



PNGRFL suspendim Wewak lig

Papua Niugini futbol ragbi lig (PNGRFL) i pasim tok long suspendim Wewak lig long i no ianp pilai insait long ol bikipela tonamen bilong en bikos olgeta klap i no hariap long baim pilai-ia rejistresen fi bilong ol.

Sekretari bilong Wewak lig, Helen Heni i bin tok olsem, long kalenda bilong PNGRFL, olgeta asosiesen sapos long pinisim olgeta pilaiia rejistresen fi bilong ol long 23 Me. Em tok taim olgeta pilaiia i baim fi bilong ol pinis, bai ol wan wan asosiesen i ken salim nem bilong ol i go long PNGRFL long soim olsem dispela asosiesen i gat inap tim na pilai-ia long pilai aninit long dispela asosiesen.

Tasol long Wewak lig, Helen i bin tok, ol i no bin mitim dispela det lain bilong ol. Em tok planti pilaiia bilong foapela klap husat nau pilai insait long Wewak lig resis i no bin pinisim olgeta fi bilong ol. Olsem na PNGRFL i bin pasim tok long suspendim ol long i no inap pilai insait long ol bikipela pilai bilong en dispela yia. Ol kain bikipela gem olsem Cambridge kap na Nesinel 9's tonamen.

Sekreteri bilong Wewak lig, i bin tok tu olsem, olgeta klap presiden i save pinis long dispela samting na ol pasim tok olsem ol bai go het wantaim sisen bilong ol. Nau yet, Wewak lig i stap insait long namba tu gem bilong propa sisen. Klap kompetisen bai go het, tasol Wewak lig bai i no inap i gat wanpela tim insait long Cambridge kap saliens na tu long nesinel 9's sempionsip long dispela yia.

Foapela tim husat nau resis insait long Wewak lig em; Tigers, Bulldogs, Easts na Tarakum. Tarakum em wanpela nupela tim, we ol soldia boi bilong Moem, ol manki woda bilong Boram na plisman long Wewak taun yet i bung wantaim na kamapim.

Helen tok olsem, lokol kompetisen i wok long ron gut nau, tasol i gat narapela liklik hevi tasol i stapim planti sapota i kam bung. Em tok, nau yet, Wewak lig i nogat gutpela fil we ol sapota i ken kam na sindaun long lukim pilai. Em tok ol bai traim long kamap wantaim sampela moni o sponsa na traim stretim ples bilong sindaun na gren-sten.

Pait bilong las yia stapim pilai namel long Muruks na Warriors

WATSON GABANA i raitim

Kik bek bilong kros pait namel long Mendi Muruks na Kundiawa Warriors long las yia, we tupela man i bin dai mekim na tupela tim ya i no bin pilai namba foa gem bilong ol long las Sande olsem kalenda bilong PNGRFL i tok.

Kosa bilong Mendi Muruks, Francis Ank i bin tok olsem, em i bin stapim ol manki bilong em i go pilai long Kundiawa long wiken bikos, em i no laik kirapim narapela pait gen. Em tok, ol ragbi sapota bilong Kundiawa i gat kros yet wantaim Mendi Muruks yet, bikos long dispela pait long Lae las yia. Em tok ol Muruks i no kisim wanpela gutpela tok orait i kam long ofisel bilong Kundiawa ragbi lig. Olsem na ol i no laik kam daun long Kundiawa long las Sande.

"Sefti bilong ol pilaia bilong mi em inpoten. Mi no laik long kamapim narapela hevi gen na bagarapim bel bilong ol lig sapota bilong mi long Mendi," Francis i tok. "Ol PNGRFL i no inap kam na helpim mipela long stretim ol dispela hevi sapos wanpela man o meri i dai. Olsem na mi tingim dispela na mi no laik kisim tim bilong mi i go daun long Kundiawa," em tok.

Em tok olsem, ol wanlain bilong ol man husat i bin dai long Lae bihain long dispela pait i no laik long Kundiawa Warriors i go pilai long Tande Oval-long Mendi. Em tok olsem ol wanlain bilong ol dispela tupela man i laikim PNGRFL na Kundiawa Warriors bod long baim olgeta moni ol i bin promis olsem kompensiesen.

Long Mande dispela wik, PNGRFL i bin salim wanpela feks i go long Mendi na tokim ol long i go daun long Kundiawa na pilai wantaim Warriors. Kosa i bin tok olsem, ol bai i go long dispela gem. RLN i save olsem ol Kundiawa Warriors i redi tasol long pilai wantaim Mendi Muruks.

Kosa bilong Warriors, na olpela kumul pilaiia, Bal Numapo i bin tokim RLN olsem, ol Simbu i nogat bel kros wantaim ol manki Mendi na ol i no inap kamap wantaim wanpela pait o trabel olsem ol kosa bilong Mendi i ting bai kamap. Em tok, olgeta manmeri long Simbu i lusim tingting pinis long dispela samting i bin kamap



• Senta bilong Siti Kaubois Joe Rema i holim bal na abrusim takol bilong ol Mt Hagen Eagles.

long las yia long Lae na ol baim pinis sampela moni i go long wanlain bilong ol man husat i bin dai. Numapo tok tu olsem planti manmeri long Kundiawa na Simbu olgeta i bin wet tasol long lukim dispela gem. Na taim ol Mendi Muruks i no bin kamap long dis-

pela taim, ol i bin kros na i go bek long ples bilong ol wan wan.

"Mipela sori tru long wanem samting i bin kamap long Lae long las yia," Numapo i bin tok. "Sampela man, nogat rispek long ragbi i bin mekim dispela samting

na tupela pren bilong yumi long Mendi i bin dai long dispela taim."

Numapo i bin tok tu olsem sapos ol Mendi i no laik long kam pilai long Kundiawa, PNGRFL mas painim wanpela namel ples olsem, Maut Hagen o Minj long kamap wantiam dispela pilai. Na tu sapos, ol sapota na pilaia bilong Mendi Muruks i no laik long Kundiawa long i go pilai long Tande Oval long Mendi, ol manki Kundiawa bai i no inap i go na pilai long hap.

Nau yet, RLN i no save tupela tim ya i bin go pilai long Kundiawa o nogat. Wantok i bin go long print long Trinde olsem na RLN i no save yet long disisen bilong dispela tupela tim. Tasol long Sande dispela wik, ol manki Kundiawa Warriors bai i go daun long Madang na pilai wantaim ol Marlins long Ron Albert fil long Madang. Kosa Numapo, i bin tok olsem, ol manki bilong em husat bai pilai long Kundiawa long Trinde bai stap long tim bilong i go daun long Madang. Ol manki Numapo tok bai pilai wantaim Madang Marlins long dispela wiken em: Jay Tu, Bill Justin, Rendell Kaupa, Robert Ate, Charlie Ombi, Michael Pagau, Vicky Moses, Wamol Kul, Mogi Dull, Kawage Gagma, Ezekiel Ben, Main Pagau na John Kumo. Ol resev: Kurumba Boi, Bobby Vagaid, Auta Kamen na Rodney Ogungo.

Kosa bilong Madang Marlins, John Jacob i no redim tim yet, taim RLN i bin askim. Nau yet, wanpela pilaia bilong Marlins tok planti pilaia bilong ol i bin kisim bagarap long bodi bihain long ol i bin pilai wantaim Spear Guria long Kokopo las wiken.

Long arapela gem bilong SP Inta-siti tim bilong wiken; Lae City Bombers bai bungim pes wantaim Capital City Cowboys long Lae, Mendi Muruks bai pilai wantaim Maut Hagen Eagles long Rabiamul oval long Hagen na Goroka bai lukautim ol manki wansolwara bilong Rabaul long Sir Danny Leahy oval long Goroka.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.